

Rabila Majjaanawa k'Isa Lik yi riije

En urzi k'ono don kun t'oone adda mattup ettiyo

Ette Rabila Majjaanawa k'Isa, Lik yi riije. Lik gen yon wede daawiya. Yon ti diine don zina k'Isa ye, wo yi turguwe tan baadan ti Pool wede zina k'Isa me. Yon yi likke ti kane don izire a ita k'Isa kono y'anni tondite mummino Isa yi likke a siido me. Mattup ette yi riije a wede soo sundi Teyopil. Ti diine kane don pay i riijite mattupiyagi k'ono Raa gen, Lik siidi Yawudusu ye me.

Adda mattup ette Lik yi ruute mummino Isa an y'ehe wo ti naabo ere y'ize a siido, aakede: dooyiso ere yi duuye duwo, urzi k'untadi wo baldiyadi ti diine don unto. Isa yi kazita ono Raa a duwo ti toogo, y'an d'eliyo beeko a don k'eeni, yi lommitte siitandani wo yi d'isiyo suldi k'armika baadan.

Kane Yawudiyagi an delliyo mozigo wede etto y'an di'n utta. Yon gen Wede k'Uttiyo Raa y'a t'igibo, aa nebiyagi an ruute ti kaaga adda mattup ki Raa. Raa gen yi suune Wede k'Uttiyo umbo man, kine duwo pay en in digge. Inkino y'a t'igibo Uli soo danjal, kono y'a utta don i ziipe addan a yode adda siidiyagi pay. Ulo gen, yon Isa Almasi.

Toose ki Lik

¹⁻² Teyopil mee'ki nun, don ongo an wulle t'edayan suldi don Raa y'ize t'ume k'eesiyo a diinayin me. San kane an t'ize don kazita k'ono wo an in t'iide taaya a suldi gen me, man don baadan ti diinayin an d'iise raaniya ki taaya gettiyo. ³ Wo aame ni zidde ita mekk'ono a suldi don pay ize t'ume k'eesiyo genno man, Teyopil nun ton o d'ize unse n'a di raane a kee ita ki suldi gen, son k'ita bakadi bakadi. ⁴ Nun n'a raaniya kono k'a suune beehiye, dooyiso ere an ki duuye gette tod'te d'erec.

Urzi wede an di t'eha Zan Batis

⁵ A ozzinagi don Erod yon mozigo ki siido Ziide, i d'ede wede sedefeke sundi Zakari, yon gen ti diine don sedefeke don k'Abbiya*. Wo to eddi sundutu Elizabet, ti ita k'inni k'Aron mozigo goole don sedefeke. ⁶ Kane gen sirwan pay ki diine a daana Raa, an ollige onami wo an sooru a urzi wede pay k'oogoro ki Galmeega Raa, duwo an an ki zaapu ono a eedan ye. ⁷ Wo kane ulo an k'ede ye kono Elizabet tod'te karta, kane sirwan pay an ti guulike.

⁸ Onniyo soo Zakari y'a t'iide k'adda Boy Raa isiyo naabo ki sedefeke, kono iina a kaabadan an d'ise. ⁹ A urzi k'oogoro, kane don sedefeke an t'ize teltel muntelliyo man, i-t'iire a yode a ogge suldi koddiyo eediyadan unse† adda Boy Galmeega Raa wede k'adda me. ¹⁰ A peedo ere an d'oggiyo suldi koddiyo eediyadan unse,

* **1:5** 1.5 Kun wollo adda mattup ki 1 Koronik 24.7. † **1:9** 1.9 Kun wollo adda mattup ki Egzod 30.7-8.

kane dɔŋ duuru pay ti paate an tondiyo Raa. ¹¹ A kaamiki, maaleeka ki Galmeega Raa y'a iide tukki Zakari, wo y'a t'îhira a kese k'ammade ki munda aa sandup an d'oggiyo suldi koddio eediyadan unse. ¹² Aame Zakari yi y' wulle man, eedí t'a digge wo orgiso t'a yi ziida. ¹³ Wo de maaleeka yi di ruute, y'ede: «Zakari kee k'orgide ye, kono tondiyadá a Raa gette, yon y'illiga. Eddá Elizabet t'a t'eha ulo, wo ki dizaapa sundí Zan. ¹⁴ Kee addá a ôona t'unusuwo kono yode, wo dɔŋ baadan ulban an d'isa unse a ehiyadí te. ¹⁵ Yon y'a t'isa wede goole a daana Galmeega Raa, toote k'inni bin yi ki siba ye, ise toote ti doolo wede i-d'ede orme ton man‡. Yon t'adda k'adde meedí gen min, addí ôoniyo t'Unde Kamilen. ¹⁶ Don k'Izirayel baadan y'a ti'n kimo ki tukki Galmeega Raazan§. ¹⁷ Ettiyadí y'etto yon wede zina Raa, ti toogo k'Unde Kamilen ere i-dokkiyo nebi Eli. Inkinon man maawi ti innizan y'a ti'n sella an di t'okkiya, wo dɔŋ i k'ollige ono ye ton y'a ti'n kimo a suuniyo k'ono ere ki dɔŋ ki diine, kono y'an isa dɔŋ i t'ikkima tuddan a Galmeega*.» ¹⁸ Zakari yi di ruute a maaleeka, y'ede: «De kan mummino n'a suuna ono gen derec me? Derec, nun ni t'ize gôole wo eddó ton ozzinagutú îide, ti ki t'ehe ye.» ¹⁹ Man maaleeka yi di'n gime onamí, y'ede: «En nun maaleeka Gabiriyel wede ôhire a daana Raa ni di naabiya, yi n'igibo n'a-d'iido ti rabila majjaanawa kono

‡ **1:15** 1.15 Kun wollo adda mattup ki Nombire 6.3. § **1:16** 1.16 Kun wollo adda mattup ki Malasi 2.6. * **1:17** 1.17 Kun wollo adda mattup ki Malasi 3.23-24.

n'a-di kize. ²⁰ Wo kee onamó ki k'umbe ye, injkino maṅ bizá a di t'ippa ki rootiyo umbo bini onniyo ere suldí pay geṅ a-t'etta. Eyye, ono dɔṅ ni ruute geṅ a t'isa aame onniyo t'îida maṅ.»

²¹ Aame geṅ kane dɔṅ duuru an delliyo Zakari, wo an ziidá giggiraṅ kono t'adda Boy Raa wede k'adda geṅ yi ki t'adfiya kesiko ye. ²² Aame yi t'udfo kotto maṅ, yi k'aaniya rootiyo ye a dɔṅ duuru geṅ me. Wo kane an di zuune yoṅ i-iido munda aa suniye adda Boy Raa wede k'adda geṅ me, y'an ooyisito dugiyko dɔṅṅal wo bizí ki rootiyo umbo.

²³ Aame Zakari y'a ti dɔṅge onniytagi dɔṅ ki naabadí adda Boy Raa maṅ, y'a aahe boozí. ²⁴ Bini maṅ eddí Elizabet ti t'umbe adde, tere paat geṅ t'ombide tuddutú. Wo tod' t'a ruute t'adda k'addutú, t'ede: ²⁵ «Enno munda wede Galmeega Raa y'ize a tukki nuṅ te: Nuṅ te sukiyagi a daana dɔṅzó me, kono o k'ede ulo ye. Wo ankeṅ y'a dihe y'o di booye sukiyagó a daana duwo pay.»

Urzi wede an di t'eha Isa

²⁶ Elizabet mahiwatú îide tere zoot maṅ, Raa y'a igibe maaleeka Gabiriyel k'adda geeger soo ki siido Galile sundutú Nazaret. ²⁷ Yi y'igibe ki tukk'uto koṅso, tod' t'ibire ulo obulso sundí Yusup, yoṅ geṅ ti biza bumbu Dawut. Wo to uto koṅso gette sundutú Mariyam. ²⁸ Maaleeka yi-t'iide di tode, y'a t'uuney wo yi di ruute, y'ede: «Koṅ ulbí i iso unse, koṅ ere Raa yi ize beeko, Galmeega Raa yoṅ ti koṅ.» ²⁹ A onamí geṅ ettú a digge, ti d'elkiso t'adda k'addutú wo t'ede:

«Toose kino ettiŋ i-kaza moo me?» ³⁰ Injino maŋ maaleeka yi di ruute, y'ede: «Mariyam koŋ m'orgide ye, kono koŋ m'uune beeko ti Raa. ³¹ Koŋ m'ollo koŋuwo, m'a seeda mahuwe, m'a t'eha ulo wo mi di zaapa sundi Isa. ³² Yoŋ geŋ y'a t'isa wede goole, an di y' waaka Ulo ki Raa goole a jiiire pay. Galmeege Raa yi di t'ela kaakido moziko ere ki mugiyi Dawut, ³³ wo y'a lekka a moziko ki daayum a tukki doŋ k'Izirayel, wo mozikadi ti ki danga ye.» ³⁴ Mariyam ti di ruute maaleeka, t'ede: «Geŋ aasa mummino, kono nuŋ ti kule kaŋ soo toŋ ay k'ikkima ye me?» ³⁵ Maaleeka yi di'n gime onamtu, y'ede: «Unde Kamileŋ t'a deega eedi, wo toogo ki Raa goole a jiiire pay ti-ki ti'n diiba aa lukkise. Kono kamo ulo wede mi t'eha geŋ yoŋ kamileŋ, wo soŋ an di y' waaka Ulo Raa. ³⁶ Wo m'ollo, Elizabet taasadi toŋ ti uune adde ki tere zoot, t'a t'eha ulo a goolikatu geŋ me, tode ere an'de karta toŋ maŋ. ³⁷ Derec, munda wede Raa yi k'aane ye umbo.» ³⁸ Injino maŋ Mariyam t'a ruute, t'ede: «Nuŋ te ere naabo Galmeege Raa, pay geŋ o t'iso aa kee k'o ruute.» Saŋ maaleeka yi-t'iili, y'a ingile.

Mariyam tod' daŋ Elizabet

³⁹ Onniyto miibi k'ita maŋ, Mariyam t'a t'iiziga, t'a ingile ti naariya k'adda geeger ki siido Ziide ere adda diine moŋgali. ⁴⁰ T'iide'ŋ ti t'iide adda boy Zakari wo t'a ruute, t'ede: «Elizabet toosadi.» ⁴¹ Aame Elizabet t'illiga toose ki Mariyam kotto maŋ, ulo adda k'addutu y'a iise arbu wo tod' Elizabet addutu a uune t'Unde Kamileŋ. ⁴² Tod' t'a idili ti golla awwa,

t'ede: «Konj te Raa yi ti ziipe beeko a jiire erayi pay, wo ulo wede adda k'addi tonj beeko Raa a eedi. ⁴³ Nunj te wee te doo minj mekki Galmeegó t'a iido wolliyadó me? ⁴⁴ Ki kotto m'ollo, aame n'illiga toose ki konj genj, ulo adda k'addó tonj i-d'ize unjse, y'a iise arbu. ⁴⁵ Unjsuwo a tode ere umbe a ono donj iido t'urzi Galmeega Raa, kane genj a-t'etta.»

Ôoro ki Mariyam

⁴⁶ Injino manj Mariyam t'a ruute, t'ede:
«Nunj t'addó pay n'a t'imme Galmeega.

⁴⁷ Raa yonj Wede k'Uttiyadó,

kono k'injino addó a ûune t'unjsuwo,

⁴⁸ kono y'a dihe y'a zibbe edayi a tukki nunj ere naabadí ere umbadó ettiyo.

Eyye, ti anjki wo ki daayum duwo pay an di roota kereñ, nunj te ere ulbutú unjse,

⁴⁹ kono Raa toogo a jiire pay, a nunj te y'o ize suldi donj beehiye a jiire,

yonj sundi kamilenj.

⁵⁰ Y'isiyo adde koduwo k'eda k'inñi
a tukki donj i ottilso me.

⁵¹ Ti toogo ere pay ki beezí, y'aaze suldi donj a jiire, aakede:

Y'a ti'n tiipe kane donj an ede elkiso ere ki koliyo tuddanj gette,

⁵² kane mozagi yi ti'n gippirdfe t'ekki kaakidagan me,

wo donj i ki koliyo tuddanj ye, yi-ti'n gili t'awwa.

⁵³ Kane donj mosogo yi di'n ûune ti suldi donj majjandani,

wo donj bey y'an ilmi daa munda beezanj.

⁵⁴ Yo y'a iide noogiyo don k'Izirayel don naabadí, wo y'aaze adde koduwo a kane i-ki dunde ye.

⁵⁵ Genno munda wede Raa y'an ruute y'aasa a maawin,

a Ibirayim wo a ita k'innizí ki daayum me.»

⁵⁶ Mariyam t'a likke ti Elizabet suma tere ado, san t'a aahe boytú.

Ehiyo Zan Batis

⁵⁷ Aame Elizabet onniyatú iide k'ehiyo man, t'a t'ehe ulo. ⁵⁸ Kane don k'ita waayatú ti

taasiyagutú an di zuune Galmeega Raa yi ize adde koduwo a tod'te, wo kane ton an d'isiyo unsuwo ti tode. ⁵⁹ T'ume an ti y'ehe iide onniyo

gessire† man, kane an t'iide ulo an i di walda ponde wo an i di zaape sundí Zakari aa suma meegí. ⁶⁰ Wo man meedí t'an di ruute kere,

t'ede: «Aha, ulo an di y' waaka sundí Zan.»

⁶¹ Man kane an i di ruute, an'de: «A biza bumbugun wede sundí inkinno umbo.» ⁶² Man

an i di ruute a meegí kan dugiyko, kono an di suune ulo'n yi dehu an di y' waake wee wee?

⁶³ Yon y'a tunde pakirte, man an i d'ele wo y'a riine: «Sundí te Zan.» Kane pay gen an ziida giggiran. ⁶⁴ A kaamiki bizí a t'ihina, y'a iise ono

wo yi tamma Raa. ⁶⁵ Inkinno man kane don pay a ita waaya gen orgiso t'anni ziida, wo adda siido Ziide ere pay adda diine mongali gette, an tówwo taaya a suldi don pay ize gen me. ⁶⁶ Kane don

pay illiga suldi don ize gen, an d'elkiso eego wo an di tondiso tuddan, an'de: «San man yo ulo

† **1:59** 1.59 Kun wollo adda mattup ki Lebitik 12.3.

en y'a t'isa moo me?» Injino manj ki kotto toogo Galmeega Raa gette ti yode.

Ono donj Raa y'igibo t'urzi Zakari

⁶⁷ Zakari meek'ulo genj addi a uune ti Unde Kamilen, wo y'a iise rootiyto ki ono donj Raa y'igibo, y'ede: ⁶⁸ «Tamma a Galmeega, yonj Raa ki donj k'Izirayel, kono donji genj y'a ukko noogiyadan, yonj y'an udde.

⁶⁹ Wo a kine y'in d'uddo Wede k'Uttiyo i-d'ede toogo, ti biza bumbu ki mozigo Dawut wede naabo Raa.

⁷⁰ Enj onami donj y'a ruute ti kaaga ti bize nebiyagi donj kamilen:

⁷¹ Yi ruute y'in di'n utta ti bey donj k'aduzin wo ti bey kane donj pay in olmide.

⁷² Y'aaze adde koduwo a mongidagin, wo i ki dunde ye a taasuwadi ere kamilen yi gitte ti kane gette.

⁷³ Gette naamiya ere Raa y'a-ti niime tuddi ti mugiyin Ibirayim,

⁷⁴ y'in di'n adde ti bey donj k'adu.

Injino manj in d'oola urzi in i di naaba daa k'orgiso,

⁷⁵ kono in t'ise donj kamilen wo ki diine a daanadi me adda k'onniytagi donj pay ki lekkiyadinj gette.

⁷⁶ Wo ulo ki nun, kee k'a ozira a daana Galmeega kono ki-d'okkima urzizi, genj injino k'a t'isa nebi ki Raa goole a jiiire pay,

⁷⁷ wo k'an di kiza a donji an di suuna yonj y'an utta t'urzi tambobino k'oldikadan.

78 Eyye, Raaziŋ yonj ôoniyo t'isiyo k'adde koduwo.

Y'in ti'n tuure ti toore wede iido t'awwa, aakede toore peedo ti koliyo.

79 Yo y'a toora a tukki kane d'onj i lekkiyo adda zimolo wo d'onj i lekkiyo a biza k'olde, kono y'a dokka zoŋdɪŋ a urzi wede ki toose.»

80 T'ume geŋ miŋ ulo yi d'ohire a urzi tudde wo a urzi k'Unde Raa. Yi lekkiyo adda balda bini a iide onniyo ere tuddi y'an ti gize kereŋ a daana d'onj k'Izirayel.

2

Ehiyo k'Isa

1 Aame geŋ mozigo goole ki Romenj Ogust* yi d'ize oogoro ki kaza duwo adda siidiyagi pay d'onj Romenj ge-dokkiyo. 2 Ette kaza ere ki poone, tod' t'iise aame Kiriniyus yonj goole ki siido Siiri.

3 Donj pay an t'ette an di-kizo tuddaŋ, wede tuuku tonj yi d'aahiya ki siido k'ehiyadi k'ehiyadi. 4 Wo yode Yusup tonj y'a t'iiziga ti geeger Nazaret siido Galile, y'a ingile ki geeger Betilehem siido Ziide, ume wede an d'ehe mozigo Dawut, kono yode Yusup tonj y'udfo t'adda boy wede k'ita k'inŋi Dawut. 5 Y'a t'iide, an di-kizo kaŋ soo ti Mariyam ere k'ebirayi te, aame geŋ tod'te t'adde. 6 Koore kane a Betilehem geŋ onniyatú k'ehiyo a iide, 7 t'a t'ehe ulo ki

* **2:1** 2.1 Ogust y'iise mozikadi ti ozzine ada sire makumu gessat ki poone an t'eha Isa botto, bini ozzine koomat makumu pide, saŋ Isa an di y'ehe.

kabɓatú me. Ti di mulpite sotor, t'a ti y' duwwa a kulaaye kono ume adda biino torgagi umbo.

Maaleeka ti ɗonj k'elso

⁸ Adda siifdo gettiyo batum, i d'ede ɗonj k'elso an lekkiyo a balɗa an boohiyo maal-adañ. ⁹ Onniyo soo a didɗo mañ, maaleeka ki Galmeega Raa y'a d'iide tuddañ wo toore Galmeega Raa yi-tooriyo eedañ. Injino mañ orgiso t'an di'n ziida baadañ. ¹⁰ Wo maaleeka y'an di ruute, y'ede: «Kun orgide ye, kono kun ollo, n'un d'iido n'un di kize rabila majjaanawa aasa unsuwo baadañ a ɗonj pay, tod'te ettiyo: ¹¹ Anki adda didɗo ette adda geeger Dawut, an un ehe Wede k'Uttiyo, yonj Almasi Raa yi biire, yonj Galmeega. ¹² Enno munda wede un kizey kun di y' suuney me: kun t'ooney ulo ñenku mulpiyo ti sotor, duwwiyo adda kulaaye†.» ¹³ A kaamiki a sirpa maaleeka genj, i d'udɗo maaleekiyagi baadañ ti kandaane an tamma Raa, an'de: ¹⁴ «Tamma a Raa t'awwa a kandaane, wo a siifdo toose t'a koone a ɗonj yi giyye.»

Ettiyo ɗonj k'elso ki Betilehem

¹⁵ Aame maaleekiyagi an iili an ti gime ki kandaane mañ, kane ɗonj k'elso an d'iise rootiyto tuddañ, an'de: «Injino in t'ette Betilehem, in di wollo munda wede iido, wede Galmeega Raa y'in gize.» ¹⁶ Mañ an d'ingile an di naariya. An iiney mañ, an di dihite wo an di'n uune Mariyam ti Yusup, wo ulo ñenku duwwiyo adda kulaaye me.

† **2:12** 2.12 Kulaaye: Di Yawudiyagi an okkime k'inda, wo di kine kulaaye genj yonj ume lawiya ti garbe k'oɓe seemi a maala.

17 Aame ulo an ti y' wulle mañ, an d'iise tôwwo taaya ere maaleeka y'an ruuto kono k'ulo geñ me. 18 Wo ñoñ pay illiga geñ an di ziidfa giggirañ a rabila ere ki ñoñ k'elso gette. 19 Wo ki tode Mariyam mañ, suldi pay geñ t'a ti'n buuhe adda k'addutú, wo ti d'elkiso baadañ eego. 20 Sañ mañ ñoñ k'elso an di-gime, an di tamma Raa wo an di ruute kofuwo a yode a suldi ñoñ pay an illiga wo an wulle, kono suldi pay geñ a-t'iide aakede maaleeka y'an ruute.

Zaapu suma a Isa

21 T'ume an ti y'ehe iide onniyo gessire mañ, ulo an i-di wilda ponde, wo yoñ an i-di ziipe sundi Isa aa maaleeka y'a ruute, ti poone meedi t'a seeda mahuwe botto.

Isa ti maawí adda booro Boy Raa

22 Sañ mañ onniyo t'a iide ere añ Yusup ti eddi Mariyam an ti t'ise tuddañ kamileñ a ñaana Raa, aakede oogoro Muusa ti rootiyo‡. Injino mañ ulo an t'umbe k'adda booro Boy Galmeega Raa a geeger Zeruzalem, kono an i-ti y' zaapey a ñaanadi. 23 An ize injino a-t'iide a ono ñoñ an riine ti kaaga adda mattup k'oogoro Galmeega Raa, an'de: «Inni kuuli ñoñ pay ki kabba geñ, kane kun i di'n ooye kese a Galmeega RaaŒ.» 24 Wo soñ kane maawí an d'ise sedeke ere tode oogoro gettiyo batum ti rootiyo, t'ede: «An di sedde deere sire ere ki balda umbo ere ki moddiyo toñ sire wo inni*.»

‡ 2:22 2.22 Kun wollo adda mattup ki Lebitik 12.3,6. § 2:23

2.23 Kun wollo adda mattup ki Egzod 13.2. * 2:24 2.24 Kun wollo adda mattup ki Lebitik 12.8.

²⁵ A Zeruzalem geŋ i d'ede wede inċino sundí Simeyoŋ, yoŋ wede ki diine wo y'orgiso a Raazí, yi delliyo wede y'a utta đoŋ k'Izirayel. Unde Kamileŋ ti yode ²⁶ wo tod' ti di t'iidiba ita ki poone, t'ede: «Kee ki ki t'inda ye, daa ki ki wulla Almasi Galmeega Raa yi biire geŋno ye maŋ.» ²⁷ Inċino maŋ t'urzi k'Unde Raa, Simeyoŋ y'a t'iide k'adda booro Boy Raa aame Isa maawí an ti y'umbo, kono an d'ise munda wede aa oogoro ti rootiyo. ²⁸ Maŋ Simeyoŋ y'a t'umbe ulo a beezi wo yi tamma Raa, y'ede:

²⁹ «Ankeŋno eŋ Galmeega Raa, kee onamá đoŋ ki ruute a t'iide,

nunċ wede naabadá ki n'oolo n'a t'inda ti toose.

³⁰ Ki kotto ni y' wulle t'edayó wede k'igibo a utta đuwu me,

³¹ yode wede k'igibo đuwu pay an di y' wolla.

³² Yoŋ geŋ toore, wede a kiza a đoŋ Yawudiyagi ye an di suuna kee Raa,

wo t'urzi yode geŋ đuwu an di t'imma đoŋ k'Izirayel.»

Ono đoŋ Raa y'igibo t'urzi Simeyoŋ

³³ A ono đoŋ Simeyoŋ yi rootiyo a tukk'ulo geŋ, kane maawí an ziida giggiraŋ. ³⁴ Simeyoŋ y'an di ziipe beeko, wo yi di ruute a Mariyam meek'ulo, y'ede: «Koŋ m'ollo, ulo eŋ Raa yi ziipo y'a koona urzi wede đoŋ baadaŋ adda siido k'Izirayel an di dagga, wo đoŋ oŋgoŋ an t'oona uttiyo. Wo yoŋ y'a koona munda wede a kiza Raa a đuwu, wo kane an di y' kiigira. ³⁵ Inċino maŋ elkiso

ere ombiɗe adda k'adde ɗoŋ baadaŋ gette y'a-t'ooraa kereŋ, wo koŋ Mariyam dabar t'a ki'n seeda baadaŋ aa an ki'n giira ti kasigara.»

Nebi erewo sundutú An

³⁶ I d'ede soŋ nebi erewo sundutú An uto ki Peenuwel, tode gette ti biza bumbu k'Aser. Tod' ti gûulike baa. Ti kule wede ti ziida ki koŋsuwatú geŋ, an di likke ozzine sarat ɗaŋŋal, maŋ y'a inda. ³⁷ T'ume geŋ t'a likke mandaayawa bini ozzinagutú a îide ada gessire makumu piɗe. Ti booro Boy Raa ti ki ɗekkiyo ye, ti naabiya ɗiɗɗo oŋŋu a Raa me, onniyo muno ti lekkiyo daa k'ombo wo ti tonɗiyo Raa. ³⁸ Aame Simeyoŋ yi rootiyto geŋ, tode toŋ maŋ t'a d'iiney wo t'a iise tamma Raa. Wo ti tôwwo taaya k'ulo a ɗoŋ Zeruzalem pay, ɗoŋ i delliyo Raa y'an aɗɗa ti dabaradaŋ.

Kama ki Nazaret

³⁹ Aame kane maawi k'Isa an t'ize pay sulɗi ɗoŋ oogoro Galmeega Raa ti dehu an d'ise me maŋ, an di-gime ti ulaŋ ki Nazaret geeger ere an di lekkiyo adda siidɗo Galile. ⁴⁰ Wo ulo geŋ yi d'ohire a urzi tudde wo a urzi k'Unde Raa, eedí ôoniyo ɓoo ti suuniyo k'ono, wo beeko Raa a eedí.

Ettiyo k'Isa ki Zeruzalem ti maawí

⁴¹ Ozzine ti ozzine maawi k'Isa an di-koliyo ki Zeruzalem kono an d'isiyo tarnaape Pak ki Yawudiyagi. ⁴² Wo aame Isa i îide ozzine koomat

makumu sire[†] maṅ, maawí an ti y' wiike ti kane ki Zeruzalem, aa oogoro ki tarnaape ti rootiyo. ⁴³ Aame onniyto tarnaape i t'ingile maṅ, kane an di-gime, wo yo ulo Isa y'a uupe a Zeruzalem, maawí an ki suune ye. ⁴⁴ Kane an elkiyo ulo'ṅ ti doṅ an ziiḍo urzizaṅ soo. Injino aame an izire bini peeḍo t'ette k'ooriyo maṅ, an d'iise dehuzí adda diine taasiyagaṅ ti laṅziyagaṅ. ⁴⁵ Umbo an ki y'uune ye, maṅ an di dehutu an di-gime ki Zeruzalem. ⁴⁶ Onniyo sire k'aduwe maṅ, an di y'uuno adda booro Boy Raa, yi-guune adda diine doṅ suuniyo k'oogoro, yi'n ollige wo yi di'n tondiyto. ⁴⁷ Wo kane doṅ pay i y'ollige an ziiḍa gaggiraṅ a eedí soodo a elkiso ere i-d'ede, ti kama k'ono doṅ y'anni kama geṅ me. ⁴⁸ Kane maawí an yi wulle maṅ, an ziiḍa gaggiraṅ wo meedí ti di ruute, t'ede: «Ulo ki nuṅ, k'isiyo kino moo me a kaye maawá me? Ki wollo, nuṅ ti meegá ay ki dehutu eṅ undey i t'udde.» ⁴⁹ Yoṅ y'an di ruute, y'ede: «De kun ni dehutu injino moo me? Kun ki suune ye ko, i dehu nuṅ n'a lekke adda Boy Meegó me?» ⁵⁰ Wo kane eedaṅ ti ki seedfu ye onamí doṅ y'an rootiyo geṅ me.

⁵¹ Saṅ maṅ y'a t'iiziga, an di-dfiige ki Nazaret ti maawí soo. Yo yi d'ollige onamaṅ, wo meedí gette sulḍi doṅ pay ize geṅ ti di'n boohiyo addutú. ⁵² Isa geṅ yi d'ohire a urzi tudde, a urzi suuniyo k'ono, ti beeko a dfaana Raa wo a dfaana dfuwo pay.

[†] **2:42** 2.42 Ozzine koomat makumu sire: I-kaza ki kane Yawudiyagi wede i fiide ozzine injino maṅ, y'aane y'a naabe ki Raa.

3

Zaŋ Batis wede zina Raa
(*Matiye 3.1-6; Markus 1.1-6*)

¹ Kun ollo, t'ume Tiber yoŋ mozigo goole ki Romen, wo îide ozzine koomat makumu paat maŋ, goole ki siido Ziide sundí Pons Pilat. Goole ki siido Galile sundí Erod Antipas, leemadí Pilip yoŋ goole yi dokkiyo siido k'Iture ti siido Tirakoni. Goole ki siido k'Abilen sundí Lizaniya, ² wo mozagi deero d'oŋ sedeke sumbiyagaŋ Anne ti Kayip. A ozzine geŋ Raa yi-d'ele onamí a Zaŋ ulo Zakari, aame yi lekkiyo adda balda. ³ Wo yo Zaŋ geŋ yi soorutu adda siidiyagi d'oŋ pay a biza k'ooye Zurden, yi kazita yi d'eesiyo: «Kun ti kama lekkiyagaŋ, an un ti'n suyyo batem wo Raa y'un t'isa tambobino a oldikagaŋ te.»

⁴ Geŋ a-t'iide a ono d'oŋ nebi Ezayi yi riine ti kaaga adda mattupadí, y'ede:
«Doŋ an d'ollige golla ki wedusu yi d'ollite adda balda, yi d'eesiyo:

Kun i t'okkoŋ urzi Galmeega,
erkiyagi kun i ti'n okkoŋ ki diine delele.

⁵ Poldagi kun ti'n ôono pay,
moŋgali ti kessagi pay kun di bursidito,
urzi guudiyto kun ti y'ahan delele,
wo urzi wede moŋgali toŋ kun ti y'iso patal.

⁶ Inŋkino d'uwu pay an di y' suuna urzi k'uttiyo
wede Raa y'an ele me*.»

⁷ A d'oŋ duuru i dihimo ki tukki Zaŋ y'a ti'n suyye batem geŋ, y'an di rootiyo, y'ede: «Kune

* **3:6** 3.6 Kun wollo adda mattup ki Ezayi 40.3-5.

ɗoŋ ulpi aakede maŋkikagi! Wee wee un gize urzi wede kun t'alda ti booro ki Raa ere ettiyo goppon te? ⁸ Inkinno maŋ kun iso naabo ere beehiye, geŋ a kize kun ti gime lekkiyaguŋ. Wo kun roote ye adda k'adduguŋ: "Kaye mugiyey Ibirayim me", kono kun t'alda ti booro Raa te. Wo kun ollo, n'un di rooto: Ti moŋgali eŋ miŋ, Raa y'aane yi d'adde ɗuwo a t'ise ita k'inŋi k'Ibirayim me. ⁹ Ankeŋno booro Raa i guute goppon, tod'te aa wede yi t'umbe ulpaasi y'a-dokkida inda ti sondayzaŋ pay: Undumu tuuku yi k'ehiyo inŋi beehiye ye maŋ, an di-ɗekka an di seɗɗa adda k'uwwu mendí.»

¹⁰ Inkinno maŋ kane ɗoŋ duuru Zaŋ an di y' tunde, an'de: «De ay d'ise mummino me?»

¹¹ Maŋ y'an di ruute, y'ede: «Aame wede i-d'ede kallagi sire maŋ, soŋ yi elo a wede i-k'ede ye. Aame wede i-d'ede ombó maŋ, y'an ti dooko ti wede i-k'ede ye.»

¹² A ume geŋ i d'ede ɗoŋ seɗɗu jibaaye toŋ an iido y'a ti'n suyye batem, wo Zaŋ an di y' tunde, an'de: «Wede dooyisadey, ay d'ise mummino me?» ¹³ Maŋ yoŋ y'an di ruute, y'ede: «Kune a munda wede an un ɗikke geŋ, ti doolo kun a amba ye.»

¹⁴ Inkinno asigiryagi toŋ an di y' tunde, an'de: «Wo ɗe kaye me, ay d'ise mummino?» Yoŋ y'an di ruute, y'ede: «Munda wedusu kun ambe ki toogo ye, ise ombó bize ti suma ɗuwo toŋ ulu, ulbuguŋ iso unse a ranŋaguŋ.»

*Kaza ki wede ettiyo k'ita
(Matiye 3.11-12; Markus 1.7-8)*

¹⁵ Kane d'ɔŋ duuru geŋ an di delliso wo an di zaapu elkisadaŋ ekki yode, wede tuuku toŋ yi rootiyo adda k'addí a urzi Zaŋ geŋ me, an'de: «Kunuŋ eŋ miŋ aasa Almasi Raa yi biire ko?»
¹⁶ In'kino maŋ Zaŋ y'an di ruute a kane pay, y'ede: «Nuŋ n'unni suyyiso batem t'ahu, wo de wede ettiyo k'ita geŋ yoŋ toogo yi jiiire nuŋ, ni k'iide n'a ki t'eeze sibe tobiyagí ye. Yoŋ y'unni suyya batem t'Unde Kamileŋ wo ti uwwo. ¹⁷ Wo yoŋ y'a deŋka booro aakede wedusu yi t'umbo munda ki solde a beezí, y'a silda koduwo, in'ni yi-t'oba giiyayí, wo odfo y'a t'ogga mentú adda k'uwwó ere i k'unto ye.»

¹⁸ A d'ɔŋ duuru Zaŋ y'an d'eele kooke ti doolo toŋ baadaŋ. Geŋ in'kino y'an di kazita urzi Rabila Majjaanawa me. ¹⁹ Wo aame geŋ Erod wede i dokkiyo siido Galile, Zaŋ y'a y'iipide kono yi ziida ere leemadi sundutú Erodiyas, wo kono soŋ y'ize suldi d'ɔŋ ulpi baadaŋ ti doolo. ²⁰ Wo t'ekki suldi d'ɔŋ pay ulpi Erod y'ize geŋ, Zaŋ y'a-ti y' ziida dan'gay.

Suyyiso batem k'Isa
(Matiye 3.13-17; Markus 1.9-11)

²¹ Doŋ pay Zaŋ yi ti'n zuyye batem maŋ, Isa toŋ y'a-ti y' zuyye batem. Wo aame Isa yi ton-diyo Raa geŋ, kandaane a t'ihina, ²² wo Unde Kamileŋ t'a d'iigo a tuddí, ti tudde ere aa deere. Wo golla t'a ruute ti kandaane, t'ede: «Kee ulo nuuno, ni ki giyye baadaŋ, ulbó unse ti kee me.»

Ita moŋgid'agi k'Isa
(Matiye 1.1-16)

²³ Aame Isa i ñide suma k’ozzine ada g’aḍo maṅ, y’a iise kazita Rabila Majjaanawa. Aa in di rootiyo yoṅ ulo ki Yusup, geṅ ita moṅgidagi ettiyo: Yusup yoṅ ulo k’Eli, ²⁴ Eli ulo ki Matat, Matat ulo ki Lebi, Lebi ulo ki Melki, Melki ulo ki Yanay, Yanay ulo ki Yusup, ²⁵ Yusup ulo ki Matatiyas, Matatiyas ulo ki Amos, Amos ulo ki Nahum, Nahum ulo ki Esili, Esili ulo ki Nagay, ²⁶ Nagay ulo ki Maat, Maat ulo ki Matatiyas, Matatiyas ulo ki Simeyin, Simeyin ulo ki Yosek, Yosek ulo ki Yoda, ²⁷ Yoda ulo ki Yohanan, Yohanan ulo ki Resa, Resa ulo ki Zorobabel, Zorobabel ulo ki Salatiyel, Salatiyel ulo ki Neri, ²⁸ Neri ulo ki Melki, Melki ulo ki Addi, Addi ulo ki Kosam, Kosam ulo ki Elmudam, Elmudam ulo ki Er, ²⁹ Er ulo ki Zozuwe, Zozuwe ulo ki Eliyezer, Eliyezer ulo ki Yorim, Yorim ulo ki Matat, Matat ulo ki Lebi, ³⁰ Lebi ulo ki Simeyoṅ, Simeyoṅ ulo ki Ziida, Ziida ulo ki Yusup, Yusup ulo ki Yonam, Yonam ulo ki Eliyakim, ³¹ Eliyakim ulo ki Meleya, Meleya ulo ki Menna, Menna ulo ki Matata, Matata ulo ki Natan, Natan ulo ki Dawut, ³² Dawut ulo ki Zeese, Zeese ulo ki Ibet, Ibet ulo ki Booz, Booz ulo ki Sala, Sala ulo ki Nason, ³³ Nason ulo ki Aminadap, Aminadap ulo ki Adimin, Adimin ulo ki Arini, Arini ulo ki Eziron, Eziron ulo ki Pares, Pares ulo ki Ziida, ³⁴ Ziida ulo ki Yakup, Yakup ulo k’Isaaka, Isaaka ulo k’Ibirayim, Ibirayim ulo ki Tera, Tera ulo ki Nahor, ³⁵ Nahor ulo ki Serug, Serug ulo ki Regu, Regu ulo ki Pelek, Pelek ulo ki Eber, Eber ulo ki Sala, ³⁶ Sala ulo ki Kenan, Kenan ulo ki Arpazad, Arpazad ulo ki Sem, Sem ulo ki Nowe, Nowe ulo

ki Lemek, ³⁷ Lemek ulo ki Matusalem, Matusalem ulo ki Enok, Enok ulo ki Yered, Yered ulo ki Malaleyel, Malaleyel ulo ki Kenan, ³⁸ Kenan ulo ki Enos, Enos ulo ki Set, Set ulo ki Adum, Adum ulo ki Raa.

4

Naamiya daggiya k'Isa (Matiye 4.1-11; Markus 1.12-13)

¹ Isa yi kama ti biza k'ooye Zurden ôoniyo t'Unde Kamilen, man Unde Raa gette t'a-di t'iide k'adda balda. ² A ume geŋ Meeda siitandani t'a yi niime daggiya adda k'onniyo ada pife geŋ me. Adda k'onniytagi geŋ yon y'a likke daa k'ombo, wo aame onniytagi geŋ an t'ingile man, mosogo t'a yi ziida. ³ Inkino man Meeda siitandani ti di ruute, t'ede: «Aame kee Ulo Raa kotto man, k'elo urzi a mukkolo ette t'a-kime ombô.» ⁴ Isa yi di'n gime onamtú, y'ede: «Kon te m'ollo, ono en an riije ti kaaga adda mattup ki Raa, an'de: "Lekkiyo wedusu, tod'te t'urzi k'ombo bizi danjal ye*."»

⁵ Man Meeda siitandani t'a-di t'iide k'ekki mukkolo sohoro, wo a kaamiki ita moziko pay ki duniya ti di gizite, ⁶⁻⁷ wo ti di ruute, t'ede: «Aame ki-dikka wo k'o uttila man, n'a di t'ela a kee toogo ti laale wede ki moziko pay ette, kono kane pay en an oo n'ele a nuŋ, wo ni-t'ele a wede aa ni dehu.» ⁸ Man Isa yi di ruute, y'ede: «M'ollo, ono en an riije ti kaaga adda mattup ki Raa,

* **4:4** 4.4 Kun wollo adda mattup ki Deeterenom 8.3.

an'de: "Kee k'ottilo a Galmeega Raazá, wo gen a yode d'anjál ki naabo me†."»

⁹ Sañ mañ Meeda siitandani t'a-di t'iide Zeruzalem t'a-ti y' ziipe t'ekki Boy Raa a ume wede awwa, wo ti di ruute, t'ede: «Aame kee Ulo Raa kotto mañ, t'awwa gen k'oldi k'a zabba siido, ¹⁰ kono ono en an riije ti kaaga adda mattup ki Raa, an'de:

"Raa y'an di roota maaleekiyagi kono kee, an gi di booha."

¹¹ Wo soñ an riije, an'de:

"an gi di seeda beezañ, kono k'a t'alda zoñdá a ki t'oggo ekki mukkolo ye‡."»

¹² Isa yi di ruute, y'ede: «M'ollo, ono en an riije ti kaaga adda mattup ki Raa, an'de: "Kee Galmeega Raazá ki y' naame ye§."» ¹³ Injino aame Meeda siitandani ita naamiya daggiya ere tuuku toñ pay ti ti d'inge mañ, t'a t'irga ti tuddi bini onniyo ere ti t'oona ti doolo.

*Naabo k'Isa a siido Galile
(Matiye 4.12-17; Markus 1.14-15)*

¹⁴ Isa gen ôniyo ti toogo k'Unde Kamilen y'a-gime ki siido Galile, wo sundi t'a îile adda siido pay gette. ¹⁵ A ume gen yi dooyisito adda boydi don Yawudiyagi ge dooyiso, wo don pay an di y'tamma.

*Don Nazaret an koogire Isa
(Matiye 13.54-58; Markus 6.1-6)*

† **4:8** 4.8 Kun wollo adda mattup ki Deeterenom 6.13. ‡ **4:11** 4.11 Kun wollo adda mattup ki Soom 91.11-12. § **4:12** 4.12 Kun wollo adda mattup ki Deeterenom 6.16.

¹⁶ Isa y'a t'iiziga, y'a ingile ki Nazaret geeger ere y'a ihira. A onniyo ere ki puukiyo Yawudiyagi mañ, aa daayum yi d'isiyo yi-t'iide adda boy wede Yawudiyagi ge dooyiso, mañ y'a t'iiziga y'an di gare mattup ki Raa ere ti kaaga.

¹⁷ An i d'ele mattup lobide ki nebi Ezayi. Aame yi t'ihina mañ, yi d'uune ume wede an riñe, an'de:

¹⁸ «Unde Galmeega Raa ti konso a eedó, yoñ yi ni biire kono n'a kizite Rabila Majjaanawa a ñoñ an k'ede munda ye.

Y'a n'igibe kono n'a kizite a ñoñ an zidfo bulagi an t'adfe,

a ñoñ konzayi edayan a-t'ihina an di wolle kereñ, wo a ñoñ an an oodibe yeebadan an t'adfe ti dabaradan te,

¹⁹ kono n'an di kize ozzine wede an di wolle beeko Galmeega Raa*.»

²⁰ Aame yi ñinge gariya mañ, mattup y'a-t'ilbifa umatú, yi-di t'ele a wede i naabiya adda boy genño, yoñ y'a-guune. Wo ñoñ pay adda boy gen edayan ki tukki yode. ²¹ Injino mañ y'an d'iise rootiyo, y'ede: «Anki batum ono ñoñ an riñe ti kaaga adda mattup ki Raa ñoñ kun illiga en, a t'iide a kune.»

²² Doñ pay an di y'imme, an ziida giggeran a ono ñoñ majjandani udfé ti bizí gen me, wo an di rootiyo, an'de: «Yo en ulo Yusup de me!»

²³ Mañ Isa y'an di ruute, y'ede: «Ki kotto n'elkiyo kune kun o roota ono ombide enño, kun t'eesa: “Wede daawiya no, ki daawo tuddá fo.” Wo kun o di roota soñ: “Kaye ay y'illiga sulfi ñoñ pay kee k'izo a geeger

* **4:19** 4.19 Kun wollo adda mattup ki Ezayi 61.1-2.

Kapernayim me, wo a enno adda siifadá ton k'iso suldi don inkinno kay."» ²⁴ Wo y'a ruute sey, y'ede: «Derec inkinno wo n'un di rooto: Nebi gen don a geeger ere y'a ihira danjal, onami an k'olliga ye me. ²⁵ Derec inkinno wo n'un di rooto: Ti kaaga a ozzinagi ki nebi Eli gen, ozzine ado ti gootiyo mizzi yi ki guppe ye, i d'ize mosogo baadan adda siido pay. A ozzine gen mandaydayi baadan a siido k'Izirayel me, ²⁶ wo ton nebi Eli Raa yi ki y'igibe ye, y'a nooge ere soo ti diine kane gen me. Y'a y'igibe k'ume mandaayawa ere soo Yawudowo ye ti lekkiyo a Sarepita adda siido ki Sidon†. ²⁷ Son a ozzinagi ki nebi Elize gen, i d'ede don bintidagi baadan a siido k'Izirayel me, wo ti diinayan wenda soo ton i k'ize ye kamilen me, a t'ize kamilen Naama danjal yon ti siido Siiri‡.»

²⁸ Aame an illiga onami inkinno man, kane don pay i t'ugiyee adda boy wede Yawudiyagi ge dooyiso gen, an di gulkuwe baadan. ²⁹ Man kane an t'iiziga, Isa t'adda geeger an di y'udde, an di-t'iide neere tokomo ere gegirzan eego, kono Isa an ti y' kibiro k'ekki zire. ³⁰ Wo yon yi t'udde ti diinayan, y'a zidfa urzizi y'a ingile.

Isa yo a Kapernayim

(Matiye 7.28-29; Markus 1.21-28)

³¹ Inkinno man Isa y'a-diiige ki Kapernayim geeger ki siido Galile. A onniyo ere ki puukiyo Yawudiyagi man, duwo yi di'n dooyiso, ³² wo

† **4:26** 4.26 Kun wollo adda mattup ki 1 Mozagi 17.1,8-16. ‡ **4:27** 4.27 Kun wollo adda mattup ki 2 Mozagi 5.1-14.

kane dooyisadí gette t'an di'n ziidfa, kono yi dooyiso ti toogo suuniyo ere ki yode batum. ³³ Adda boy wede Yawudiyagi ge dooyiso geŋ i d'ede wedusu i-d'ede siitan a eedí, y'a idili ti golla awwa, y'ede: ³⁴ «Wayya Isa wede ti geeger Nazaret no, ki dehu moo me a tukki kaye me? Ay suune kee k'iido kono k'ay di'n dagge. Kee nuŋ ni ki suune, kee Wede Kamileŋ Raa y'igibo.» ³⁵ Maŋ Isa yi di ruute ti golla zakidí, y'ede: «Koŋ m'a t'appa bizí wo mi t'adfo ti tukki wede me.» Wede geŋ siitan t'aa diiŋe siido a diinayan wo t'a t'udfe ti tuddí, ti-k'ize munda ulsu ye. ³⁶ Kane doŋ pay orgiso t'anni ziidfa wo an d'iise rootiyto ti tuddaŋ, an'de: «Urzi k'ono doŋ kino eŋ miŋ mummino me! Wede eŋ t'urzi wede an i ele wo ti toogo ere i-d'ede gette, siitandani y'an di rootiyo an t'adfe, wo an t'adfiya.» ³⁷ Wo Isa sundí ti mōolo adda siido gette pay.

*Eliyo beeko a doŋ k'eeni baadaŋ
(Matiye 8.14-17; Markus 1.29-34)*

³⁸ Isa geŋ t'adda boy wede Yawudiyagi ge dooyiso yi-t'udfe, y'a t'iide daŋ Simo. Aame y'iiney maŋ yi-t'uuney ande Simo i-ti d'iire girgir, wo an tunde Isa, an'de: «Erewo ette mummino ki iso!» ³⁹ Maŋ Isa y'aa d'uttile ki tuddutú, wo y'a ruute ti golla zakidí a ooriyo t'a t'ooli. A kaamiki ooriyo t'a t'iili, tod' t'a t'iiziga wo t'an d'iise naabiya.

⁴⁰ A peedo t'a t'iire maŋ, kane doŋ pay an d'ede doŋzaŋ eeni wede tuuku toŋ t'ita k'eenizí k'eenizí geŋ, an i di ziko a Isa. Yoŋ a wede tuuku toŋ yi di zaapu beezí beezí, wo kane an d'ooniyo

bee. ⁴¹ Injino kane siitandani ton an t'addiyta kay ti tukki don baadan kan dollite, an d'eesiyo: «Kee Ulo Raa! Kee Ulo Raa!» Wo yo Isa y'an di rootiyo ti golla zakidi wo y'an k'ooliyo urzi an ki d'orba ye, kono kane an yi suune yon Almasi Raa yi biire me.

*Engilso k'Isa ki siido Ziide
(Matiye 4.23; Markus 1.35-39)*

⁴² Aame ume i t'umpile man, ti Kapernayim Isa y'a t'udde y'a injile k'adda balda. Kane don duuru an di y' dehu. Aame an y'uune man, kane an dehu y'a lekke a sirpandan wo an di y'eegire yi ki'n ooli ye. ⁴³ Wo Isa y'an di ruute, y'ede: «A geegiryagi don ti doolo ton, i dehu n'an kizite Rabila Majjaanawa ki Moziko Raa t'iina, kono yi n'igibo min k'injino.» ⁴⁴ Man adda siido Ziide yi kazita adda boydi don Yawudiyagi ge dooyiso.

5

*Sanalliyagi k'Isa don ki poone
(Matiye 4.18-22; Markus 1.16-20; Zan 21.1-11)*

¹ Onniyo soo Isa yon a biza bar ki Zenezaret, wo kane don duuru an di-t'ugiye, an di naayu ti tuddan kono an dehu an d'olliga ono Raa. ² Man a biza gen yi wulle tookiyagi sire, don sawwiya an ti diggite an opilsito lembidagan. ³ Isa gen yi di gili adda tooko ere soo, tod'te ki Simo, wo yi di ruute a yon, y'ede: «Ti zenge k'in odo k'adda k'ahu boolon.» Aame an a iide k'adda man, Isa y'a-guune ekki tooko wo y'a iise dooyiso don duuru.

⁴ Aame y'a ti dɛnge dooyisadɛ maɲ, yi di ruute a Simo, y'ede: «Kun a odo k'adda mohita gettiyo, wo kun ti kakko lembidagaɲ, kun sawwoy puuni.» ⁵ Maɲ Simo yi di'n gime onamɛ, y'ede: «Wede dooyiso, didɛdo ette kaye ay niite bini bini toɲ, munda ay k'uune ye, wo a onamɛ geɲ kaye ay di-kakke lembidagey me.» ⁶ Aame an ti gikke maɲ, an di ziki puuni lembidagaɲ bokbok aa a sittite. ⁷ Inkinno maɲ kane an d'umbe beezan, i-kaza lanziyagan dɔɲ adda tooko ere ti doolo an t'okko noogiyadan. Kane an iido maɲ, ti kane pay an t'ũunite bokbok ti puuni tookiyagi sire geɲ aa i di sooyite. ⁸ Aame Simo Piyer yi wulle inkinno maɲ, y'a-dikke a dfaana k'Isa wo y'a ruute, y'ede: «Galmee'ki nuɲ, k'a ledɛdo ti tuddo me, kono nuɲ wede k'oldiko.» ⁹ Yi rootiyo inkinno kono yode ti dɔɲ a itadɛ pay orgiso t'anni ziida baadan, a baadika puuni dɔɲ an ziki geɲ me. ¹⁰ Wo Zak ti Zaɲ inɲi Zebede, kane dɔɲ naabadan kaɲ soo ti Simo me, toɲ inkinno kay orgiso t'anni ziida. Wo dɛ Isa yi di ruute a Simo, y'ede: «Kee k'orgide ye, ti anki eɲ k'a t'isa wede dehu duwo an d'etto k'urzizɔ.» ¹¹ Inkinno aame ti tookiyagan an iiney biza zenɛge maɲ, sulɛizan pay an d'iili geɲɲo, an di diine Isa.

Eliyo beeko a wede bitide

(Matiye 8.1-14; Markus 1.40-45)

¹² Onniyo soo Isa yi t'iide k'adda geeger soo ki siido Galile, a ume geɲ i d'iido wede bitide tuddɛ risimik. Aame yi wulle Isa maɲ, y'a t'uttille zumayɛ a siido, wo y'a yi tunde, y'ede: «Galmee'ki nuɲ, ki dehu maɲ, k'o eli beeko n'a

t'ise kamilenɗ a ɗaana Raa.» ¹³ Maɗ Isa y'a igibe beezí, y'a yi butte wo y'a ruute, y'ede: «Nuɗ ni dehu, ki t'iso kamilenɗ!» A kaamiki bitidayí a ɗukkide. ¹⁴ Wo Isa yi di ruute, y'ede: «K'ollo koduwo, a munda wede ize eɗ, a wenda soo toɗ ki rootey ye! Wo ɗe k'odo deddet, ki-ti kazoy tuddá a wede sedefe y'a ki ti wolley, wo k'a eloy munda ki sedefe a kize ki t'ize kamilenɗ aa Muusa y'a ruute adda k'oogoro in d'ise*, kono ɗoɗ pay an di wolle kee k'uune bee.» ¹⁵ Aame geɗ rabila k'Isa ti-teepiyo ki teepiyo, wo ɗoɗ baadaɗ an d'ettiyo ki tuddí kono an d'ollige onamí wo an d'ooniyo beeko k'endanzaɗ. ¹⁶ Wo yo Isa yi t'argu k'adda balda kono yi-tondiyo Raa.

*Eliyo beeko a wede ruɗguyun
(Matiye 9.1-8; Markus 2.1-12)*

¹⁷ Onniyo soo Isa yi dooyiso ɗuwo. Kane Pariziyen ti ɗoɗ suuniyo k'oogoro, an iido ti illiyagi ɗoɗ pay ki siido Galile, ki siido Ziide, wo ki Zeruzalem, an di-guune a sirpadí. Wo toogo Galmeega Raa ti yode, ti-d'eliyo urzi y'an d'eliyo beeko a ɗoɗ k'eeni. ¹⁸ Aame geɗ i d'iido ɗuwo an d'umbo wede ruɗguyun ti zaade, an dehu an ti y' t'ele k'adda boy an ti y' zaape a ɗaana k'Isa. ¹⁹ Wo kono ɗuwo baadaɗ geɗ urzi an ti y' t'ele k'adda boy umbo, in kino maɗ an a-ti gili t'ekki boy geɗno, an d'ihina buldo, ruɗguyun an ti y' zuuye ti zaadáyí pây a diine ɗoɗ duuru a ɗaana k'Isa. ²⁰ Isa yi wulle kane an ziipe addaɗ a yode maɗ, aame geɗ y'a ruute, y'ede: «Oldikadá n'a

* **5:14** 5.14 Kun wollo adda mattup ki Lebitik 14.1-32.

y' t'ize tambobino.» ²¹ Mañ kane ñoñ suuniyo k'oogoro ti Pariziyen, an d'elkiso adda k'addañ, an'de: «Yo wede en min wee wee yi kaldita suma Raa inkinno me? Wee wee aane aase tambobino a oldiko wede, daa ki Raa siidí ye mañ?» ²² Isa elkisadañ y'a ti zuune wo y'an di ruute, y'ede: «Ki moo me kun d'elkiso adda k'addugun inkinno me? ²³ Ise laylay a jiiire min too me a nuñ n'a roote: "Oldikadá Raa y'a y' t'ize tambobino†" kunuñ, n'a roote: "Ki t'oozo wo k'a oziro‡" me? ²⁴ Wo ni dehu kun di suune, nuñ wede an n'ehe aa ulo wede en, adda duniya ette o d'ede toogo k'isiyo tambobino a oldiko.» Mañ yi di ruute a wede runguyun, y'ede: «Nuñ n'a di rooto, ki t'oozo, ki t'ambo zaadayá, k'a aaho boozá.» ²⁵ A kaamiki geñ wede y'a t'iiziga a ñaana ñuwo pay, y'a t'umbe zaadayí wede yi moone eego, wo y'a aahe boozí yi tamma Raa. ²⁶ Kane ñoñ pay geñ an ziidá giggerañ wo an tamma Raa. Ti orgiso baadañ adda k'addañ an di rootiyo, an'de: «Anki kaye ay wulle suldi ñoñ ki k'aane ki ki ti'n roote ye!»

Waaku Lebi
(*Matiye 9.9-13; Markus 2.13-17*)

²⁷ Sañ mañ tin geñ Isa y'a t'udde wo yi wulle wede seddu jibaaye sundí Lebi, yi-guune a ume naabadí yi seddu jibaaye. Isa yi di ruute, y'ede: «Ki ni daani.» ²⁸ Mañ yon y'a t'iiziga, suldzí pay yi d'iili, wo y'a yi diine. ²⁹ Lebi yi d'ize ombo

† **5:23** 5.23 Oldikadá Raa y'a y' t'ize tambobino: I-kaza munda wede ñoñ duuru t'ersadañ an ki y' wolle ye. ‡ **5:23** 5.23 Ki t'oozo wo k'a oziro: I-kaza munda wede ñoñ duuru an di wolle t'ersadañ.

baadan a boozí a suma k'Isa, i d'ede don seddu jibaaye baadan wo don ti doolo ton ede, an diguune ombo ti kane kan soo. ³⁰ Kane Pariziyen ti don suuniyo k'oogoro a diinayan an d'orbe sunni sunni, an an di ruute a sanalliyagi k'Isa, an'de: «Ki moo me kun d'ombo wo kun di sobo ti don seddu jibaaye wo ti don k'oldiko ongo me?» ³¹ Man Isa y'an di'n gime onaman, y'ede: «Kane don waalin an ki y' dehe ye wede daawiya me, wo i yi dehe don k'eeni. ³² Nun ni k'iido'ng waaku kane don ki diine ye, wo de n'iido'ng waaku kane don k'oldiko kono an di-kime lekkiyadan.»

Tondiyo a urzi lekkiyo onniyo muno daa k'ombo

(Matiye 9.14-15; Markus 2.18-20)

³³ Kane Pariziyen an i di ruute a Isa, an'de: «Sanalliyagi ki Zan ti don ki kaye, onniyo muno an di lekkiyo daa k'ombo wo an tondiyo Raa, wo kacin kane sanalliyaga an d'ombo wo an di sobo me.» ³⁴ Isa y'an di ruute, y'ede: «Kun elkiyo min duwo don an'ni wiiko a tarnaape ki seedu, kun di'n ise ki toogo an di lekke daa k'ombo ko, aame kule k'ere yon a sirpandan gen me? Aha, injkino ye! ³⁵ Wo san onniytagi an d'aana, aame kule k'ere ti diinayan an ti y'umba man. A onniytagi gen kane onniyo muno an di lekka daa k'ombo kollo.»

Sulfi don mazzini ti don aware

(Matiye 9.16-17; Markus 2.21-22)

³⁶ Isa y'an di ruute ono ombide enno sey, y'ede: «Beehiye ye wenda yi sitte buude kalle aware kono y'a-t'obbira ekki kalle mazzini me,

para mañ kalle wede aware ki ti y' zitto wo buude kalle wede aware ki zitto'ñ geñ, ti kalle mazzini an ki t'okkiya ye. ³⁷ Wo beehiye ye wenda yi t'eepe toote k'inñi biñ wede oozige botto adda riitile wede mazzini me, para mañ toote wede oozige botto geñ y'a-batte riitile, toote a t'obi siido wo riitile a latte pây. ³⁸ Ki too mañ i dehu toote wede oozige botto geñ eepiyadí adda riitile wede aware. ³⁹ Geñ wede tuuku yi t'iibe toote wede iine mañ, toote wede oozige botto geñ yi ki y' dehe ye kono y'a t'eese: "Wede iine unse a jiire."»

6

*Isa ti onniyo ere ki puukiyo
(Matiye 12.1-8; Markus 2.23-28)*

¹ Onniyo soo ere ki puukiyo Yawudiyagi mañ, Isa yi doopide t'adda dombi don ki game ti sanalliyagí. Aame geñ kane sanalliyagí an sattita game, an t'adufuzu an t'aydu. ² Kane Pariziyen ongo an di ruute, an'de: «Ki moo me kun d'isiyo munda wede oogiradin ti k'ele urzi k'isiyo ye, a onniyo ere ki puukiyadin te?» ³ Mañ Isa y'an di'n gime onamañ, y'ede: «Ki kotto kun gire munda wede ti kaaga onniyo soo yode Dawut y'ize ti don a itadí, aame mosogo ti'ni ziida geñ me. ⁴ Yi-t'iide adda Boy Raa wede an ikkima ki golmodo, y'a ziki mappa wede an i ele sedefe a Raa, wo yode ti don a itadí an d'iimi*. Wo Raa y'an k'ize munda ye, ki too mañ kane an k'ede

* **6:4** 6.4 Kun wollo adda mattup ki 1 Samiyel 21.2-7.

ye urzi an d'oomi me, oogiradiŋ t'ele urzi a d'ofɔ sedefe d'anjɔl†.» ⁵ Maŋ Isa y'an di ruute, y'ede: «Nuŋ wede an n'ehe aa ulo wede eŋ, o d'ede urzi k'isiyo munda wede aa addó i dehu ekk'onniyo ere ki puukiyadiŋ te.»

*Wedusu beezí unto
(Matiye 12.9-14; Markus 3.1-6)*

⁶ A onniyo ere ki puukiyo Yawudiyagi ti doolo maŋ, Isa yi-t'iide adda boy wede Yawudiyagi ge dooyiso, y'a iise dooyiso d'uwu. Adda boy geŋ i d'ede wedusu soo inkiŋo beezí wede k'ammade unto. ⁷ Kane d'ofɔ suuniyo k'oogoro ti Pariziyen, an dehu an t'oone urzi an di sakiya Isa, kono kamo an di woliyo koomadí, a onniyo ere ki puukiyo Yawudiyagi a wede yi-t'ela beeko ko? ⁸ Wo yo Isa yi suune elkisadaŋ te, inkiŋo maŋ yi di ruute a wede beezí unto geŋ, y'ede: «Kee ki t'oozo, ki t'ohor a daana d'uwu pay kino.» Maŋ wede y'a t'iiziga, y'a t'ihira a umayí geŋŋo. ⁹ Saŋ Isa y'an di ruute, y'ede: «N'un di'n tondo do, oogiradiŋ t'ele urzi k'isiyo ki moo me a onniyo ere ki puukiyadiŋ te? A wedusu ki-d'ise beehiye kunuŋ, ki-d'ise ulsu ko? Wedusu k'a y'utte kunuŋ, k'a yi t'ide ko?» ¹⁰ Aame geŋ kane d'ofɔ pay Isa yi di'n woliyo adda k'edayan, wo saŋ yi di ruute a wede geŋ, y'ede: «Beezá ki y'ondo.» Maŋ y'a y'unde, wo beezí a t'ikkima. ¹¹ Wo kane d'ofɔ suuniyo k'oogoro ti Pariziyen geŋ addaŋ a ûune ti kulkuwo, an di rootiyo ti tuddaŋ a munda wede an aane an i d'ise a tukk'Isa geŋ me.

† 6:4 6.4 Kun wollo adda mattup ki Lebitik 24.9.

Beeriyo don zina k'Isa
(*Matiye 5.1; 10.1-4; Markus 3.13-19*)

¹² Aame geɗ saɗ Isa y'a-gili k'ekki kesse kono y'a tonde Raa, wo diddo y'a-t'umpile pay ti tonɗiyo Raa. ¹³ Aame ume i t'umpile maɗ, Isa y'a wiike sanalliyagí, wo yi biire ti diinayan don koomat makumu sire y'anni wiike sunɗan don zina. ¹⁴ Kane sumbiyagan: Simo wede Isa y'a yi wiike sundí soo te Piyeɗ, wo leemadí Andire; Zak, Zaɗ, Pilip, Bartelemi, ¹⁵ Matiye, Toma wo Zak ulo k'Alpe; Simo wede an yi waaku wede addí wehini kono siifadí me; ¹⁶ Ziidas ulo ki Zak, wo Ziidas Iskariyot wede saɗ y'a t'owila Isa.

¹⁷ Saɗ maɗ t'ekki kesse Isa ti kane don yi biire an di diigo ki bere wede ekki kesse geɗno batum, a ume wede sanalliyagí don baadan an t'ugiye. A ume geɗno ton i d'ede don duuru baadan an iido ti siifdo Ziide pay, ti geeger Zeruzalem, wo ti geeger Tir ti Sidon don a biza bar. ¹⁸ Kane an iido kono an dehu an di y'olliga wo y'an t'ele beeko a endanzaɗ. Wo kane don siitandani an'ni dabirsa geɗ, y'an d'ele beeko. ¹⁹ Kane don duuru pay an dehu an di botte tudde k'Isa, kono toogo i d'adfiya ti tuddí, an d'ooniyo beeko pay.

Unsuwo wo dabar
(*Matiye 5.1-12*)

²⁰ Inkiɗo maɗ Isa y'a zibbe edayí k'ume sanalliyagí wo y'a ruute, y'ede:

«Unsuwo a kune don un k'ede munda ye, kono Moziko Raa tod'te ki kune.

²¹ Unsuwo a kune don ankenno mosogo t'unni t'owwo,

kono saŋ maŋ ombo t'un di'n pildfey.
 Uŋsuwo a kune dɔŋ aŋkenŋo kun m̄olo,
 kono saŋ maŋ kun di koobitey.

²² Uŋsuwo a kune aame d̄uwo an un olmide,
 an unni koogire, an unni kaldita wo an un
 rootiyto ono dɔŋ ulpi a eggun, kono kun ziipe
 addugun a nuŋ wede an n'ehe aa ulo wede enŋo.

²³ Aame suldi geŋ an iina maŋ, kune ulbugun un
 iso unse wo kun oldito uŋsuwo k'awwa, kono
 munda wede Raa yi dehu y'un t'eley geŋ, yoŋ
 baadaŋ y'unni delliyo a kandaane. Geŋ inkiŋo
 kay kane maawaŋ an'ni dibire nebiyagi dɔŋ ti
 kaaga me.

²⁴ Wo d̄e dabar a kune dɔŋ bey,
 kono uŋsuwagun kun t'uune baa.

²⁵ Dabar a kune dɔŋ aŋkenŋo ombo t'unni palda,
 kono saŋ maŋ mosogo t'un di'n t'idey.
 Dabar a kune dɔŋ aŋkenŋo i koobiyto,
 kono saŋ maŋ kun di lekkey adda m̄olo wo kun
 d'ôoley ti zumari a edagun.

²⁶ Dabar a kune aame d̄uwo pay an unni
 tamma maŋ, kono geŋ inkiŋo kay kane maawaŋ
 an ize ti dɔŋ an ti t'isiyo tuddaŋ aa nebiyagi.»

Geyyiso dɔŋ k'adugun
(Matiye 5.39-47)

²⁷ «Wo n'un di rooto a kune dɔŋ i n'ollige: Kun
 geyyo kane dɔŋ ti kune adu, kun an iso beehiye
 a dɔŋ unn'olmide me. ²⁸ Kun zaapo beeko a
 dɔŋ unni duudiyto, wo kun tondo Raa kono dɔŋ
 i rootiyto ono ulpi a tukki kune. ²⁹ Aame wede
 yi ki diiŋe a tobbisadá ki bita maŋ, ki kama
 tobbisadá ere soo toŋ maŋ y'a ki ti daaŋa. Aame

wede yi t'umbe kallayá wede goole mañ, ki-oolo kallayá wede ñeñku t'adda toñ y'a t'ambo pây. ³⁰ Wede tuuku yi ton-diyo munda ti beezá mañ, ki eelo, wo aame wede yi t'umbe mundazá mañ, ki y' tonda ye. ³¹ Munda wede kun dehu ñuwo an un d'ise geñ, a kane toñ kun an iso in-kino kay.

³² Aame kun geyyiso ñoñ unni geyyiso ñaňñal mañ, sundugun ede ñey ko? Derec, ñoñ k'oldiko toñ kane an geyyiso ñoñ an'ni geyyiso kay. ³³ Wo aame kun isiyo beehiye a ñoñ un'isiyo beehiye ñaňñal mañ, sundugun ede ñey ko? Derec, kane ñoñ k'oldiko batum toñ an isiyo in-kino kay. ³⁴ Aame kun eliyo see a wede kun elkiyo y'un yi kima ñaňñalañ mañ, geñ sundugun ede ñey ko? Derec, ñoñ k'oldiko toñ kane an eliyo see a ñoñ k'oldiko ñoñ aana an yi kima. ³⁵ Wo ki too mañ kun geyyo kane ñoñ ti kune adu, kun an iso beehiye, kun an elo see me wo kun zaape addugun eego ye aame an un ki y' gime ye toñ mañ. In-kino mañ munda wede Raa yi dehu y'un t'eley geñ yoñ baadañ, wo kun t'isey inñi ki Raa goole a jii-re pay. Derec, yoñ wede beehiye a ñoñ i ki rootiyo koduwo a yode ye, wo a ñoñ bundidi pây. ³⁶ Kun t'iso ñoñ i wolliyo sommagi ñuwo, aakede Meegugun Raa toñ yi wolliyo sommagi ñuwo.»

Ki ñekke booro a tukki bakadá ye

(Matiye 5.48; 7.1-12; 15.14; 10.24-25; 7.3-5)

³⁷ «Kun ñekke booro a tukki wede tuuku toñ mañ ye, geñ Raa toñ yi ki ñekka booro eggun ye. Kune ñoñ oñgoñ kun i seeda ti booro ye,

geŋ booro Raa toŋ t'un ki'n seeda ye. Kun oyyo isiyo tambobino a wede tuuku toŋ maŋ, geŋ Raa toŋ y'un t'isa tambobino. ³⁸ Kune a wede tuuku toŋ kun i elo, geŋ Raa toŋ y'un t'eela. Y'un t'eela baadaŋ adda mundaguŋ boo, sokkiyo wo a pildita. Derec, dooziyo ere kun dooziyo a duwo gette, Raa toŋ y'un ti dooza a kune inŋkino kay.»

³⁹ Isa y'an di ruute ono ombide sey, y'ede: «Kun ollo, wede koosiyo'ŋ bakadí koosiyo yi y'arkide ko? Para maŋ sirwaŋ pay an di silditi adda k'olde. ⁴⁰ Sanallusu geŋ, yoŋ t'ekki wede dooyisadí ye, wo de wede tuuku yi-duuye beehiye maŋ, y'a t'ise aa wede dooyisadí. ⁴¹ Ki moo me ki wolliyo unumu wede adda k'ersa leemadá, wo undumu wede adda k'ersa kee, ki gi di y'owwiyo ye me? ⁴² De mummino k'a aane ki di roote a leemadá, k'a t'eese: "Leema ki nuŋ, k'oolo n'a di t'ambo unumu wede adda k'ersadá enno", wo undumu wede adda k'ersadá, kee batum ki ki y' wolliyo ye me? Kee wede biza sire sire, ki t'ambo undumu wede adda k'ersadá doo, inŋkino k'a wolla kereŋ, saŋ k'a t'amba unumu wede adda k'ersa leemadá kollo.»

Undumu ti inŋnizi
(*Matiye 12.33-37; 7.16-21*)

⁴³ «Undumu wede beehiye'ŋ, inŋni ulpi yi ki t'ehe ye, wo undumu wede ulsu toŋ, inŋni beehiye yi ki t'ehe ye. ⁴⁴ Undumu tuuku toŋ ki y' suune t'urzi k'inŋnizi. Geŋ inŋkino inŋni tormo ki ki rakke ye ekk'undumu k'ahimagi me, wo inŋni k'inda biŋ ki ki rakke ye ekki woskani me. ⁴⁵ Wedusu wede beehiye'ŋ, beehiyko t'ettiyo ti sulfi doŋ

beehiye y'ukume adda k'addí, wo wedusu wede ulsu'ŋ, munda ulsu y'ettiyo ti suldí dŋŋ ulpi y'ukume adda k'addí. Derec, munda wede wedusu y'okumso adda k'addí geŋŋo adđiya ti bizí me.»

*Boyđi sire
(Matiye 7.24-27)*

⁴⁶ «Ki moo me kune kun di n' waaku “Galmeegey, Galmeegey”, wo kun ki t'isiyo ye munda wede n'un rootiyo me? ⁴⁷ Wede tuuku y'ettiyo ki tuddó, y'ollige onamó wo yi sooru eego maŋ, nuŋ n'un di roote yoŋ geŋ yi deeyiso aa wee wee. ⁴⁸ Yode geŋ yi deeyiso aa wede y'oozige boy. Yoŋ geŋ yi d'ittiba olde sohuru wo ita boy y'a di ziipe eego pangiragi. Kuyyo ti gilo wo ooye y'a ûune i palđita waawiye. Bormo gette t'a ŋiia boy geŋŋo wo toŋ maŋ y'a k'iddira ye, kono boy geŋ oozigayí koduwo. ⁴⁹ Wo de wede y'ollige onamó wo yi ki sooru eego ye maŋ, yoŋ geŋ yi deeyiso aa wede y'a t'iiziga boy a siido daa ki zaapu k'ita boy. Ooye y'a ûune i palđita waawiye. Bormo gette t'a ŋiia boy geŋŋo, wo a kaamiki boy a ruuge, a nũlile pay.»

7

*Zaapu k'adde ki goole k'asigiryagi
(Matiye 8.5-13; Zaŋ 4.46-54)*

¹ Aame Isa onamí a dŋŋ duuru y'a ti'n dŋŋe pay maŋ, y'a t'iiziga y'a ingile geeger Kaper-nayim. ² A ume geŋ i d'ede goole k'asigiryagi meeda ki Romenŋ, yoŋ i-d'ede wede naabo yi y' giyye baadaŋ wo yi-t'iire eeni y'unto. ³ Aame

goole k'asigiryagi geŋ y'illiga taaya k'Isa maŋ, yi d'igibe doŋ i dokkiyo Yawudiyagi miibi ki tukki yode, an i-d'obo bey kono y'a ette y'a uttey wede naabadí. ⁴ Kane deero geŋ an iiney a sirpa k'Isa maŋ, an i-d'iise obe bey an kod'dime, an'de: «Wede eŋ, y'iide kee k'a ette k'a di y' noogey, ⁵ kono yoŋ geŋ siidfadey yi ti giyye, wo boy wede in di dooyiso toŋ ay iiziga yode.» ⁶ Injino maŋ Isa an di giyye ti kane kaŋ soo, an d'ingile. Aame yoŋ y'iiney goppon ti boy maŋ, goole k'asigiryagi meeda yi d'igibe laŋziyagi, an i-di ruute, an'de: «Goolayey y'ede: Galmee'ki nuŋ, kee ki naate ye, kono nuŋ ni k'iide ye k'a ette ki boozó me. ⁷ Geŋ kono k'injino ni wulle tuddó maŋ, nuŋ batum o k'ede urzi n'a k'ette ki tuddá ye. Wo tiŋ geŋ miŋ ki rooto munda soo kono wede naabadó y'a t'oone bee. ⁸ Injino nuŋ batum n'ottilso a doŋ deero t'eedó, wo i d'ede asigiryagi doŋ nuŋ goole t'eedaŋ. Aame ni rootiyo a wede soo: "K'odo!" maŋ, geŋ yi d'engilso. Aame ni rootiyo a wede doolo: "K'edi!" maŋ, geŋ yi d'ettiyo. Wo aame ni rootiyo a bulayó: "Naabo ette ki-t'iso!" maŋ, geŋ yi-ti t'isiyo.» ⁹ Aame Isa y'illiga ono geŋno maŋ, y'a ziida giggiri kono yode geŋ me, wo y'a-gime ki tukki doŋ duuru doŋ i yi daaniya, y'an di ruute, y'ede: «Kun ollo, n'un di rooto: Adda siido k'Izirayel batum toŋ, ni k'uune ye wede a zaape addí a Raa aa yode kino eŋ me.» ¹⁰ Wo kane doŋ zina an di-gime ki boy, an iide maŋ an y'uuney wede naabo y'uune bee.

Baldfiya k'ulo obulso ki mandaayawa

¹¹ Saŋ maŋ tiŋ geŋ Isa y'a iŋgile ki geeger sundutú Nayin, sanalliyagí ti doŋ duuru baadan an di y' daaniya. ¹² Aame y'iiney goppon ki biza bumbu ki geeger gettiyo maŋ, an a-t'ikkima ti duwo an t'ette ottibe nuune k'ulo obulsu ki mandaayawa yon soo danŋal y'inda. Wo doŋ baadan ti geeger gette a itatú. ¹³ Aame Galmeega yi wulle erewo gettiyo maŋ, i di t'ize sommagi, wo yi di ruute, y'ede: «Koŋ m'anna, m'ôole ye.» ¹⁴ Saŋ y'a d'iide goppon ki sirpa sanŋali y'a-butte, maŋ doŋ i sarkiya an t'ihira, wo Isa y'a ruute, y'ede: «Ulo ki nuŋ n'a di rooto, ki t'onno!» ¹⁵ Maŋ wede inda y'a t'iizi, y'a-guune, y'a iise rootiyto, wo Isa yi di y'ele a meedí. ¹⁶ Kane doŋ pay orgiso t'anni ziida, wo an tamma Raa, an'de: «I udfó nebi goole a diinayin, wo Raa y'ukko noogiyo doŋzí!» ¹⁷ Wo a munda wede Isa y'ize geŋ, rabiladí a-tiipe adda siidfo Ziide pay, wo ti siidiyagi pay doŋ i ti duule.

*Doŋ zina ki Zaŋ Batis
(Matiye 11.2-6)*

¹⁸ A sulfi doŋ pay ize geŋ, a goolayan Zaŋ Batis sanalliyagí an i-di t'iide taaya. Maŋ yon yi wiike doŋ sire ti diinayan, ¹⁹ wo y'an igibe ki tukki Galmeega kono an ti y' tondo: «Kee miŋ Almasi Raa yi biire, saŋ a etto ko? Kunuŋ ay di dello wede doolo ko?» ²⁰ Aame an iiney a sirpa k'Isa maŋ, an i-di ruute, an'de: «Kaye Zaŋ Batis y'ayn'igibo kono ay ki ti tonde: "Kee miŋ Almasi Raa yi biire, saŋ a etto ko? Kunuŋ ay di dello wede doolo ko?"» ²¹ A ume geŋ miŋ Isa y'an d'ele beeko a doŋ k'eeni baadan, doŋ kesiyagan

soo soo, wo dɔŋ an d'ede siitandani a eedan, wo konzayi baadan edayan y'an di'n ihinte. ²² Saŋ y'an di'n gime onaman, y'ede: «Kun'do a Zaŋ, kun i-t'ôodoy taaya a munda wede kun wulle wo kun illiga eŋ me: Konzayi an di wolleiyo kereŋ, dɔŋ jekese an sooru beehiye, dɔŋ bitide an t'ize kamileŋ, duŋgiyagi an d'ollige, dɔŋ unto an di bilde, wo Rabila Majjaanawa an an gizite a dɔŋ an k'ede munda ye* . ²³ Wo unsuwo a wede y'a ziida zakidi kono nuuno bini dangu!»

*Rootiyo k'Isa a tukki Zaŋ Batis
(Matiye 11.7-11)*

²⁴ Dɔŋ zina ki Zaŋ Batis an t'ingile maŋ, saŋ Isa y'a iise rootiyo a dɔŋ duuru a tukki Zaŋ, y'ede: «Kun iide k'adda balda wolleiyo ki moo me? Ki wedusu wede aa alala ere maaye yi t'agisa gettiyo ko? Aha! ²⁵ De inokino kun iide wolleiyo ki moo me? Ki wedusu yi t'usse kallagi majjandani ko? Wo de kane dɔŋ ossiyo kallagi majjandani wo an lekkiyo togos geŋ, an lekkiyo adda boydi mozagi. ²⁶ De kun iide wolleiyo ki moo me? Ki nebi ko? Eyye, wo kun ollo n'un di rooto, yoŋ geŋ yi jiire nebi sey. ²⁷ Derec, ono eŋ an riŋe ti kaaga adda mattup ki Raa a tukki Zaŋ, an'de:

“Kun ollo, nuŋ n'a t'igiba wede zindó y'a ooguma ki poone ti kee, y'a di t'okkimey urzizá†.”»

²⁸ Isa y'a ruute sey, y'ede: «Kun ollo, n'un di rooto, ti diine duwo dɔŋ pay erayi an ehe geŋ,

* **7:22** 7.22 Kun wollo adda mattup ki Ezayi 35.5-6 wo 61.1.

† **7:27** 7.27 Kun wollo adda mattup ki Malasi 3.1.

wede aase goole a ceere Zaŋ umbo. Wo inŋkino toŋ maŋ, wede yoŋ ñeŋku a jiire adda Moziko Raa geŋ, yoŋ goole yi jiire Zaŋ. ²⁹ Kane d'ofŋ pay ti d'ofŋ sed'fu jibaaye batum toŋ an di y'illiga, an di zuune Raa yoŋ ki diine, maŋ an d'iyye Zaŋ y'a ti'n zuyye batem. ³⁰ Wo kane Pariziyen ti d'ofŋ suuniyo k'oogoro, an di giigira munda wede Raa yi dehu y'aase a kane me, maŋ an di-tuuge Zaŋ y'a ti'n suyye batem me.»

³¹ Isa y'a ruute sey, y'ede: «Doŋ ankenno en n'a t'eese kane aa wee wee? An deeyiso aa wee wee? ³² Kane an deeyiso aa inŋni an ti guune a bere d'ofŋ duuru, an di waakutu eebaŋ, an d'eesiyo: “Kaye ay un di biha siraro toŋ maŋ, kun ki d'immira ye! Ay un d'ũure ôoro k'unto toŋ maŋ, kun ki d'ũile ye!”

³³ Inŋkino Zaŋ Batis y'iina geŋ, yi k'ombo mappa ye, toote k'inŋni biŋ yi k'iibe ye, wo kun di rootiyo, kun'de: “Yoŋ i-d'ede siitan a eedí.”

³⁴ Wo nuŋ wede an n'ehe aa ulo wede en, n'iina maŋ ni d'ombo ni sobo, wo kun di rootiyo, kun'de: “Kun wollo, wede en y'elkiyo miŋ a ombo ti sobo toote k'inŋni biŋ d'aŋŋal, yoŋ lanze ki d'ofŋ sed'fu jibaaye wo ti d'ofŋ k'oldfiko ongo.”

³⁵ Wo Raa'ŋ suuniyo k'ono ere i d'ede, d'uwu an ti zuune tod'te ki diine t'urzi k'inŋnizí pay.»

Isa ti erewo t'isiyo oldfiko

³⁶ I d'ede wede soo inŋkino yoŋ Pariziyen, y'a wiike Isa y'a oomey di yode. Isa y'a t'iide di wede genno wo an di-guune an d'oomi. ³⁷ I d'ede adda geeger gette, erewo sundutú ti m'oolo k'isiyo k'oldfiko. Aame t'illiga Isa an ti guune ombo

di wede Pariziyen geɲɲo maɲ, ti d'umbo ulo diɲgile an ikkima ki mɔkkolo sundutú albaatir, adda egey dɔɲ eediyadaɲ uɲse. ³⁸ Ti-t'iide dar k'Isa a ume zoɲdí wo t'a iise môolo, zoɲdí t'a ti'n zuyye ti zumartú, t'a ti'n zippite t'ilaltú, ti-d'ize puuc a zoɲdí i-kaza ottilsatú baadaɲ a yoɲ me, wo ti di yirgite egey geɲ a zoɲdí. ³⁹ Aame yo Pariziyen wede i wiike Isa yi wulle iɲkino maɲ, y'a ruute t'adda k'addí, y'ede: «Aame wede eɲ yoɲ nebi ki kotto maɲ, y'a ti suune erewo ere i y' butte gettiɲ wee te, tod'te ere an ambu sundutú k'isiyo k'oldiko.» ⁴⁰ Iɲkino Isa y'a t'ihina bizí, yi di ruute a Pariziyen, y'ede: «Simo, nuɲ oo ede ono n'a di roote.» Maɲ yi di'n gime onamí, y'ede: «Wede dooyiso, ki rooto.» ⁴¹ Isa y'a ruute, y'ede: «I d'ede dɔɲ sire, an i di kime soɲko ki wede y'an ele see. Wede soɲ yi di-kime tamma meeda paat, wo soɲ tamma ada paat. ⁴² Aakede kane an k'iine kamatú ye geɲ, wede y'an d'ize beeko, sirwan pay seezaɲ y'an di y'iide. Kane dɔɲ sire geɲ, wede a yi geyye a di ceere tuuku me?» ⁴³ Simo yi di'n gime onamí, y'ede: «A elkiyadó maɲ, yi ize beeko a wede seezí baadaɲ a jiire wo yi-di y'iide geɲɲo.» Isa yi di ruute, y'ede: «Ono geɲ ki ti'n dikké d'erec.»

⁴⁴ Maɲ Isa y'a-gime ki tukk'erewo gettiyo, wo yi di ruute a Simo, y'ede: «Erewo ette ki ti woliyo d'e'ɲ? Nuɲ ni-t'iido adda boozá wo ahu toɲ k'o k'eele ye k'opilso zoɲdó me, wo d'e tod' t'o t'upile zoɲdó ti zumartú wo t'a zippite t'ilaltú. ⁴⁵ Kee ki ki n' ziida yop k'o k'ize puuc a tobbisadó ye, wo d'e tod'te t'ume n'iina geɲ miɲ, ti k'iili ye k'isiyo puuc a zoɲdó me. ⁴⁶ Kee egey k'iɲɲi

k'olibiyee a eedó k'o ki yirge ye, wo tod' t'o di yirgite egey d'of eediyadaŋ unse a zoŋdó. ⁴⁷ Kono kamo n'a di rooto: geyyiso ere baadaŋ t'ize gette i-kaza t'oldifikatú ere baadaŋ, tod' t'uune tambobino. Wo a wede ooniyo tambobino k'oldikadí baata geŋ, yi geyyiso toŋ baata kay.» ⁴⁸ In'kino maŋ Isa yi di ruute a erewo, y'ede: «Oldikadí ni t'ize tambobino.» ⁴⁹ Kane d'of i-guune ombo ti yode'ŋ, wede soŋ yi d'elkiyo adda k'addí k'addí, an'de: «Ita d'of kino eŋ miŋ ti too me, isiyo tambobino k'oldiko toŋ yi d'aaniya me?» ⁵⁰ Wo Isa yi di ruute a erewo, y'ede: «Kono koŋ mi ziipe addí a nuŋ geŋ, m'utte m'aaho ti toose.»

8

Erayi d'of i daaniya Isa

¹ Saŋ maŋ tin geŋ Isa y'a t'iiziga, yi d'ettiyo geeger ti geeger wo ille ti ille, yi kazita Rabila Majjaanawa ki Moziko Raa. Kane sanalliyagid'of koomat makumu sire geŋ a itadí, ² ti erayi miibi d'of y'an ilmito siitandani wo y'an d'elo beeko a endanzaŋ. Kane erayi geŋ Mariyam ere an ti waaku Mariyam ti siido Magdalla, tode ere yi d'ilmo siitandani sarat t'ettú, ³ Zane ere ki Kuuza wede i yeeriyo boy ki mozigo Erod, Suuzan wo erayi d'of ti doolo toŋ ede baadaŋ, kane geŋ an di noogiyo Isa ti sanalliyagí ti beezaŋ.

Ono ombide t'urzi wede korso (Matiye 13.1-9; Markus 4.1-9)

⁴ Ti geeger ere tuuku toŋ, d'of baadaŋ an d'iide tukk'Isa, an di-t'ugiye. Maŋ y'an di'n

duuye t'ono ombide enno, y'ede: ⁵ «I d'ede wedusu soo inkino yi t'iide korso buzuní k'adda doomizí. Aame yi sakkisa gen, buzu ongon a-zilditi a urzi, d'wo an aa t'inyilse wo embi an aa di tibbe. ⁶ Buzu ongon son a-zilditi a ume t'adda'η pangiragi. Kane gen i t'udde man, a biiha kono kuyyo umbo. ⁷ Don son a-zilditi adda k'ahimagi, kane gen a t'udde wo ahimagi an iiziga man, an di'n ippe. ⁸ Don ongon son a-zilditi a siido ere beehiye, kane gen a t'udde, an d'ihira wo an d'ehe: ulo muduso soo y'a ehe inni meeda meeda.» Man Isa y'a ruute ti golla awwa, y'ede: «Wede i-d'ede kuwwa k'ollige man, y'ollo koduwo!»

*Oodibe k'ita a urzi k'ono ombide
(Matiye 13.10-23; Markus 4.10-20)*

⁹ Kane sanalliyagi k'Isa an di y' tunde, an'de: «Ono ombide gen i-kaza moo me?» ¹⁰ Yon y'an di'n gime onaman, y'ede: «A kune'η Raa y'un ele suuniyo ki suldi don ombide ki Moziko Raa te, wo a don ongon suldi gen an an rootiyto'η t'ono ombide. Inkino kane'η an di wolliyo, wo munda an ki y' wolliyo ye, an d'ollige, wo ono itadan an ki ti suuniyo ye.

¹¹ Kun ollo, ette ita k'ono ombide: Buzu gen, i-kaza ono Raa. ¹² Buzu wede i zilditi a biza k'urzi gen, i-kaza d'wo don ollige ono Raa. San Meeda siitandani t'ettiyo, ono Raa t'adda k'addan ti t'odfipe kono an ki ti zaape addan a Raa wo an ki t'oone uttiyo ye. ¹³ Buzu wede i zilditi a ume wede t'adda pangiragi gen, i-kaza d'wo don ollige ono Raa, kesiko an di'n seedfu t'ulbe unse. Wo de ono sottadan ti ki ti deegu adda k'addan

ye, an di zaapu addaŋ ki peedo booloŋ, wo aame i aaniya naamiya munda maŋ, urzi zaapu k'addaŋ a Raa an d'ooliyo. ¹⁴ Buzu wede i zilditi adda k'ahimagi geŋ, i-kaza d'uwu d'oŋ ollige ono Raa, wo de saŋ elkisito, dehu tu k'urzi maala wo uŋsuwo lekkiyo duniya i ceeriyo eedaŋ. Inkiŋo an ki d'ohire ye a urzi Raa me. ¹⁵ Ki d'aŋgu buzu wede i zilditi a siido ere beehiye'ŋ, i-kaza d'uwu d'oŋ ollige ono Raa t'adde tasse wo beehiye. Ono Raa an di'n boohiyo, an seefu zakidi an d'ohire a urzi Raa, an aa d'ooniyo eebaŋ ti doolo.»

Ono ombide a tukki pitila

(Markus 4.21-25)

¹⁶ «Wenda soo toŋ y'a t'oyye pitila kono y'a t'ossibe bogoro, ise yi-ti t'ele a ita k'oŋgali umbo. Ki too maŋ y'a dodde t'awwa kono d'oŋ ette k'adda biino an di wolle toore. ¹⁷ Suldi d'oŋ pay ombide'ŋ, saŋ onniyo soo a t'oodiba ita, wo ono d'oŋ i ki dehu d'uwu an k'olliga ye geŋ, saŋ onniyo soo an di'n olliga, a t'adfa a toore. ¹⁸ Inkiŋo maŋ kun koonaa mentikagi a urzi k'ollige geŋ me. Derec, a wede i-d'ede'ŋ, an i-t'eela t'eego, wo de a wede i-k'ede ye geŋ, mundaŋi wede booloŋ y'elkiyo yi t'oona toŋ, an i-t'amba.»

Mekk'Isa ti zembadi

(Matiye 12.46-50; Markus 3.31-35)

¹⁹ Mekk'Isa ti zembadi an t'iide an di y' t'ooney, wo kane an k'aane ettiyo k'ume yode ye kono d'uwu baadaŋ. ²⁰ Duwo an i-di ruute a Isa, an'de: «Meeda ti zembada kane ti paate, an dehu an ki ti wolle.» ²¹ Wo de Isa y'an di'n gime

onaman, y'ede: «Meedó ti zembadó, kane dɔŋ ollige ono Raa wo an sooru eego.»

*Isa toogo i jüre maaye baadan
(Matiye 8.18,23-27; Markus 4.35-41)*

²² Onniyo soo Isa ti sanalliyagí an di gili adda tooko, maŋ y'an di ruute, y'ede: «In ti doopo'ŋ ti dar bar* ti nee.» Wo kane an d'ingile. ²³ Aame an doopide geŋ, Isa y'a udige kuy. A kaamiki, i d'iiziga maaye baadan adda bar, tooko i t'ôniyo t'ahu, an t'ize ooŋe kono t'an di ti'n sooyiso. ²⁴ Kane sanalliyagí an a d'iide sirpadí, an di y'inne kaŋ d'ollite, an'de: «Wede dooyisadey, wede dooyisadey, kine in t'unto!» Maŋ Isa y'a t'inne, y'an idfise maaye ti ahu dɔŋ i kolzite baadan geŋ me, wo a kaamiki maaye y'a ziida, ahu an t'udige d'eddek. ²⁵ Saŋ Isa y'an di ruute, y'ede: «Ki moo me kun ki zaapu adduguŋ a nuuno ye me?» Wo kane orgiso t'anni ziida, an ziida giggiraŋ wo an di rootiyto tuddaŋ, an'de: «Yode eŋ moo wede me, kono yi di rootiyto a maaye ti ahu toŋ an d'ollige onamí me!»

*Eliyo beeko a wede i-d'ede siitandani a eedí
(Matiye 8.28-34; Markus 5.1-20)*

²⁶ Saŋ Isa ti sanalliyagí an d'iiney a siido Gadara, tod'te ti dar bar ti nee a daana siido Galile. ²⁷ Aame Isa yi deegu ti tooko geŋ, i d'iide wedusu in'kino ti geeger gettiyo, y'iide'ŋ y'a y'ikkima. Yo wede geŋ i-d'ede siitandani a eedí, ti kaagine yi k'ossiyo kallagi ye, wo yi ki

* **8:22** 8.22 Bar gette tod'te a Galile, siido ere ti dar bar gette i lekkiyo kane dɔŋ Yawudiyagi ye.

lekkiyo a boy ye, lekkiyadi adda diine muuziyagi. ²⁸ Aame yi wulle Isa man, y'a iise d'ollite, y'a iire zondí wo y'a ruute ti golla awwa, y'ede: «Ki dehu moo a tukki nuñ me, Isa Ulo ki Raa goole a jiire pay? Ni ki ton-diyo, ki ni dabire ye.» ²⁹ Yi ruute in'kino kono Isa yi ruute siitan: «Mi t'adfo ti tukki yode me!» Siitan gette tañ baadañ ti-ti y' sedfiyo a siido. In'kino man beydi an di kettiso ti zinjiri wo zondí an t'eliyo adda poole, kono y'a-koone umayí soo, toñ umbo yi-ti dambu, siitan t'a-di d'engilso k'adda balda. ³⁰ Isa y'a yi tunde, y'ede: «Kee sundá wee wee?» Wede geñ yi di'n gime onamí, y'ede: «Nuñ sundó Doñ Duuru.» Yi rootiyo in'kino kono siitandani a eedí baadañ. ³¹ Wo kane siitandani an i d'obe bey a Isa, kono y'an gi di roote an ki d'engile k'adda k'oldfe wede aakede buldume ye.

³² A ume geñ i d'ede torfo meeda ki kinzir an elso ekki kesse. Kane siitandani an i d'obe bey a Isa kono y'an t'ele urzi an t'ette adda kinzirdari geñño, man y'an d'iyye. ³³ In'kino siitandani t'ekki wede geñ an t'udfe, an t'iide adda kinzirdari. Wo torfo gette t'awwa t'ekki kesse t'a zide okko, kinzirdari an t'ibi adda bar, an t'inda adda k'ahu.

³⁴ Aame kane doñ k'elso an wulle munda wede ize geñño man, an d'ukke wo an an t'iide taaya a doñ adda geeger wo a doñ i lekkiyto a dombi pây. ³⁵ Duwo geñ an t'udfito wolliso ki munda wede ize. An iina a sirpa k'Isa man, an y'uuna wede i ede siitandani a eedí wo an t'udfe geñ, yoñ yi-guune a ume zoñ k'Isa, yi t'usse kalle wo eedí t'iido. In'kino kane geñ orgiso t'anni ziida.

³⁶ Kane dɔŋ i wulle munda wede ize, an an t'ïide taaya kaŋ mummino wede i-d'ede siitandani a eedí y'a y'utte me. ³⁷ Inŋino maŋ kane dɔŋ siidɔ pay an i-di ruute a Isa ti siidɔdan y'a engile, kono orgiso ti'ni ziidɔ baadan. Maŋ Isa yi-ti gili adda tooko, y'a engile.

³⁸ Wede i ede siitandani a eedí wo an t'udɔfe geŋ, yi tondiyo Isa kono y'a lekke ti yode, wo Isa y'a y'igibe, y'ede: ³⁹ «Ki-kama di kee wo k'an t'ôodoy taaya a sulɔi dɔŋ pay Raa y'ize a kee geŋ me.» Maŋ wede y'a-gime, y'an di-gizite a dɔŋ geeger sulɔi dɔŋ pay Isa yi ize a yode geŋ me.

*Eliyo beeko a erewo wo balɔiya k'uto Zayiris
(Matiye 9.18-26; Markus 5.21-43)*

⁴⁰ Isa yi-gimo ti dar bar t'inno maŋ, dɔŋ duuru an di y' ziidɔ bey sire kono kane pay an yi delliyo. ⁴¹ Aame geŋ i d'iina wedusu sundí Zayiris, yoŋ goole boy wede Yawudiyagi ge dooyiso. Y'a iido, y'a iire a zoŋ k'Isa wo yi-d'obe bey y'a ette di yode, ⁴² kono i-d'ede utí tin soo danɔal, ozzinatú ette suma koomat makumu sire, tuddutú eeni t'unto.

Aame Isa y'ette di yode geŋ, dɔŋ baadan an di y' nɔyyu t'enno t'enno. ⁴³ Ti diine dɔŋ duuru i d'ede erewo soo inŋino ti dabirsa, puuzo obite t'itatú ïide ozzine koomat makumu sire. Beytú t'a zikkuwe pay a dɔŋ daawiya, wo umbo wenda soo toŋ yi ki ti diiwe ye. ⁴⁴ Tod' ti-t'ïide ti dar k'Isa, t'a-butte bize kallayí. A kaamiki yip obite puuzo a ïhira. ⁴⁵ Isa y'a tunde, y'ede: «Wee wee i ni butte me?» Kane pay an di ruute, an'de: «Nuuno ye, nuuno ye.» Maŋ Piyer y'a ruute,

y'ede: «Wede dooyisadey, kee dūwo an ki ṅayyu t'ēnno t'ēnno.» ⁴⁶ Wo de Isa y'a ruute, y'ede: «Derec, nuṅ wenda yi ni butte, kono n'a uwwe toogo a udde ti tuddó.» ⁴⁷ Erewo t'uwwe maṅ Isa yi ti zuune, inḱino to t'a iire zondí ti ṅonṅirso burbur. A dfaana dṅon duuru geṅ ti di t'íide taaya, ki moo me ti y' butte wo mummino a kaamiki t'a uune bee me. ⁴⁸ Wo de Isa yi di ruute, y'ede: «Uto ki nuṅ, kono koṅ mi ziipe addí a nuuno geṅ, m'utte m'aaho ti toose.»

⁴⁹ Aame Isa y'a ti rootiyto inḱino geṅ, wede zina y'okko ti di goole boy wede Yawudiyagi ge dooyiso, wo yi di ruute a Zayiris, y'ede: «Utá t'a t'íhe, kee ki y' naate ye baa wede dooyiso me.» ⁵⁰ Wo ono geṅ Isa yi'n illiga, maṅ yi di ruute a Zayiris, y'ede: «Kee k'orgide ye, ki zaapo addá a nuuno dfaṅṅal, utá t'utta.» ⁵¹ Aame an iiney adda boy ki Zayiris maṅ, a dṅon duuru pay Isa y'an di-tuuge k'ettiyo k'adda biino me, iide ti yode kane Piyer, Zan, Zak wo meek'uto ti mekk'uto dfaṅṅal. ⁵² Kane dūwo pay an dṅollite mōolo dfaṅkar kono k'uto. Inḱino maṅ Isa y'an di ruute, y'ede: «Kun ôole ye. Tod' ti k'inda ye, ti moone moone.» ⁵³ Wo kane an di y'okko maade kono an zuune tod' t'inda me. ⁵⁴ Wo yo Isa geṅ yi ziiida beytú, y'a ruute ti golla awwa, y'ede: «Uto ki nuṅ, mi t'onno!» ⁵⁵ A kaamiki undutú t'a gimo wo t'a t'íiziga. Maṅ Isa y'an di ruute, y'ede: «Kun i eelo ombo.» ⁵⁶ Kane maawutú an ziiida giggiraṅ, wo Isa y'an di ruute, y'ede: «A wenda soo toṅ kun i roota ye a munda wede ize eṅ me.»

9

*Agisa ki sanalliyagi kane koomat makumu sire
(Matiye 10.1-9,11-14; Markus 6.6-13)*

¹ Isa y'a-wiike sanalliyagi kane koomat makumu sire, y'an d'ele toogo wo urzi ki lommite siitandani don pay an t'ooney a daanadan, wo k'eliyo beeko a endani duwo. ² Saŋ maŋ y'an igibe kazita k'urzi Moziko Raa wo k'eliyo beeko a don k'eeni, ³ wo y'an di ruute, y'ede: «Ki torguwaguŋ munda a beyguŋ kun amba ye, ise dalka, ise eese, ise munda k'ombo, ise soŋko, ise wede tuuku toŋ kalle ki sirwe y'amba ye. ⁴ Aame kun t'iidey adda boy tuuku wo an unni ziidey maŋ, kun di lekkoy angenno bini engilsaguŋ t'ume genno. ⁵ Aame tuuku duwo an un ki'n ziidey ye maŋ, a engilsaguŋ ti geeger gette, odde zoŋguŋ toŋ kun a ti tottigoy, geŋ i-kaza Raa ulb' unse ye ti kane me.» ⁶ In'kino kane sanalliyagi an d'ingile, an d'ettiyo ille ti ille, an di kazita Rabila Majjaanawa wo an d'eliyo beeko a don k'eeni a ume tuuku toŋ maŋ.

*Erod ulb' i oodiyo kono suma k'Isa ti m'olo
(Matiye 14.1-2; Markus 6.14-16)*

⁷ Erod yoŋ wede goole yi dokkiyo siido Galile, y'a illiga taaya ki suldi don pay isiyto geŋ me. Wo munda y'a roote yi ki suune ye, kono don ongon an'de: «Zaŋ Batis yi bildo ti diine don unto me.» ⁸ On'go an'de: «I gimo ki siido nebi Eli.» On'go soŋ an'de: «I bildo nebi soo ti diine nebiyagi don ti kaaga.» ⁹ Wo Erod y'a ruute y'ede: «Zaŋ miŋ nuŋ batum n'an di ruute a asigiryagi an di-dikke

t'eedí me. Wo ðe wede geŋ miŋ tuuku me, ðoo miŋ ni d'ollige yi d'isiyto sulđi pay geŋ me?» Wo yi dehu urzi Isa y'a-ti y' wolle.

Eliyo k'ombo a kuuli dupu paat
(*Matiye 14.13-21; Markus 6.30-44*)

¹⁰ Kane ðoŋ zina k'Isa an ti gimo maŋ, an i-di t'îide taaya a naabo pay ere an izo. Maŋ y'a ti'n wiike an d'ingile ti yode, an t'irga siidaŋ goppon ti geeger an ti waaku Betsayda. ¹¹ Wo kane ðoŋ duuru, umayí an di y'illiga wo an di'n diine. Aame ðuwo an iina maŋ, Isa y'anni ziida bey sire, y'an di gizite urzi Moziko Raa, wo a ðoŋ i dehu beeko tuddaŋ y'an d'ele beeko.

¹² Peedo t'ette k'ooriyo maŋ, kane sanalliyagi koomat makumu sire, an a d'îide sirpa k'Isa wo an i di ruute, an'de: «Doŋ duuru eŋ ki'n agiba, an t'ette k'adda k'illiyagi ti boyđi ðoŋ doome goppon eŋŋo, kono an di t'ooney ume moone ti ombo, kono kine eŋ adda balda.» ¹³ Wo Isa y'an di ruute, y'ede: «Ombo an eelo kune batum.» Maŋ kane an di ruute, an'de: «Kaye ay d'ede miŋ mappa paat wo puuni sire ðaŋŋal, koo ki dehu kaye batum ay d'ette ay d'owilo ombo a ðoŋ duuru pay eŋŋo maŋ.» ¹⁴ An ruute iŋkino kono kane ðoŋ duuru an t'îide kuuli suma dupu paat.

Isa y'an di ruute a sanalliyagi, y'ede: «Duwo eŋ kun ti'n kondita kaŋ ogiysito ada paat, paat.» ¹⁵ Kane sanalliyagi an t'ize aa y'an ruute, an ti'n gundite pay. ¹⁶ Isa y'a-ziki mappa paat ti puuni sire geŋŋo, y'a t'umbe edayí k'awwa ki kandaane y'a ruute kofuwo a Raa kono k'ombo

gette. Mañ mappa ti puuni y'a burkite, y'an d'ele a sanalliyagi kono an an di-dokkidfa a don duuru genno. ¹⁷ Kane pay gen an d'iimi wo an d'isse. Wo ombo ere uupite sanalliyagi an ti-tusse, a iide dappa koomat makumu sire.

Isa miñ yoñ wee wee?

(Matiye 16.13-21; Markus 8.27-31)

¹⁸ Onniyo soo Isa y'a t'irga siidi ti sanalliyagi, yi ton-diyo Raa. Aame gen y'anni tunde, y'ede: «Don duuru an rootiyo nuñ wee wee?» ¹⁹ Kane an i di'n gime onami, an'de: «Don soñ an'de kee Zañ Batis, don ongo an'de kee nebi Eli, wo don ongo soñ an'de kee nebi ti diine nebiyagi don ti kaaga i bilfo me.» ²⁰ Wo yoñ y'an di ruute, y'ede: «De kune me, kun'de nuñ wee wee?» Piyer yi di'n gime onami, y'ede: «Kee Almasi Raa yi biire.»

²¹ Mañ Isa y'an d'undirde kono ono gen a wenda soo toñ an'ni ki roota ye. ²² Wo y'a ruute sey, y'ede: «Gen d'erec, nuñ wede an n'ehe aa ulo wede en, i dehu n'a dabirey baadañ. Don i dokkiyo donziñ, deero don sedeke ti don suuniyo k'oogoro pay an di n' kiigirey, fuwo an di n' seedey an di n' t'idey, wo onniyo sire k'aduwe mañ Raa y'a ti n' baldey.»

Urzi daaniya k'Isa

(Matiye 16.24-28; Markus 8.34-9.1)

²³ Sañ mañ Isa y'an di ruute a don pay, y'ede: «Wede yi dehu y'a daane urzi nuuno mañ, tuddi batum y'a ti kiigira, onniyo ti onniyo ki unto toñ y'a oyye y'a t'inda kono nuuno, wo y'a ni daane.

²⁴ In'kino wede tuuku yi dehu boohiyo tuddi

k'aggadí maṅ, y'a ti dagga, wo dfe wede tuuku y'ooliyo tuddí kono nuuno maṅ, y'a t'utta. ²⁵ A wede koḍuwatú moo me suldí duniya pay y'anni t'oone, wo tuddí y'a ti dagge ise y'a t'ettey k'ume daggiya me? ²⁶ Aame wede y'isiyo sukiyagi a nuṅ wo a onamó maṅ, nuṅ wede an n'ehe aa ulo wede eṅ, aame n'etto ti daryikadó wo ti daryika ere ki Meegó wo ti ere ki maaleekiyagi ḍoṅ kamileṅ geṅ, nuṅ toṅ ni-d'isa sukiyagi kay a wede geṅ me. ²⁷ Derec inḱino wo n'un di rooto: Doṅ oṅgoṅ ti diine kane ḍoṅ aṅkenṅo eṅ an ki ti t'inda ki poone pay ye, an di wolla Moziko Raa te.»

*Ume k'eda k'Isa i-gime tuware kar
(Matiye 17.1-8; Markus 9.2-8)*

²⁸ T'ume Isa y'a ti ruutite onamí geṅ îide suma k'onniyo gessire maṅ, y'a-wiike ti yode Piyer, Zaṅ wo Zak, an d'ingile k'ekki mokkolo kono an tondey Raa. ²⁹ Aame yi tondiyo Raa geṅ, ume k'edayí a-gime siidí wo kallagí a t'ize tuwardí kar. ³⁰⁻³¹ A ume geṅ a kaamiki, adda toore wede iido ti kandaane'ṅ i d'ede kuuli sire an rootiyto t'Isa, kane geṅ Muusa ti nebi Eli, an rootiso a urzi wede ki ḍaṅgu naabadí, y'a-t'indey a Zeruzalem. ³² Piyer ti eebí'ṅ kane an udige kuy. Wo aame an t'inne maṅ, kane an woliyo toore adḍiya ti tukk'Isa wo kuuli sire an t'îhira a sirpadí. ³³ Kane kuuli sire geṅ Isa an y'iili maṅ, Piyer yi di ruute, y'ede: «Wede dooyisadey, beehiye'ṅ kine in di lekke a eṅṅo! Ay un d'okkima daabagi aḍo, a kee soo, a Muusa soo, wo a Eli soo.» Wo yoṅ yi ki y' suune ye munda wede yi rootiyo geṅ me.

³⁴ Aame yi rootiyto in̄kino geŋ, i d'iido dondirso ti di'n ippe kane geŋ me. Aame dondirso ti ti'n ippe maŋ, orgiso t'anni ziidfa. ³⁵ Wo t'adda dondirso an d'illiga golla, t'ede: «Eŋ Ulo nuuno, yode wede ni y' biire. Kun y'ollo!» ³⁶ Aame golla ti rootiyto geŋ, kane an wolliyoy'ŋ uupe Isa siidí dfaŋŋal. Kane sanalliyagi a munda wede an wulle an d'inniga d'ed'edek, aame geŋ munda a wenda soo toŋ an i ki ruute ye.

Eliyo beeko a ulo i-d'ede siitan a eedí
(Matiye 17.14-18; Markus 9.14-27)

³⁷ Soggo ti soohe an ti d'fiige t'ekki mukkolo maŋ, aame geŋ d'ofŋ duuru an t'iide okkime k'Isa. ³⁸ Maŋ ti diine d'ofŋ duuru i d'ede wedusu, y'a idili, y'ede: «Wede dooyisadó, ni ki tondiyo, ki wollo sommagi k'ulo nuŋ, kono yoŋ miŋ soo dfaŋŋal. ³⁹ Siitan ti y'ambu maŋ, a kaamiki yi d'eesiyo d'ollite, y'a-ti zehiso bar bar wo bizí i d'ad'fiyta goopiyagi. Tod' ti di y' dabirsa baadaŋ wo ti dehu ti ki y'ooli ye. ⁴⁰ Nuŋ n'a tunde sanalliyagá kono an ti-limmi siitan gette, wo d'e kane an ki d'iine ye.» ⁴¹ Maŋ Isa y'a t'ihina bizí, y'a ruute, y'ede: «Kune d'ofŋ ulpi wo kun ki ziipe addugun a Raa ye. Nuŋ ti kaagine ni lekkiyo ti kune, wo d'e a nuŋ kun ki d'umb'e ye! Geŋ n'a ombiŋa ki da-daayum koo ti kune me? Ulá k'a edi kenno.» ⁴² Aame ulo y'ette k'ume k'Isa geŋ, siitan gette t'a ti y' zid'd'e a siidfo, y'a di zihite bar bar. Wo d'e Isa y'a t'id'd'ise siitan te kono t'a t'ad'd'e ti tuk'ulo me, maŋ uloy'ŋ y'a uune bee, wo yi di y'ele a meegi. ⁴³ Wo d'uwu pay an ziidfa giggeraŋ a toogo ere baadaŋ ki Raa gette.

*Ono k'Isa d'oy ki sirwe k'untadí
(Matiye 17.22-23; Markus 9.30-32)*

Aame kane pay an seedu giggiran botto a munda wede Isa y'ize gen, yon y'an di ruute a sanalliyagi, y'ede: ⁴⁴ «Kune'η kun ollo koduwo munda wede n'un roota en me: Nuη wede an n'ehe aa ulo wede en, an di n' t'eley a bey duwo.» ⁴⁵ Wo kane ono gen itadan an ki'n suuniyo ye, i t'ize ombide inkino itadan an gi di'n suuniyo ye, wo Isa an i d'orgiso kono an di y' tonde a ono gen me.

*Wee wee goole a jiire?
(Matiye 18.1-5; Markus 9.33-37)*

⁴⁶ Kane sanalliyagi an d'iise rootiyto ti tuddan kono an dehu an di suune, ti diinayan minj wee wee goole a jiire me. ⁴⁷ Elkisadan gette Isa y'a ti zuune. Inkino man yi wiike ulo nenku, y'a y'ihira a daanadi, ⁴⁸ wo y'an di ruute, y'ede: «Wede tuuku yi seedu ulo aa yode en bey sire kono y'umbe a sundó man, gen aa yi seedu nuη batum. Wo wede tuuku yi seedu nuuno man, gen aa yi seedu wede i n'igibo pây. Derec, yo wede ti diine kune pay en yon nenku a jiire man, gen yode wede goole a jiire me.»

*Wee wee yon ki kune me?
(Markus 9.38-41)*

⁴⁹ Man Zan y'a t'ihina bizi, y'a ruute, y'ede: «Wede dooyisadey, kaye ay di wullo wedusu soo inkino yi lommite siitandani ti sundá, wo ay di dihe ôhirayí kono yon ti diinayey ye.» ⁵⁰ Wo Isa yi di'n gime onamí, y'ede: «Kun y'ôhira ye, kono wede adugun ye gen yon ki kune.»

Doŋ k'ille soo ki siido Samari an giigira Isa

⁵¹ Aame onniyo ere Isa y'a-kima ki kandaane aa guute goppon maŋ, y'a ziida zakidi y'a t'ette ki Zeruzalem. ⁵² Yi d'igibe doŋ zina an d'uugume poone. Kane an d'ingile, maŋ an t'iide adda k'ille soo ki siido Samari kono an i-di t'okkimey ume deeguzi. ⁵³ Wo kane doŋ k'ille gette an di-tuuge an di y' seeda me, kono yoŋ y'ette ki Zeruzalem. ⁵⁴ Aame kane sanalliyagi Zak wo Zaŋ an illiga inokino maŋ, an di ruute, an'de: «Galmeegey, kee ki dehu maŋ, ay tonde uwwo ti kandaane t'a deego t'an uute mendaŋ?» ⁵⁵ Wo de Isa y'an gime, wo y'an di'n iipide. [y'ede: «Kune kun ki suune ye, unde ere tuuku un ede te. ⁵⁶ Derec, nuŋ wede an n'ehe aa ulo wede eŋ, n'iido'ŋ kono n'a ki dagge undiyagi duwo ye, wo n'an utte.»] Maŋ an d'ingile ki ille ti doolo.

*Doŋ i dehu daaniya k'Isa
(Matiye 8.19-22)*

⁵⁷ Aame kane a urzi geŋ, i d'ede wedusu soo inokino yi di ruute a Isa, y'ede: «N'a ki daana k'ume wede tuuku kee k'etta geŋ me.» ⁵⁸ Wo Isa yi-ti'n gime onami, y'ede: «Boo ti boydutú wo embi toŋ ti boydizaŋ, wo de nuŋ wede an n'ehe aa ulo wede eŋ, oo k'ede ume ni ki ti t'ele eedó n'a-ki puuke ye.»

⁵⁹ Isa yi di ruute a wede doolo, y'ede: «Ki ni daani.» Wo wede geŋ y'a ruute, y'ede: «Galmee'ki nuŋ, k'o eeli urzi n'a ette n'a t'ottibo meegó do.» ⁶⁰ Maŋ Isa yi di ruute, y'ede: «Ki'n oolo kane doŋ aa unto an d'ottiba tuddaŋ, wo kee k'engilo kazita k'ono ki Moziko Raa.»

⁶¹ Wede doolo sey y'a ruute, y'ede: «Galmee'ki nun, ni ki daana, wo de k'o eeli urzi n'a di t'eeso don boozó do.» ⁶² Isa yi di ruute, y'ede: «Wede yi derku ti bunğari wo y'a geldfe ki daari gen, yon beehiykadí umbo ki Moziko Raa te.»

10

Naabo ki sanalliyagi k'Isa kane ada sarat makumu sire

(Matiye 9.37-38; 10.7-16; Markus 6.8-11; Lik 9.3-5)

¹ San man tin gen Galmeega yi biire sanalliyagi ti doolo, kane ada sarat makumu sire, wo y'an ikkipe sire sire, an d'uugume k'adda geegiryagi ti omagi pay don yode batum yi dihe y'etta. ² Y'an di ruute, y'ede: «Kane don duuru en aa doome goole y'ize k'aydu, wo don naabo baata. Injino kun tondo wede doome kono y'a-t'igibo don naabo k'aydu. ³ Anken kun engilo! Kun ollo, n'un agisa en aakede inni dambami k'adda diine sullibagi. ⁴ A beygun sonko kun amba ye, ise eese, ise tobiyagi ti doolo ton man. A urzi wenda soo ton kun t'eesey ye.

⁵ Aame kun t'iidey adda boy tuuku man, ki poone kun d'eesoy: "Toose Raa ti koono adda boy enno." ⁶ Aame wede i dehu toose a ume gen ede man, toose kune t'a koonoy eedí. Wo aame wede injino umbo man, toose kune t'a-kamoy ki tuddugun. ⁷ Boy wede unni ziidey man, kun lekkoy angenno, kun d'oomoy, kun d'ooboy munda wede an un t'eley me, kono

wede yi naabiya'ŋ i-d'ede urzi y'a oomi ti bey
 ɗoŋ y'an naabiya. Kun ɗettitey ɓoy ti ɓoy ye.

⁸ Aame kun t'iidey adda geeger ere tuuku wo
 an unni ziidey maŋ, kun oomoy munda wede
 an un t'eley me. ⁹ Adda geeger gette, kun an
 eloy beeko a ɗoŋ k'eeni, wo a ɗoŋtú kun an
 di rootoy, kun'de: "Moziko Raa t'iina goppon
 ti kune." ¹⁰ Wo aame kun t'iidey adda geeger
 ere tuuku wo ɗoŋtú an un ki'n ziidey ye maŋ,
 kun d'engiloy bere ɗoŋ duuru wo kun an di
 rootoy a ɗoŋ pay, kun d'eesoy: ¹¹ "Kaye odde
 siidagun wede a zoŋɗey toŋ ay un ti y' tottigo,
 geŋ i-kaza Raa ulbí unse ye ti kune me. Wo
 geŋ ono eŋ kun'ni suuno koɗuwo: Moziko Raa
 t'iina goppon ti kune." ¹² Kun ollo, n'un di rooto,
 onniyo ere Raa yi ɗekka booro gette, kane ɗoŋ
 geeger Sodom booradan t'a koonaa soodo ti ɗoŋ
 ki geeger gettiyo.

¹³ Dabar a kune ɗoŋ geeger Korazen! Dabar
 a kune ɗoŋ geeger Betsayda! Derec, aame
 sulɗi k'armika ɗoŋ Raa y'ize di kune geŋ aŋki
 y'aase a geeger Tir ti Sidon maŋ, aŋki ti kaagine
 ɗoŋzan an t'ossite kallagi moolo wo tuddan an
 aa di kosse puure, wo an di-kime lekkiyadan.
¹⁴ Kono kamo onniyo ere Raa yi ɗekka booro
 gette, kane ɗoŋ geeger Tir ti Sidon booradan t'a
 koonaa soodo ti ere ki kune. ¹⁵ Wo kune ɗoŋ
 geeger Kapernayim, kun elkiyo miŋ Raa y'un ti'n
 sika k'awwa ki kandaane ko? Aha! Raa y'un ti'n
 ɗeega adda diine ɗoŋ unto.» ¹⁶ Isa y'an di ruute
 sey a sanalliyagí, y'ede: «Wede un ollige maŋ,
 geŋ aa y'ollige nuuno. Wede unni koogire maŋ,

geŋ aa yi koogire nuuno. Wo wede i ni koogire maŋ, geŋ aa yi koogire wede i n'igibo.»

Kama ki sanalliyagi kane ada sarat makumu sire

¹⁷ Kane sanalliyagi ada sarat makumu sire geŋ an di-gimo ulbaŋ ôoniyo t'unŋsuwo, wo an di ruute, an'de: «Galmeegey, siitandani toŋ an ayn'ollige aame ay an rootiyo munda ti sundá maŋ.» ¹⁸ Isa y'an di ruute, y'ede: «Nuŋ ni wolliyo Meeda siitandani, t'a iiro ti kandaane aakede omile mizzi. ¹⁹ Kun ollo, n'un ele toogo ere kun d'ozire t'ekki mimbayi, t'ekk'ottiyagi wo t'ekki toogo pay ere ki adu, wo munda un d'isa ulsu a kune umbo. ²⁰ Wo beehiye kune ulbuguŋ un isiyo uŋse kono siitandani an un ollige, wo ki too maŋ beehiye a ceere ulbuguŋ aase uŋse kono sumbiyaguŋ raanjiyta adda mattup ki Raa a kandaane.»

*Isa ulbí uŋse
(Matiye 11.25-27)*

²¹ Aame geŋno batum, Isa Unde Kamileŋ ti di'n ûune addí t'unŋsuwo wo y'a ruute, y'ede: «Mee'ki nuŋ, kee Galmee'ki kandaane ti siido, ni ki tamma kono suldí eŋ k'an di'n umbida a doŋ suuniyo k'ono wo a doŋ eedaŋ soodo a elkiso geŋ me, wo k'an t'iidiba ita a doŋ aa inŋni sunni. Eyye Mee'ki nuŋ, geŋ ki dihe suldí a t'ise inŋkino. ²² Suldí pay Meegó Raa y'o n'ele a beezó. Wenda soo toŋ a suune Ulo umbo, i y' suune Meega daŋŋal, wo wenda soo toŋ a suune Meega umbo, i y' suune Ulo wo ti kane doŋ Ulo yi dehu y'an t'oofiba itadí daŋŋal.»

²³ Saŋ maŋ Isa y'a-gime ki tukki sanalliyagi wo y'an di ruute a kane siidan, y'ede: «Uŋsuwo a kune a munda wede kun woliyo eŋŋo. ²⁴ Kun ollo, n'un di rooto, nebiyagi baadaŋ ti mozagi baadaŋ an dihe an di wolle munda wede kun woliyo eŋŋo, wo an gi di y' wulle ye. An dihe an d'olliga munda wede kun ollige eŋŋo, wo an gi di y'illiga ye.»

Ono ombide a tukki wede beehiye ti siido Samari

(Matiye 22.34-40; Markus 12.28-31)

²⁵ Onniyo soo, wede suuniyo k'oogoro yi dehu yi-d'ekke ikka t'urzi k'ono a Isa. Inkiŋo maŋ y'a d'iide sirpadí, y'a yi tunde, y'ede: «Wede dooyisadey, n'aase moo me kono n'a t'ona lekkiyo ere ki daayum te?» ²⁶ Isa yi di ruute, y'ede: «An riŋe adda mattup k'oogiradiŋ moo me? Moo me ki gariya adda me?» ²⁷ Wede geŋ yi di'n gime onamí, y'ede: «An riŋe, an'de: “Ki geyyo Galmeega Raazá ti addá pay, ti undá pay, ti toogadá pay wo ti elkisadá pay*.” Wo soŋ an'de: “Ki geyyo bakadá aa ki geyyiso tuddá batum†.”»

²⁸ Inkiŋo maŋ Isa yi di ruute, y'ede: «Onamá ki ni ruute geŋ d'erec. K'iso inkiŋo wo k'a lekka.»

²⁹ Wo wede suuniyo k'oogoro yi dehu y'a t'okkima bizí, inkiŋo y'a tunde Isa, y'ede: «Bakadó wee wee?» ³⁰ Isa yi di'n gime onamí, y'ede: «I d'ede wedusu soo inkiŋo, yi d'eege ti Zeruzalem y'ambe ki geeger Zeriko. Yo yi-t'iire bey doŋ dekkiyo k'urzi, sulfizí an t'uube pay,

* **10:27** 10.27 Kun wollo adda mattup ki Deeterenom 6.5.

† **10:27** 10.27 Kun wollo adda mattup ki Lebitik 19.18.

an di y' gusse, an di y'iili pulpul a siido wo an d'ingile. ³¹ Saŋ maŋ i d'iido wede sefeke yi d'eegu t'urzi geŋŋo kay. Aame y'iina yi wulle wedusu kaŋ moone maŋ, y'a uɗɗe dokki ti yode, y'a ingile. ³² Inŋino kay i d'iido wedusu yoŋ ti biza bumbu Lebi y'iina a ume geŋŋo, wo aame yi wulle wede geŋŋo maŋ, y'a uɗɗe dokki ti yode, y'a ingile. ³³ Saŋ i d'iido Samariten yi t'ette torguwo, y'a iina a ume geŋŋo kay. Aame yi wulle wede geŋŋo maŋ, i di t'ize sommagi baadaŋ. ³⁴ Y'a d'iide gopponŋ ki tuddí wo a kundayí yi d'ibiti egey ti toote k'inŋi biŋ, maŋ yi di gittite. Y'a di y'umbe eego buurizí, y'a-di t'iide k'adda k'ille wo y'a ti y' ziipe a ume d'eegu torgagi, y'a-t'udige ɗok. ³⁵ Soggo ti soohe maŋ, yi d'iidfiba tamma sire, yi-d'ele a wede boy wo yi di ruute, y'ede: «Wede eŋ k'a-t'udigo ɗok a eedí. Wo soŋko ette a biita toŋ ki y'oola ye, aame ni-gimo maŋ, munda wede ki dagga kono yode geŋ, nuŋ batum n'a di y' t'ela.»

³⁶ Maŋ Isa y'a ruute sey, y'ede: «A elkiyadá maŋ, ti diine ɗoŋ torguwo aɗo geŋ, wede tuuku baka ki wede ɗoŋ k'oogire an yi gusse me?»

³⁷ Wede suuniyo k'oogoro yi di'n gime onamí, y'ede: «Bakadí wede i ize adde koɗuwo a yode geŋŋo.» Inŋino maŋ Isa yi di ruute, y'ede: «Geŋ k'odo, kee toŋ k'aasoy inŋino kay.»

Isa yoŋ di Mariyam ti Marte

³⁸ Aame Isa kane ti sanalliyagí an sooru a urzi geŋ, an t'iide adda k'ille soo, a ume geŋ i d'ede erewo sundutú Marte tod' t'anni ziidá di tode.

³⁹ To Marte i-d'ede teematú sundutú Mariyam,

tod' t'a-guune a sirpa zoŋ ki Galmeega ti d'ollige ono doŋ yi dooyiso. ⁴⁰ Marte gette naabo zigile i ti ziida, t'a d'iide k'ume k'Isa ti di ruute, t'ede: «Galme'e'ki nuŋ, kee a-ki kaza munda ye koo, kunuŋ teemadó gette naabo pay t'o d'iili a nuŋ siidó me? Injino ki rooto t'a di n' nooge» ⁴¹ Maŋ Galmeega yi di'n gime onamtú, y'ede: «Marte, Marte, koŋ ulbí i-d'oodiyo wo mi d'elkiso ki suldí baadaŋ, ⁴² wo munda soo d'anaŋal wede i dehu m'aase me. To Mariyam ti biire munda wede majjaane a jiire, wenda yi k'aane yi ki t'oodiba ye.»

11

Dooyiso k'Isa a urzi tonɗiyo Raa (Matiye 6.9-13)

¹ I d'ede onniyo soo, Isa yi tonɗiyo Raa a ume soo injino. Aame y'a ti d'inge ti tonɗiyo maŋ, wede soo ti diine sanalliyagí y'a yi tunde, y'ede: «Galme'e'ki nuŋ, k'ay ti'n dooyi urzi tonɗiyo Raa, aakede Zaŋ Batis y'a duuye sanalliyagí.» ² Isa y'an di ruute, y'ede: «Aame kun tonde Raa maŋ, kun d'eeso:

“Meegey,
kee k'iso d'uwó pay an di suune kee Raa kamileŋ,
Mozikadá k'a-di t'edi.

³ Onniyo ti onniyo k'ay eeli ombadey ere ay di t'ide.

⁴ K'ay t'isi tambobino a oldíko ere ay ize a kee, kono kaye toŋ ay isiyo tambobino a wede tuuku ay ize ulsu kay.

Wo k'ayn'ooli ye adda naamiya daggiya i ceera eedey ay t'etta adda k'oldíko ye.”»

Ombiṅe a urzi tondiyo Raa

⁵ Isa y'an di ruute sey, y'ede: «Kun ollo, aakede wede soo ti diinaguṅ i-d'ede lanze, y'a ette ki boozí a did'fo meeda, wo y'a t'eese: "Lanze ki nuṅ, kee k'o eeli mappa ado, ⁶ kono wede soo ti diine lanziyagó y'iina ti torguwo di nuuno, wo nuṅ munda k'ombo ni di t'ele umbo." ⁷ Yo lanjayí ummey t'adda biino y'a t'eese: "Kee ki n'oolo ded'fek, kono t'inñizó biza n'ay t'ippe baa, ay moone, ni k'aane ni ki t'ooziga n'a-ki t'ele mappa ye." ⁸ Wo kun ollo, n'un di rooto, lanjayí yi t'ooziga yi-t'ela suldī d'ofṅ pay yoṅ yi dehu, kono yoṅ lanjayí ye, wo kono yoṅ yi kod'fime baadaṅ a munda wede yi dehu me. ⁹ Wo nuṅ n'un di rooto: Kun tondo wo munda an un t'eela, kun dehitto wo kun t'oona, kun koppo biza wo an un di-t'ihina. ¹⁰ Wede tuuku yi tondiyo maṅ, munda an i-d'eeliyo, wede yi dehitto maṅ, yi d'ooniyo, wo wede yi koppiyo biza maṅ, an i di t'ohine. ¹¹ Meege tuuku ti diinaguṅ, aame ulí [yi tunde ombo maṅ, yi di t'ele moko me? Koo] yi tunde puuniso maṅ, yi di t'ele miipo me? ¹² Koo yi tunde kumilso maṅ, yi di t'ele otto me? Aha, umbo! ¹³ In'kino maṅ kune d'ofṅ addugun ulpi toṅ, kun suune eliyo suldī d'ofṅ majjandani a inñiguṅ. Wo geṅ taṅ miibi a ceere Meega Raa a kandaane y'aane y'an t'ele Unde Kamileṅ a d'ofṅ i yi tondiyo me!»

Isa ti Belzebul

(Matiye 9.32-34; 12.22-30; Markus 3.22-27)

¹⁴ Onniyo soo, Isa y'a-t'ilmi siitan ere wede'ṅ ti t'ippe bizí yi k'orbe ye geṅ me. Aame siitan

gette ti t'udfe maɲ, wede geɲ bizí a t'ihina, y'a iise ono, wo kane dɔɲ duuru an ziiɗa giggiraɲ.

¹⁵ Aame geɲ dɔɲ oɲgo ti diinayaɲ an di ruute, an'de: «Tode Belzebul Meeda siitandani i eliyo toogo ki lommite siitandani me!» ¹⁶ Doɲ oɲgoɲ an dehu an i d'ekke ikka t'urzi k'onamí. Injino maɲ an di y' tunde y'an d'ise munda k'armika, a kize yoɲ Raa yi y'igibo. ¹⁷ Wo Isa y'a zuune elkisadaɲ, injino maɲ y'an di ruute, y'ede: «Moziko ere tuuku dɔɲtú an d'eyyiso ti tuddaɲ maɲ, mozikadaɲ a latte, boydizaɲ a di ruugite wede soɲ ekki bakadí bakadí. ¹⁸ Geɲ injino kay, aame Meeda siitandani ti d'eyyiso ti siitandani eebutú maɲ, geɲ an d'eyyiso ti tuddaɲ batum. Wo de geɲ ki kotto, mozikatú ti k'aane ti ki lekke ye! Ni rootiyo injino kono kun'de, ni lommite siitandani o eliyo toogo Belzebul. ¹⁹ De injino maɲ, dɔɲ a itagaɲ an lommite siitandani ti toogo k'aaye? Geɲ kane batum an un kaza munda wede kun rootiyo a tukki nuuno geɲ d'erec ye. ²⁰ Wo de geɲ, nuɲ o eliyo toogo Raa ni lommite siitandani me maɲ, geɲ i-kaza Moziko Raa tod' t'iina di kune baa.

²¹ Aame wede'ɲ toogo ti aryagí geɲ boozí y'a ti y' boohe, injino maɲ maaladí wenda soo toɲ y'a ki botte ye. ²² Wo de aame i iido wede toogo ti yode wo yi y' jiiɗe maɲ, aryagi dɔɲ pay yi zaapu addí geɲ y'a-t'oobe, wo suldi dɔɲ pay y'a siki y'an di dokkiɗa a d'uwu.

²³ Wede yoɲ ki nuuno ye'ɲ, yoɲ aduzó, wo wede y'a ki n' noogiyo ki tussiyo ye'ɲ, yoɲ yi teepiyo ki teepiyo.»

*Kama ki siitan ki tukki wedusu
(Matiye 12.43-45)*

²⁴ «Aame siitan ti tukki wedusu ti t'adfiya maŋ, ti d'enŋilso k'adda balɗa dehutu k'ume wede t'a lekkey, wo ti ki d'ooniyo ye. Inŋino ti rootiyo adda k'addutú, ti d'eesiyo: "Ni-kime k'adda bindó ere an di n'ilmo." ²⁵ Wo a kamatú gette, t'iide'ŋ ti-t'uuney biino rookiyo kamileŋ wo sulɗutú okkime beehiye. ²⁶ Inŋino maŋ ti di kama k'adda balɗa, t'a waaku siitandani ti doolo sarat bundiɗi a jiire tode sey. An di-kama kaŋ soo, an t'ettiyo adda biino gettiyo, i-t'isiyo boozan. Inŋino yo wede geŋ, lekkiyadi ere k'ita i-t'isiyo ooŋe i ceeriyo ere ki poone.»

Uŋsuwo ere a jiire

²⁷ Aame Isa yi rootiyto inŋino geŋ, i d'ede erewo soo inŋino ti diine ɗoŋ duuru, ti di ruute ti golla awwa, t'ede: «Uŋsuwo a erewo ere t'a ki zirke adda k'addutú wo k'a uude uɗutú.» ²⁸ Wo yoŋ yi di ruute, y'ede: «Wo uŋsuwo a jiire a kane ɗoŋ ollige ono Raa wo an di sooru eego.»

*Tondiyo ki munda k'armika
(Matiye 12.38-42)*

²⁹ Kane ɗoŋ duuru an d'ettiyo k'ume k'Isa. Aame an t'ugiye maŋ, y'a iise rootiyo, y'ede: «Ita ɗuwo ɗoŋ ankenno eŋ, kane ɗoŋ ulpi, an tondiyo munda k'armika a kize Raa yi n'igibo. Wo armika ti doolo Raa y'an k'isa ye, daa ki armika ere Raa y'ize ti kaaga a nebi Zonas ye maŋ. ³⁰ Kun suune Zonas y'a guune munda

wede Raa y'an di gize a dɔŋ geeger Ninib*. Geŋ inkiŋo nuŋ wede an n'ehe aa ulo wede eŋ, n'a koono munda wede Raa y'an kiza a dɔŋ ankenno kay. ³¹ A onniyo ere Raa yi deŋka booro gette, mohita ere ti siido ki kese dandi† t'a ooziga ki tukki duwo dɔŋ ankenno, wo t'an di roota: "Kune'ŋ booro t'unni ziida." Ti roota inkiŋo kono tod' t'iizigo ti siidiyagi dɔŋ dokki t'ita Raa kono t'a olliga suuniyo k'ono ere ki Salamon, wo a enno i d'ede wede ede y'a jiire Salamon sey. ³² A onniyo ere Raa yi deŋka booro gette, dɔŋ geeger ki Ninib an d'ooziga ki tukki duwo dɔŋ ankenno, wo an di roota: "Kune'ŋ booro t'unni ziida." An roota inkiŋo kono aame dɔŋ geeger ki Ninib an illiga Zonas yi gizite urzi k'ono Raa maŋ, an di-gime lekkiyadaŋ. Wo a enno i d'ede wede ede y'a jiire Zonas sey.»

Eda kane toore tudde
(*Matiye 5.15; Markus 4.21; Lik 8.16*)

³³ «Wenda soo toŋ y'a-t'oyye pitila kono yi-ti t'ombida, ise y'a-t'ossibe bogoro umbo. Ki too maŋ y'a ti dodde t'awwa kono dɔŋ ette k'adda biino an di wolle toore. ³⁴ Eda kane aa pitila ki tudde. Aame edaya kane bee maŋ, tudda pay tiŋ adda toore, wo aame edaya kane bee ye maŋ, tudda pay tiŋ adda zimolo. ³⁵ Inkiŋo maŋ ki koono metike kono toore wede a tudda geŋ, a ki t'ise zimolo ye. ³⁶ Wo aame tudda pay adda toore daa munda ki zimolo maŋ, tudda pay gettiŋ adda

* **11:30** 11.30 Kun wollo adda mattup ki Zonas 3.3-5. † **11:31** 11.31 Mohita ere ti siido ki kese dandi: I-kaza mohita ere ti siido Seba. Kun wollo adda mattup ki 1 Mozagi 10.1-13.

toore, geŋ aakede pitila ti tooriyo tuddá ti tooratu wede kereŋ geŋŋo.»

*Isa ti Pariziyen wo ti d'of suuniyo k'oogoro
(Matiye 23.4,6-7,13,25-27,29-31,34-36)*

³⁷ Aame Isa y'a ti d'inge onamí maŋ, i d'ede wedusu soo yoŋ Pariziyen y'a ti y' wiike y'a oomey di yode. Isa y'a t'iide k'adda boy, wo an di-guune ombo. ³⁸ Yo Pariziyen y'a ziida giggiri aame yi wulle Isa ki poone y'a t'eese ombo'ŋ, beezí yi k'upile ye aa moŋgidagi an ruute me. ³⁹ In'kino maŋ yo Galmeega yi di ruute, y'ede: «Kun ollo, kune Pariziyen! Kune'ŋ kulso ti bogoro kun t'opilso daaraŋ beehiye, wo addugun ōoniyo boo ti tama k'oogire wo ti bundiko. ⁴⁰ Kune d'of elkisagun umbo, kun suune kereŋ Raa wede ikkima ume ti paate geŋ, ikkima ume t'adda toŋ yode me. ⁴¹ Wo ki too maŋ a kane d'of an k'ede munda ye, kun an elo t'addugun pay, in'kino kune kun t'isa kamileŋ.

⁴² Wo dabar a kune Pariziyen! Kune'ŋ a urzi zakka, kun d'eliyo zakka a Raa ki ita suldi d'of sunni sunni i d'eliyo un'suwo a zaami, ise puutagi d'of ki zaami toŋ maŋ. Wo de munda wede kun d'ise ki diine a d'uwu, ti geyyiso ki Raa, kane geŋ kun d'ooliyo a kese. Ki too maŋ ki poone kane geŋŋo d'of kun d'ozire eego me, wo suldi d'of sunni sunni toŋ kun ki'n ooli ye.

⁴³ Dabar a kune Pariziyen! Kune'ŋ adda boydi d'of in di dooyiso, kun geyyiso kun koone a ume wede suma, wo a bere d'of duuru toŋ, kun geyyiso d'uwu an un di'n t'eesite ti ottilso.

⁴⁴ Dabar a kune! Kune'ŋ d'of aakede muuziyagi

daa zappu mongali, don an sooru eego daa suuniyo a urzi k'oogoro an t'isiyo ganigi a daana Raa me‡.»

⁴⁵ Wede soo ti diine don suuniyo k'oogoro yi di ruute a Isa, y'ede: «Wede dooyisadey, a onamá gen kee ki kalda kaye ti kane pay.» ⁴⁶ Isa yi di'n gime onami, y'ede: «Dabar a kune don suuniyo k'oogoro pay! Kune'n duwo kun di'n isiyo ki toogo an di daane urziyagi k'oogoro don ti doolo kune batum kun a ziipe t'eggun t'ekki don ki Raa, sarkiyatu oone aakede kun zaapu attidi a dar. Wo a attidizan gen, kune ti yilsagun soo ton kun aa ki bottiyo ye ki noogiyadan me. ⁴⁷ Dabar a kune! Kun aabuɗu muuziyagi majjandani ki nebiyagi ti kaaga, kane don mongidagun an ti'n iide. ⁴⁸ A onamgun ti suldi don kun isiyo gen, i-kaza kun iyye a naabo ere ki mongidagun g'ize te, kono kane an ti'n iide nebiyagi me, wo anken kune kun d'aabuɗu muuziyagan. ⁴⁹ Kono kamo Raa ti suuniyo k'ono ere i d'ede gette y'a ruute, y'ede: “Nuɗ n'an t'igiba nebiyagi ti don zina, don ongon ti diinayan an ti'n t'ida, don ongon an di'n dabira.” ⁵⁰ T'ume k'eesiyo duniya bini anki, an iide nebiyagi baadan, wo kono ki puuzadan gette kune duwo don ankenno Raa y'un ti'n t'ela dangay. ⁵¹ Ki poone an iide Abel, san don ti doolo bini Zakari wede an y'iide adda booro Boy Raa, a diine k'ume sedefe ti Boy Raa. Eyye, wo kun ollo n'un di rooto, kane don ankenno en Raa yi ti'n t'ela dangay kono ki puuzadan.

‡ **11:44** 11.44 Kun wollo adda mattup ki Lebitik 5.3 wo Nombire 19.11.

⁵² Dabar a kune don suuniyo k'oogoro! Kune'n kun a-t'ippe a urzi wede i d'eliyo suuniyo ki Raate. Kune batum kun ki sooru eego ye, wo a don i dehu an d'ozire eego kun an t'iigire.»

⁵³ Aame Isa yi t'udde t'adda boy genno man, kane don suuniyo k'oogoro ti Pariziyen an di gulkuwe baadan ti yode, wo an di y' tundite a urzi k'ono baadan. ⁵⁴ Inkino gen kane an i ekkiyo ikka kono an t'oonna munda wede butte adda k'onami.

12

*Kun koono mentikagi ti don bizaŋ sire sire
(Matiye 10.19-20,26-33)*

¹ Aame gen don duuru baadan baadan an t'ugiye, ume an d'ozire ton umbo, an t'onjilse dugganan. Isa y'an di ruute ki poone a sanal-liyagi, y'ede: «Kun koono mentikagi a orme wede ki Pariziyen, i-kaza an d'ede bize wede sire sire. ² Derec, suldi don pay ombide'n, saŋ onniyo soo a t'oodiba ita, wo ono don pay i ki dehu duwo an k'olliga ye gen, saŋ onniyo soo duwo an di'n olliga. ³ Kono kamo suldi don pay kun ruute a zimolo gen, saŋ onniyo soo duwo an di'n olliga kereŋ, wo munda wede kun miline a kuude bakagun adda biino appiya gen, saŋ onniyo soo an di y' roota aa an a ti gili t'ekki biino an d'olle.»

Wedusu wede kun i-d'orgide

⁴ «Lanziyagi ki nuŋ kun ollo, n'un di rooto: Kun an orgide ye a don i towwo tudde, wo saŋ man an k'aane an aa k'ise munda ti doolo sey

ye. ⁵ Nun n'un di y' kaza wedusu wede kun i-d'orgide me: Kun orgido a Raa, yode wede aame kun t'inda man, i-d'ede toogo y'un di'n t'ette k'adda k'uwwo. Eyye, wo kun ollo n'un di rooto, geŋ a yode kun i-d'orgide me.

⁶ Kun suune ooyo paat doo miŋ in t'owile ti soŋko sire kollo, wo ti diinayan soo toŋ Raa i ki dandiya ye. ⁷ Wo soŋ ilali k'eggun geŋno toŋ Raa yi ti'n kaza pay. Inŋkino kun orgide ye, kono kune zooyagun yi jiire ooyo baadan!»

Wede ono uɔɔde ti bizi a daana duwo yoŋ ti Isa

⁸ «Kun ollo, n'un di rooto, wede tuuku yi ruuta a daana duwo yoŋ ki nuuno man, nun wede an n'ehe aa ulo wede eŋno toŋ, n'a rootey kay yoŋ ki nuuno a daana maaleekiyagi doŋ ki Raa me. ⁹ Wo de wede tuuku yi ruuta a daana duwo yi ki n' suune ye man, nun toŋ n'a rootey ni ki y' suune ye kay, a daana maaleekiyagi doŋ ki Raa me. ¹⁰ Wede tuuku yi ruuta munda ulsu a tukki nun wede an n'ehe aa ulo wede eŋno man, a oldikadi gette Raa yi-t'isa tambobino. Wo de wede tuuku i kaldita Unde Kamilen man, a oldikadi gette Raa yi-k'isa tambobino ye.

¹¹ Aame an un di'n t'iidey k'ume doŋ booro adda boydi doŋ in di dooyiso, ise ki daana doŋ deero, ise ki daana mozagi toŋ man, ulbugun un t'oodey ye a maana k'ono doŋ kun d'oofibey eggun, ise a munda wede kun di rootey me. ¹² A uume geŋ miŋ Unde Kamilen t'un di'n dooyey a munda wede kun di rootey me.»

Ono ombife a tukki wede laale elkisadi umbo

¹³ I d'ede wedusu ti diine don duuru yi di ruute a Isa, y'ede: «Wede dooyiso, ki rooto a leemadó y'ay ti dokkidí laale ki meegey wede y'ay iili me.»

¹⁴ A wede gen Isa yi di ruute, y'ede: «Wee wee i ni ziipe wede d'ekkiyo booro a suldugun, ise wede dokkide laalagun me?» ¹⁵ Saŋ maŋ y'an di ruute a don pay, y'ede: «Kun koonā mentikagi, kun okkibe a suldí pay ye, kono lekkiyo wedusu ere ki kotto gette t'ettiyo t'urzi suldí don ki laale ye, ise yon laalayí baadan ton maŋ.»

¹⁶ Inŋino maŋ y'an d'ide taaya t'urzi k'ono ombide, y'ede: «I d'ede wedusu ki laale, i-d'ede dombi majjandani yi-darniyta. ¹⁷ Yo yi rootiyo t'adda k'addí, y'ede: “Nuŋ gen n'aase mummino, n'a obita mudizó a ume too me, ume oo k'ede ye me?”

¹⁸ Saŋ y'a ruute sey, y'ede: “Enno munda wede n'aasa me, giyyagó en n'a-kossita, n'an aabida ti doolo deero, mudizó pay ni-t'obita adda wo suldí don ti doolo ton maŋ.

¹⁹ Saŋ ni di roota a tuddó batum: hay nuŋ gen me, enno suldí kaca kaca k'ozzinagi baadan, n'apuuka, n'a ooma, n'a siba wo n'aasa unsuwo.”

²⁰ Wo Raa yi di ruute, y'ede: “Kee wede elkisadá umbo, a didfo ettiyo batum nuŋ undá ni t'amba, wo gen suldí don pay k'ukume aaye?”» ²¹ Isa y'a ruute sey, y'ede: «Gen aasa inŋino ki wede y'okumso laale a yode batum, wo yi k'okumso laale ki suldí Raa ye me.»

*Zaapu k'adde a Raa
(Matiye 6.25-33)*

²² Maŋ Isa y'an di ruute a sanalliyagí, y'ede: «Gen kono k'inŋino n'un di rooto: Kune a

lekkiyaguṅ ulbuguṅ un t'ooḍe ye a urzi k'omḅo, ise a urzi k'ossiyo ere ki tudduguṅ toṅ maṅ. ²³ Ki kotto lekkiyaguṅ ere kun lekkiyo ette ti jiire omḅo, wo tudduguṅ ti jiire ossiyo. ²⁴ Kun wollo gaagagi, an ki korso ye, an k'ayḍu ye, an k'ede giyyagi ye wo ume ti doolo k'obite k'ombadaṅ ye, wo Raa yi di'n modḍiyo. Wo kune'ṅ ki kotto kun i jiire embi taṅ baadaṅ! ²⁵ Wee wee ti diinaguṅ, ti ulbe k'oodiyo wede i-d'ede geṅ, y'aane y'a d'aagila ti kedise soo onniytagi ḍoṅ ki lekkiyadi a duniya ette? ²⁶ Aame a sulḍi ḍoṅ bo-boolon ḍaṅṅal toṅ kun k'aane ye maṅ, ḍe ki moo me kune ulbuguṅ un d'oodiyo a sulḍi ḍoṅ pay ti doolo a urzi lekkiyaguṅ me? ²⁷ Kun wollo bobbo soole, ti d'ohire, ti ki naabiya ye, ti k'isiyo kallagi ye. Wo kun ollo, n'un di rooto: Mozigo Salamon toṅ ti laale wede pay i-d'ede geṅ, yi k'usse ye kalle wede majjaane aakede bobbo soole soo toṅ maṅ. ²⁸ Inḱino Raa yi-ti y'ossiyo soole wede adda balḍa aṅki kuti kutiṅ, wo soggo an t'oggiyo adda k'uwwu mendí. Geṅ taṅ miibi a ceere Raa y'un di'n osse kune batum me! Ki kotto kune zaapu k'adduguṅ a Raa baata! ²⁹ Wo kune ulbuguṅ un ki t'ooḍe daayum a urzi deḥutu k'omḅo ti sobo ye. ³⁰ Sulḍi pay geṅ, daayum i'ni deḥutu kane ḍoṅ pay adda duniya i ki suune Raa soo ḍaṅṅal ye geṅṅo. Wo Meeguguṅ Raa, yoṅ yi suune sulḍi geṅ kun i deḥu a urzi lekkiyaguṅ me. ³¹ Ki too maṅ kun deḥo ki poone Moziko Raa, wo saṅ sulḍi geṅ y'un di'n t'ela kay.»

*Laale wede a kandaane
(Matiye 6.19-21)*

³² «Kune aakede torɔo moode ere baata toŋ maŋ, kun orgide ye! Derec, Meegugun Ra a yi wulle maŋ beehiye Mozikadi y'un di-t'ele me. ³³ Sulɔugun ɔon un d'ede kun t'owilto, wo soŋko kun an di dokko a ɔon an k'ede munda ye. Kun soko zaada ere i ki ruumiyo ye wo ti laale wede i ki dagga ye a kandaane, a ummey wede k'oogire yi k'aana yi ki botta ye, a ummey amma toŋ ti ki ti y' latta ye. ³⁴ Derec, a ume wede laalagun yi lekkiyo geŋ, addugun toŋ anɛnɛno.»

*Doŋ naabo i lekkiyo zeere
(Matiye 24.43-51)*

³⁵ «Kun ti ketto toonugun a munda wede kun ise, wo pintilagun oyyisito. ³⁶ Kun lekko aakede ɔon naabo ɔon an delliyo kama ki goolayan ti tarnaape seedu, kono saŋ aame y'iina wo yi guppa biza maŋ, kesiko an i-di t'ihina. ³⁷ Unsuwo a ɔon naabo geŋno, ɔon goolayan a kamadi yi'ni t'oona kane zeere. Derec in kino wo n'un di rooto: Yoŋ yi-t'ossa sulɔi naabo, y'a ti'n koon a ɔon naabadi me, wo aame geŋ yoŋ y'an t'ela omb o. ³⁸ Aame yi-kimo a didɔo meeda ise ki biza soohe toŋ maŋ, yi'n uuna kane zeere maŋ, geŋ unsuwo a kane.

³⁹ Ono eŋ kun ollo koduwo: Aame wede ɔoy geŋ yi suune peedo ere wede k'oogire y'etto maŋ, yi k'ooli wede k'oogire yi-ki t'ette k'adda ɔoozi ye. ⁴⁰ Kune toŋ maŋ kun koon a mentikagi, kono nuŋ wede an n'ehe aa ulo wede eŋ, n'etto a peedo ere tuuku kun ki ti suune ye.»

Wede naabo i seedu zakidi a naabadi

⁴¹ Injino maɲ Piyer y'a yi tunde, y'ede: «Galmee'ki nuɲ, ono ombide ki'ni rootiyo eɲ a kaye daɲɲal kunuɲ, a ɗuwo pay ko?»

⁴² Maɲ Galmeeɲa yi di ruute, y'ede: «Injino maɲ wede yeeriyo wede i seedu zakidí a naabadí wo i-d'ede elkiyo geɲ, a yode geɲɲo galmeeɲí yi oola attidí pay ki ɗoɲ naabadí oɲgoɲ me, kono y'an t'ela ombadaɲ aame peeɗo t'iida maɲ. ⁴³ Uɲsuwo a wede naabo geɲ me, aame galmeeɲí a kamadí yi y'uuna y'isiyo naabo gettiyo maɲ. ⁴⁴ Derec injino wo n'un di rooto: Wede injino geɲ galmeeɲí yi di t'ela attidí ki sulɗizí pay a beezí. ⁴⁵ Wo ɗe aakede wede naabo geɲ y'ilka adda k'addí, y'iisa: "Galmeeɲó eɲ yi t'ússo", wo yi t'iida taazu ɗoɲ naabo ti doolo kuuli wo erayi, yi t'ussa a ombo ti sobito i jiira eedí. ⁴⁶ Aame geɲ galmeeɲí y'a aana a onniyo ere wede naabo geɲ yi k'elkiyo ye, wo a peeɗo ere yi ki ti suune ye. Galmeeɲí yi di t'ela daɲɲay ere zakidí wo yi-t'ela aggadí aa ki ɗoɲ i ki zaapu addaɲ a Raa ye.

⁴⁷ Wede naabo wede i suune munda wede galmeeɲí yi dehu, wo y'a ki t'ikkima tuddí y'a ki t'ize ye naabo ere aa galmeeɲí yi dehu te maɲ, yoɲ geɲ y'a t'oona kossiyo baadaɲ. ⁴⁸ Wo wede naabo wede yi ki y' suune ye munda wede galmeeɲí yi dehu me, wo yi t'ize naabo ere y'a t'oone kossiyo maɲ, kossiyadí t'aase baata. A wede sulɗi baadaɲ an i ele a beezí geɲ, an tonda baadaɲ kay, wo a wede an ziipe addaɲ baadaɲ geɲ, an tonda baadaɲ sey a ceera.»

Isa y'iido ki moo me?

49 «Nuŋ n'iido n'a-t'oyye uwwo a duniya te, wo aŋkeŋŋo eŋ ni dehu t'adde soo, tod' ti ziiɗa baa. 50 Nuŋ n'a aɗɗa t'urzi dabar aakede an ni suyyiso batem, nuŋ biza k'ulbó i zehiso wo a zehita bini ɗaŋgiya ki suyyiso batem gettiyo. 51 Kune kun elkiyo nuŋ n'iido n'un t'ela toose adda duniya ko? Aha, wo n'un di rooto, kono nuuno geŋ ɗuwo tuddaŋ an ti-t'ahinta. 52 Ti aŋki eŋ ɗoŋ adda ɓoozaŋ kane paat maŋ, tuddaŋ an ti-t'ahinta, ɗoŋ aɗo ki tukki ɗoŋ sire, wo ɗoŋ sire ki tukki ɗoŋ aɗo. 53 Meege y'a t'ahina ti tukk'ulí wo ulo ti tukki meegí, meede t'a t'ahina ti tukk'ututú wo uto ti tukki mettú, ande t'a t'ahina ti tukk'ere k'ulutú wo ere k'ulutú ti tukk'andutú.»

Suuniyo k'ita sulɗi ɗoŋ i-kaza munda wede aana
(Matiye 16.2-3)

54 Isa y'a ruute sey a ɗoŋ duuru, y'ede: «Aame kun wolleiyo dondirso ti koliyo ti kese peedo k'ooriyo maŋ, a kaamiki kun d'eesiyo: “Mizzi yi koppa”, wo geŋ ki kotto i-t'isiyo. 55 Wo aame kun owwiyo maaye yi baahu ti kese ki ɗandí maŋ, kun d'eesiyo: “Ume aŋki y'isa wehini”, wo geŋ ki kotto i-t'isiyo*. 56 Kune ɗoŋ biziguŋ sire sire, kun d'aaniya kun di suuniyo ita sulɗi ɗoŋ kun wolleiyo t'edaguŋ isiyo a siido wo a kandaane me, wo ɗe ki moo me ita sulɗi ɗoŋ Raa y'isiyo aŋkeŋŋo kun ki'n suuniyo ye me?»

* **12:55** 12.55 Di kane Yawudiyagi an wolleiyo dondirso ti koliyo ti kese peedo k'ooriyo maŋ, an d'eesiyo mizzi yi koppa. Wo aame an owwiyo maaye yi baahu ti kese ki ɗandí maŋ, an d'eesiyo ume aŋki y'iisa wehini, geŋ a di kine iŋkino ye.

*Tôwwo k'ono ti aduzá
(Matiye 5.25-26)*

⁵⁷ «De ki moo me munda wede ki diine kune batum kun d'ise, kun ki y' suuniyo ye me?
⁵⁸ Aame ti leemadá un ede ono, wo kune a urzi kun ette k'ume wede booro botto geŋ, ti yode ono kun ti'n ôodo. Para maŋ y'a-da t'iida k'ume wede booro maŋ, wede booro y'an gi di t'eley a bey k'asigiryagi, wo kane an ki ti t'eley dangay.
⁵⁹ Ki kotto n'a di rooto, t'ume geŋ ki ki t'adfa ye, daa ki munda wede an dehu k'an ki y'ela pay ye maŋ, tammiyagi doŋ suŋŋi suŋŋi toŋ an a-k'oola ye.»

13

I dehu kun di-kime lekkiyagun

¹ Aame geŋ i d'iido duwo an i-t'iide taaya a Isa, mummino Pilat y'ele urzi doŋ miibi ti siido Galile an di'n iide, aame an isiyo sedeke a Raa geŋ me. ² Isa y'an di'n gime onamaŋ, y'ede: «Kune kun elkiyo aame kane doŋ ti siido Galile an ti'n iide in kino geŋ, i-kaza kane doŋ k'oldiko a jiire doŋ ti siido Galile ti doolo pay ko? ³ N'un di rooto aha, wo aame kun ki ti gima lekkiyagun ye maŋ, kune toŋ kun di-t'inda pay aa kane. ⁴ Wo kane doŋ koomat makumu gessire boy wede sohuru ki Silowe y'an di ti'n ruuge an t'inda geŋ, kun elkiyo kane doŋ k'oldiko a jiire doŋ ki geeger Zeruzalem ti doolo pay ko? ⁵ N'un di rooto aha, wo aame kun ki ti gima lekkiyagun ye maŋ, kune toŋ kun di-t'inda pay in kino kay.»

Ono ombife a tukk'undumu daa k'inŋizi

⁶ Saŋ maŋ Isa y'an di ruute ono ombide enno, y'ede: «I d'ede wedusu yi d'iite undumu sündi pigiye adda doome k'inda biŋ. Onniyo soo yo wede geŋ y'a iido yi dehu yi rakke inŋizí, miŋ umbo yi ki d'uune ye. ⁷ Inŋino maŋ yi di ruute a wede naabadí, y'ede: “Ki wollo, pigiye eŋ îide ozzine ado ni d'ettiyo d'ettiyo ni rakke inŋizí miŋ ni k'ooniyo ye. Inŋino ki ti y' deŋko, yi t'ambu ume ki bita.” ⁸ Wo wede naabo yi di'n gime onamí, y'ede: “Galme'e'ki nuŋ, ki y'oolo y'a-t'ozzine sey k'aŋki me, siido itadí n'a-t'ottiba a t'isa d'olŋite, maŋ n'a d'obita iizi. ⁹ Geŋ inŋino ozzine ki daana eŋ koo yi t'eha maŋ, umbo pi maŋ k'a ti y' deŋka kollo.”»

Eliyo beeko a erewo a onniyo ere ki puukiyo

¹⁰ Onniyo soo ere ki puukiyo Yawudiyagi maŋ, Isa yi dooyiso d'uwu adda boy wede Yawudiyagi ge dooyiso. ¹¹ A ume geŋ i d'ede erewo, siitan ti ziiida diine dartú i-d'ede ozzine koomat makumu gessire, ti lekkiyo ottilso ume t'a t'ôhira d'elele umbo. ¹² Aame Isa yi ti wulle maŋ, y'a ti wiike wo yi di ruute, y'ede: «Erewo no, koŋ te kettiyo ye baa, m'uune bee ti eenizí me.» ¹³ Yoŋ yi di ziipe beezí a tuddutú, a kaamiki t'a t'îhira d'elele wo t'a iise tamma Raa. ¹⁴ Wo yo goole boy geŋ yi-ti gulkuwe a beeko ere Isa yi ele a erewo a onniyo ere ki puukiyo Yawudiyagi gette. Inŋino y'a t'îhina bizí wo y'an di ruute a d'oŋ duuru, y'ede: «Adda suuk i d'ede onniyo zoot ere ki naabo te. Kune kun dehu beeko maŋ, kun d'etto adda k'onniytagi geŋno, a onniyo ere ki puukiyadiŋ ye.» ¹⁵ Maŋ Galmeega yi di'n gime onamí,

y'ede: «Kune dɔŋ biziguŋ sire sire, a onniytagi dɔŋ ki puukiyadiŋ wede tuuku toŋ yi-t'eeziyo ti kuulaye'ŋ burizí koo, ise buurizí koo maŋ, kun an t'eliyo ahu dee me? ¹⁶ Erewo ette tod'te ti biza bumbu k'Ibirayim, Meeda siitandani ti ti-gitte i-d'ede ozzine koomat makumu gessire, geŋ i k'ise ye ko a onniyo ere ki puukiyadiŋ kino, ni di t'eeze sibatú me?» ¹⁷ A rootiyo k'Isa gette, kane pay dɔŋ k'olmidayí an ziidá sukiyagi, wo kane pay dɔŋ duuru geŋ ulbaŋ unse a suldí dɔŋ pay y'isiyto i ceeriyo eego geŋ me.

*Ono ombide ekk'ulo k'undumu sundí mutard
(Matiye 13.31-32; Markus 4.30-32)*

¹⁸ Maŋ Isa y'a ruute, y'ede: «Moziko Raa tod' ti deeyiso toŋ aa moo me? N'a t'eeze tod'te aa moo me? ¹⁹ Tod' ti deeyiso aa ulo k'undumu soo sundí mutard wedusu y'a t'umbe y'a-giira adda jineene. Saŋ a t'udde, a t'ize undumu wo embi an d'appiyta boydí ekki laydayí.»

*Ono ombide a tukk'orme
(Matiye 13.33)*

²⁰ Isa y'a ruute sey, y'ede: «Moziko Raa n'a t'eeze tod'te aa moo me? ²¹ Tod' ti deeyiso aa orme erewo ti-sokiyo booloŋ, t'a-t'obe a moono baadaŋ lootiyo, wo saŋ orme geŋ moono yi-ti t'oozige pay.»

Biza bumbu wede peryeye

²² Aame Isa y'ambe ki Zeruzalem geŋ, yi d'ettiyo geeger ti geeger, ille ti ille, yi dooyiso duwo. ²³ Maŋ i d'ede wedusu y'a yi tunde, y'ede: «Galmee'ki nuŋ, de geŋ Raa yi d'utta duwo

boolonɗan ɗanɗal ko?» Injokino Isa y'an di ruute a ɗon duuru, y'ede: ²⁴ «Kun ollo, n'un di rooto, kun elo gotono kun t'odo ti biza peryeye. Derec, ɗon ɗaadan an deha an t'ette ti biza geɗɗo wo an ki d'aana ettiyo ye.

²⁵ Saɗ onniyo t'aana ere wede boy y'a t'ooziga wo biza y'a di-t'ippa ti kerle, maɗ kune kun d'oopaa ti paate. Aame geɗ kun t'eesa koppiyo a biza bumbu, wo kun di roota: "Galmeegey, k'ay t'ohon!" Wo yoɗ y'un ti'n kima onamguɗ, y'a t'eesa: "N'un ki'n suune ye kune ti tunda me."

²⁶ Injokino maɗ kun di roota kun t'eesa: "Kaye ay d'iimito, ay d'iibito ti kee kaɗ soo, k'a duuyite a urziyagi ki geegirzey pây." ²⁷ Wo yoɗ y'un di roota sey: "N'un ki'n suune ye kune ti tunda me. Kun ti ledɗo dokki ti tuddó me, kune ɗon pay isiyo sulɗi ɗon ki diine ye." ²⁸ Wo aame kun wulley Ibirayim, Isaaka wo Yakup ti nebiyagi pay adda Moziko Raa, wo kune an un ti'n zibbey ti paate maɗ, a ume geɗ kun ɗillitey moolo wo kun d'aadimey sina. ²⁹ Wo i d'etto ɗuwo sey ti kese peedɗo ti koliyo, ti kese peedɗo k'ooriyo, ti kese k'awwa wo ti kese ɗandɗi, an di-kooney an d'oomey kaɗ soo adda Moziko Raa. ³⁰ Injokino maɗ ɗon ongo ankenɗo kane k'ita, saɗ an t'isa ɗon ki biza, wo ɗon ongo ankenɗo kane ki biza, saɗ an t'isa ɗon k'ita.»

*Ono k'Isa a tukki Zeruzalem
(Matiye 23.37-39)*

³¹ Aame Isa y'a ti ɗinge ti dooyiso maɗ, i d'ede ɗon miibi ti diine Pariziyen, an aa d'iide sirpa k'Isa wo an i-di ruute, an'de: «Kee t'enj ki

t'oozo k'engilo k'ume doolo, kono mozigo Erod yi dehu tówwadá.» ³² Wo Isa y'an di ruute, y'ede: «Kun'do kun i-ti rootoy a yo wede metike aa boo yi ti daggiya d'uwó geŋ, kun'de: "Isa y'ede aŋki ti soggo yoŋ y'a limmiti siitandani wo y'a t'ele beeko a d'óŋ k'eeni, wo a onniyo ere k'aduwe maŋ, naabadí y'a-ti d'aŋga." ³³ Wo ni roote eŋ a kune: i dehu aŋki, soggo wo soŋŋo kino geŋ, n'a eŋgila ki d'aanadó, ki too maŋ d'erec nebi y'a t'inda a Zeruzalem, a ume doolo ye.

³⁴ Wayya kune d'óŋ Zeruzalem no, wayya kune d'óŋ Zeruzalem no! Kune d'óŋ i tówwito nebiyagi, wo d'óŋ Raa y'un akkisa kun ti'n kakkisa ti moŋgali kun ti'n tówwo. Nuŋ taŋ baadaŋ n'a dihe n'un ti'n tusse aa ôsso ti tussiyo inñitú adda kambartú, wo d'e kun ki dihe ye. ³⁵ Inŋkino maŋ boygunŋ Raa y'un di y'oola. Wo kun ollo n'un di rooto, nuŋ kun ki n' wolla ye baa, bini a t'ída onniyo ere kun di roota: "Beeko Raa ti koona a ekki wede ettiyo ti suma Galmeega Raa*."»

14

Eliyo beeko a wede k'eeni

¹ Onniyo soo ere ki puukiyo Yawudiyagi maŋ, Isa y'a t'iide ombó di wede soo ti diine deero Pariziyen. Kane d'óŋ a sirpa geŋ, ersadaŋ a tukk'Isa tak. ² Aame geŋ i d'ede wedusu tuddí t'iiziga, y'a t'íhira a d'aana yode. ³ Isa y'a t'ihina bizí, y'a tunde kane d'óŋ suuniyo k'oogoro ti Pariziyen, y'ede: «To oogiradiŋ tiŋ urzi t'ele

* **13:35** 13.35 Kun wollo adda mattup ki Soom 118.26.

kunuj, ti k'ele ye ko, k'eliyo beeko a wedusu a onniyo ere ki puukiyadiŋ te?»⁴ Wo a onamí geŋ kane an d'inniga d'ed'edek. Injino maŋ wede geŋ Isa y'a yi butte, yi-d'ele beeko wo y'a-y'igibe ki boozí.⁵ Saŋ y'an di ruute, y'ede: «Ti diinagun eŋ wee wee, aame i-d'ede ulo ise buru yi t'iire adda k'osso a onniyo ere ki puukiyadiŋ maŋ, y'a k'ette, t'adda k'osso y'a ki y'adde ye me? Eyye, kesiko y'a-t'adde!»⁶ Wo a onamí geŋ, kane an di roote munda an ki suune ye.

Beeriyo k'ume konso adda tarnaape

⁷ Isa yi wulle'ŋ d'oŋ an'ni waaku k'ombo'ŋ, an beeriyo omagi konsito d'oŋ majjandani. Injino y'an di ruute a kane pay geŋ t'ono ombide enno, y'ede:⁸ «Aame wenda yi ki wiike a tarnaape ki seedu maŋ, k'etta ki koonna ume wede suma a jiire ye. Koo ise an wiiko wede goole i jiire kee y'a-koonna maŋ,⁹ wo wede unni wiike kee ti yode geŋ, y'a etto y'a di roota, y'a t'eesa: “Ume eŋ ki t'oozo, ki oolo a yode enno.” Injino k'a t'ooziga ti sukiyagi, k'etta k'a-kooney a ume k'ita.¹⁰ Ki too maŋ an ki wiiko geŋ, k'odo ki-koonoy a ume k'ita, injino aame wede i ki wiiko y'iina maŋ, yoŋ y'a di roota, y'a t'eesa: “Lanze ki nuŋ, kee ki t'oozigi, ki-koonna a ume ki daana a ise majjaane kino.” Injino maŋ a kee a di t'isa suma a daana kane d'oŋ pay ooma ti kee kaŋ soo geŋ me.¹¹ Derec, wede tuuku tuddí yi ti-koliyo maŋ, Raa y'a y'isa ŋenku, wo wede tuddí yi ti-t'isiyo ŋenku maŋ, Raa y'a y'isa goole.»

Waaku d'oŋ an k'ede munda ye

¹² Isa yi di ruute sey a wede i y' wiike geɲ, y'ede: «Aame ki dehu ki waake ɗuwo an d'oomi di kee, ise a peedo t'ize diine, ise a peedo t'ette k'ooriyo toɲ maɲ, ki waake lanziyagá ye, zembadá ye, taasiyagá ye wo ɗoɲ bey a ita waayadá ye, kono kane geɲɲo toɲ saɲ an gi di waaka kay, inkiɲo ombadá aakede an a-ti gime. ¹³ Wo ki too maɲ, aame ki waake ɗuwo a tarnaape di kee maɲ, ki waako ɗoɲ an k'ede munda ye, ɗoɲ kesiyagaɲ soo soo, ɗoɲ jekese wo ɗoɲ koɲzayi. ¹⁴ Geɲ kee ulbá aasa uɲse, kono kane an k'ede munda an a-ki ti y' kima ye. Inkiɲo a di ti y' kima Raa, a onniyo ere ɗoɲ ki diine a ɗaanadí an ti bilɗa maɲ.»

*Ono ombiɗe a tukki tarnaape goole
(Matiye 22.1-10)*

¹⁵ Wede soo ti diine ɗoɲ an ti guune ombo, y'illiga ono ɗoɲ Isa yi ruute geɲɲo maɲ, yi di ruute, y'ede: «Uɲsuwo a wede i kooney ombo adda Moziko Raa.» ¹⁶ Wo Isa yi di ruute t'ono ombiɗe eɲɲo, y'ede: «Onniyo soo wedusu yi d'ize ombo baadaɲ, maɲ yi wiike ɗoɲ baadaɲ. ¹⁷ Aame ombo ettú t'iide maɲ, wede boy y'a igibe wede naabadí kono y'an di kizo a ɗoɲ yi'ni wiike. Wede geɲ y'iide'ɲ, y'a ruute, y'ede: “Kun'di, ombo ettú t'iide baa.” ¹⁸ Inkiɲo maɲ kane ɗoɲ pay yi wiike geɲ, wede soɲ yi-t'isiyo tambobino tambobino. Wede ki poone yi di ruute a wede naabo, y'ede: “Nuɲ ni iwila doome, i dehu n'a ette n'a ti y' wollo ɗo. Kee k'o t'isi tambobino.” ¹⁹ Wede doolo yi di ruute, y'ede: “Nuɲ ni iwila buɲgari koomat ki naabo sire sire, wo n'ette n'a

ti'n naamey. Kee k'o t'isi tambobino." ²⁰ Wede doolo sey yi di ruute, y'ede: "Nuñ ankenno ni ziida erewo ni morbiyo, kono k'injino ni k'aane ettiyo ye me." ²¹ Wede naabo geñ y'a-gime k'ume galmeegí, y'iide'ñ yi di t'iide taaya a onaman geñ me. Aame geñ wede boy yi di gulkuwe wo yi di ruute a wede naabadí, y'ede: "K'okko kesiko k'omagi don duwo ge lekkiyo, k'adda k'urziyagi don adda geeger, ki waaki kane don an k'ede munda ye, don kesiyagan soo soo, don konzayi wo don jekese, k'an d'an t'edi kenno." ²² San man wede naabo geñ y'a-gimo k'ume galmeegí, yi di ruute, y'ede: "Galmeek'i nuñ, naabo ere k'o ruute n'aase ni-t'izo, wo ume ede sey." ²³ Injino man wede boy yi di ruute a wede naabadí, y'ede: "K'okko sey ki urziyagi dombi, k'adda jinendani, wo don ki t'ooney a daanadá geñ, t'urzi tuuku ton ki ti'n waaki an t'edi k'adda boy kono boozó a done. ²⁴ Geñ kun ollo, n'un di rooto, kane don ni wiike ki poone geñ, wenda soo ton i k'ooma ye ombadó te."»

Urzi daaniya k'Isa

(Matiye 16.24-28; Markus 8.34-9.1)

²⁵ Don duuru baadan an daaniya Isa, man y'a-gime ki tuddan wo y'an di ruute, y'ede: ²⁶ «Aame wede yi ni daane man, i dehu nuñ y'a ni geyye a ceere meegí, meedí, eddí, inñizí, zembadí kuuli erayi, wo tuddí batum ton man. Para man yi k'aane yi ki t'ise sanallusizó ye. ²⁷ Wede tuuku yi k'iyya y'a ki t'inda kono nuuno wo y'a ki n' daane ye man, yon geñ yi k'aane yi ki t'ise sanallusizó ye. ²⁸ Injino aame wede ti diinagan»

yi dehu y'a ooziga boy sohuru maɲ, ki poone y'a-koone y'a-kize soŋko ki sulɗi ɗoŋ pay y'owilta, wo y'a wolle aame soŋkadí i-t'ída tówwo boy maɲ. ²⁹ Wo ɗe aame yi-ziipa ita ɗaŋŋal wo boy y'a ki ti y'íida ye maɲ, ɗoŋ pay i wolla geɲ an di y' t'okka maade, ³⁰ an t'eesa: "Wede eɲ yi-t'iise oozige boy miɲ naabadí y'a-ki ti ɗiɲge ye." ³¹ Inɲino kay, aame mozigo yi dehu y'ette ɗeyyiso mozigo bakadí wede ettiyo ti asigiryagi dupu ada sire geɲ, ki poone y'a-koone y'a wolle toogadí, aame y'aane ɗeyyiso ti asigiryagi dupu koomat geɲɲo maɲ. ³² Aame yi k'aane ye maɲ, yi-t'igibe ɗoŋ zina ki tukki mozigo bakadí ki poone yoŋ ɓotto dokki geɲ, y'a ti y' tondo toose t'a koone diinayaɲ.» ³³ Isa y'a ruute sey, y'ede: «Geɲ inɲino kay, i dehu wede tuuku ti diinagun sulɗi ɗoŋ pay i-d'ede'ɲ, y'an ooli. Para maɲ yi k'aane yi ki t'ise sanallusizó ye.»

*Sumade ɗoŋ daa k'unɲuwadaɲ
(Matiye 5.13; Markus 9.50)*

³⁴ «Kane sumade'ɲ munda wede beehiye, wo ɗe aame sumade unɲuwadaɲ i t'ize umbo maɲ, kaɲ mummino k'an ise unɲe sey me? ³⁵ Kane geɲ i k'ise beehiye ki ruumiyo siido ye, ise ki guuru toɲ i k'ise ye, inɲino kane geɲ ki sebbiyo mendaɲ a disse. Wede i-d'ede kuwwa k'ollige maɲ, y'ollo koduwo!»

15

*Ono ombife a tukki damu gi digge
(Matiye 18.12-14)*

¹ Doŋ seŋdu jibaaye ti doŋ k'oldfiko doolo, kane pay an aa d'iide ki sirpa k'Isa kono an di y'olliga. ² Kane Pariziyen ti doŋ suuniyo k'oogoro an d'orbe sunni sunni a tukk'Isa, an'de: «Wede en doŋ k'oldfiko yi di'n seedu bey sire wo yi d'ombo ti kane.» ³ Injino maŋ Isa y'an d'iise tôwwo taaya t'ono ombide enno, y'ede: ⁴ «Aame wede soo ti diinagun i-d'ede dambami meeda wo ere soo t'a digge maŋ, ki kotto doŋ ada gessat makumu gessat geŋ yi d'ooli adda balda, y'a-kime dehutu ki ere i digge, bini y'a ti t'oono. ⁵ Wo aame yi t'uuno maŋ, yoŋ ulbí unse baadan, y'a t'ambo a dannayí, ⁶ y'a t'aahe boy, saŋ y'a waake lanziyagí ti doŋ k'ita waayadí, wo y'an di roote, y'a t'eese: “Kun iso unsuwo ti nuuno, kono nuŋ damuzó wede i digge ni y'uuno baa!” ⁷ Kun ollo, n'un di rooto, geŋ injino kay aasa unsuwo baadan a kane doŋ a kandaane, kono wede k'oldfiko soo yi-gime ti lekkiyadí ere oldo gette. Unsuwo ere a tukki wede soo gette, a ceera ere a tukki doŋ ada gessat makumu gessat kane ki diine wo an ti gime lekkiyadan geŋno.»

Ono ombide a tukki tamma i digge

⁸ «Wo kun ollo sey, i d'ede erewo soo injino tammiyagutú koomat wo soo i di t'iire maŋ, geŋ ki kotto tod' t'a modde pitilatú, binditú t'a rooke, t'a dehite boolo boolon bini t'a ti t'oone. ⁹ Wo aame ti t'uune maŋ, t'a waake lanziyagutú ti doŋ k'ita waayatú, t'an di roote, t'a t'eese: “Kun iso unsuwo ti nuuno, kono nuŋ tammadó ere i digge ni t'uune baa.” ¹⁰ Kun ollo, n'un di rooto, geŋ injino kay aasa unsuwo baadan a diine

maaleekiyagi dɔŋ ki Raa, kono ki wede k'oldiko soo yi ti kama ti lekkiyadí ere oldo gette.»

Ono ombide a tukki ulo gi digge

¹¹ Isa y'a ruute sey, y'ede: «I d'ede wede soo inċino inñizi kuuli sire. ¹² Onniyo soo, ulo wede ñenċu yi di ruute a meegí, y'ede: “Baaba, kee k'o eli aggadó ere saŋ ni t'oona t'adda laalayá geŋŋo.” Inċino maŋ meegaŋ y'an di diikida laalayí a inñizi sire geŋŋo. ¹³ Onniyo miibi k'ita maŋ, yo uló wede ñenċu geŋ aggadí y'a t'iwilte pay wo y'a ziida soŋko, y'a inċile ki siido ere dokki. A ummey geŋ yi-t'iide adda lekkiyo ere k'arbutu, inċino maaladí pay y'a t'irbe. ¹⁴ Aame maaladí pay yi ti d'inge maŋ, i d'ize mosogo baadaŋ adda siido gette, wo yon munda a beezi umbo. ¹⁵ Aame geŋ y'a t'iide naabo di wede soo ki d'ɔŋ siido gettiyo, wo yo wede geŋ y'a y'igibe k'adda doomizi elso kinzir. ¹⁶ Ulo geŋ y'a dihe yi d'aadi inñi boriyo d'ɔŋ an sebbiso a kinzir, wo wenda soo toŋ i di t'ele umbo. ¹⁷ Inċino maŋ a lekkiyadí gette yi d'elkiso adda k'addí, y'ede: “Doŋ naabo meegó baadaŋ, an d'ombo i di'n palda! Wo nuŋ a eŋŋo n'unto ki mosogo! ¹⁸ N'a-kima di meegó wo ni di rootey, n'a t'eesey: Baaba, ni t'ize oldiko a Raa wo a kee. ¹⁹ Ni k'iide k'a ki n' wolle aa ulá ye baa, inċino ki n'iso aa wede soo ti diine d'ɔŋ naabadá.” ²⁰ Maŋ y'a t'iiziga, y'a-gime k'ume meegí.

Aame ulo yo dokki boolon ti boy geŋ, meegí y'a yi wulle, wo i di t'ize sommagi baadaŋ. Y'a ukke okkimayí, y'iide'ŋ y'a yi ziida yop. ²¹ Inċino maŋ ulo yi di ruute, y'ede: “Baaba, ni t'ize oldiko

a Raa wo a kee. Ni ki t'îide k'a ki n' wolle aa ulá ye baa." ²² Wo meegí y'an di ruute a don naabadí, y'ede: "Kesiko, kun ambi kalle wede goole majjaane a jiire wo kun i-t'osso a ulo me. Kun i t'eelo kokkide a yelsadí wo zonđi kun i-t'osso tobiyagi. ²³ Kun soodí ulo buru wede bokkide, kun t'ôodo, in d'ooma wo in d'isa tarnaape, ²⁴ kono ulo nun kun wolliyo en, yon aa y'inda wo anken aa yi bilde, yon yi digge wo anken ni y'uune." Man an d'iise isiyo tarnaape.

²⁵ Aame gen ulo kabbadí yon a doome. A kamadí ti doome gen, aame y'iina goppon ki boy man, y'ollige tarkuuse k'otoro ti ommire. ²⁶ Man yi wiike wede soo ti diine don naabo, y'a yi tunde, y'ede: "De ize moo me?" ²⁷ Wede naabo yi di ruute, y'ede: "Gen leemadá aaho me, wo meegá yi d'îide ulo buru wede bokkide, kono ulí yi y'uune yi lekkiyo bee." ²⁸ Inkinno man ulo kabba yi di gulkuwe wo yi ki dehu k'adda boy yi k'ette ye. Meegí y'a t'ud'fo yi di y' selliyo, y'ede: "Ulo ki nun, ki t'edi k'adda boy me." ²⁹ Wo ulo yi di'n gime ono meegí, y'ede: "K'ollo kay baaba, nun ozzinagi baadan n'a naabiya me, wo nyuyur kan soo ton ni k'ize ye a munda wede k'o rootiyo me, wo a nun gogguru soo danjal ton k'o k'eele ye, kono n'a t'ise unsuwo ti lanziyagó me. ³⁰ Wo a ulá wede enno kotto man, yode wede maaladá pay y'a ti diggo y'a t'irbo ti erayi, aame y'iina man a yode ki-d'îide ulo buru wede bokkide!" ³¹ Man meegí yi di ruute, y'ede: "Ulo ki nun, kee daayum ti nun wo suldi pay don oo d'ede ton kane ki kee. ³² Wo gen i dehu kine in d'ise tarnaape wo in d'ise unsuwo, kono leemadá en

yonj aa y'inda wo ankenj aa yi bilde, yonj yi digge wo ankenj ni y'uune."»

16

Ono ombide a tukki wede yeeriyo metike

¹ Saŋ Isa y'an di ruute a sanalliyagí, y'ede: «I d'ede wede laale soo injino, yonj i-d'ede wedusu yi di yeeriyo laalayí. Wede laale geŋ d'uwó an i d'iido ti rabila, kono wede yeeriyo yi-ti y' daggiya laalayí me. ² Maŋ wede laale y'a wiike wede yeeriyo wo yi di ruute, y'ede: "Kee n'illiga naabadá ere k'isiyo te, k'o t'ôodi taaya a urzi naabadá, kono ki ki yeera ye baa laalayó me." ³ Injino maŋ wede yeeriyo y'a ruute t'adda k'addí, y'ede: "Nuŋ eŋ n'aasa mummino, t'ume naabo yeeriyo galmeegó yi-ti'n addiya geŋ me? Ki derku nuŋ toogadó umbo, wo k'ahultu a nuŋ sukiyagi. ⁴ Geŋ ni suune munda wede n'a isa me. Injino aame t'ume naabo yeeriyo yi n'udda maŋ, d'onj ede an di n' seeda di kane me." ⁵ Injino maŋ kane d'onj i zidde seeyagi ki galmeegí, y'a ti'n wiiko soo soo. Yi di ruute a wede ki poone, y'ede: "Kee ginno seezá miibi ki-t'ela a galmeegó me?" ⁶ Yonj yi di'n gime onamí, y'ede: "Bonjali ada sire k'egey k'inŋi k'olibiyé." Wede yeeriyo yi di ruute, y'ede: "Mattup ki seezá ettiyo, kesiko ki kooná ki raanja bonjali koomat." ⁷ Saŋ yi di ruute a wede doolo, y'ede: "Wo kee me, seezá miibi ki t'ela me?" Yonj yi di'n gime onamí, y'ede: "Suwal meeda pide ki geme." Wede yeeriyo yi di ruute, y'ede: "Mattup ki seezá ettiyo, ki raanja suwal meeda ado." ⁸ Wo

yo galmeega y'a y'imme wede yeeriyo wede ki diine ye geɗ me, kono y'ize'ŋ metiŋko. Injino maɗ kane d'ofɗ duniya a urzi lekkiyo ere ti tuddaɗ gette, kane mentikagi an jiire kane d'ofɗ ki Raa toorayí a eedaɗ.»

⁹ Isa y'a ruute sey, y'ede: «Wo kun ollo, nun n'un di rooto, kun sodfo laɗziyagi ti laale wede kun ooniyo t'urzi wede ki diine ye geɗ me. Injino onniyo soo yo laale geɗ ti beyguɗ yi d'ikka maɗ, kane laɗziyagi an un di'n seedey adda boydi d'ofɗ d'uwɔ an di lekkey ki daayum. ¹⁰ Wede a naabo ere ɗeɗko boolon yi ti seedu zakidi geɗ, a naabo ere meeda toɗ d'uwɔ an zaape addaɗ a yode kay. Wo wede a naabo ere ɗeɗko boolon yi ki ti seedu zakidi ye geɗ, a naabo ere meeda toɗ d'uwɔ an ki zaape addaɗ a yode ye kay. ¹¹ Injino maɗ, aame kune a laale wede kun ooniyo t'urzi wede ki diine ye eɗ, kun ki y' ziidfa zakidi ye maɗ, Raa toɗ yi k'aane y'un ki t'ele a beyguɗ ye laale wede ki kotto me. ¹² Wo aame a laale wede ki kune ye kun ki y' ziidfa zakidi ye maɗ, Raa toɗ y'un ki t'eley ye laale wede ki kune me.

¹³ Wede naabo soo toɗ umbo a aane a naabe ti galmaawi sire me, ise maɗ soɗ y'a y'olmida wo y'a-geyye soo me, wo ise maɗ y'a di kette ti wede soo me wo soɗ y'a yi kiigira. Kun k'aane kun ki ti daane ye, urzi Raa wo urzi soɗko sirwaɗ pay me.»

Urzi Moziko Raa

¹⁴ Aame kane Pariziyen an illiga ono d'ofɗ pay Isa yi ruutite geɗɗo maɗ, an di y' koobiyto kono kane soɗko an ti geyyiso. ¹⁵ Isa y'an di ruute, y'ede: «Kune a d'aana d'uwɔ kun ti t'isiyo

tuddugun aa d'ofon ki diine, wo Raa addugun yi'ni suune, kono munda wede d'uwu an yi woliyo goole gen, Raa yi y'azzuru a daanadi me.

¹⁶ Ono d'ofon an riije ti kaaga adda mattup k'oogoro Muusa ti d'ofon ki nebiyagi gen, urzizan a iide bini aaniya Zan Batis. T'ume gen an di kazita Rabila Majjaanawa ki Moziko Raa, wo wede tuuku ton yi d'eliyo gotono kono yi-t'ette k'adda. ¹⁷ Wo kun ollo koduwo, ooŋe a kandaane ti siifo an t'engile me, wo ooŋe baadan sey a arku raaniya soo wede nenku a jiiire k'oogoro ette y'a dagge me.

¹⁸ Wede tuuku eddi yi ti biira wo y'a ziida erewo ti doolo man, Raa yi y' woliyo yon wede i moone t'ere bakadi. Wo wede yi ziida erewo ere kulatu yi ti-biire man, Raa yi y' woliyo yon wede i moone t'ere bakadi.»

Ono ombife a tukki wede laale kane ti Lazar

¹⁹ San man Isa y'an d'iide taaya, y'ede: «I d'ede wede laale soo inkino kallagi y'ossiyo ki ramica zooyatu ooŋe, daayum yi lekkiyo togos adda k'unuwo wo daayum yi d'isiyo ombo baadan aa ki tarnaape, duwo an d'ombo. ²⁰ I d'ede wedusu i-k'ede munda ye sundi Lazar, tuddi kundayi risimik kan moone a biza bumbu ki wede laale genno. ²¹ Yon y'a dihe y'a oomi ombo ere i soldite t'ekki taabul ki wede laale genno ton umbo, wo de kane gahiti ton an d'ettiyo an di daldutu kundayzi.

²² Wede i-k'ede munda ye y'inda man, maalekiyagi an t'umbe undi ki sirpa k'Ibirayim. San wede laale ton y'a inda, an t'ittiba. ²³ Wo kan unde y'a t'iide k'adda diine d'ofon unto, wo a

ume geɲ yi dabirsa baadaɲ. Maɲ y'a umbɛ edayí k'awwa, y'a wulle ti dokki Ibirayim wo Lazar a sirpadí. ²⁴ Injino y'a idili, y'ede: "Ibirayim mee'ki nuɲ, k'iso adde koduwo a nuɲ, k'agibi Lazar yi d'onko ahu a biza yilsadí, y'o di zozza a bizó, ilzó a t'orsa kono ni dabirsa baadaɲ adda k'uwo ette." ²⁵ Wo Ibirayim yi di ruute, y'ede: "Ulo ki nuɲ, ki suune aame kee adda duniya lekkiyadá ki tuuze tuuziyo, wo Lazar y'uune dabar baadaɲ. Wo anken Raa yi ti y' zille a enno me, wo kee ki-t'iide adda dabar baadi." ²⁶ Wo son i d'ede oldɛ sohuru wo goole aa buldume a diine kune ti kaye me. Injino maɲ don i dehu ette t'enno k'ume kune, an k'aane ye, wo don t'ume kuɛ an dehu an d'etto k'ume kaye, an k'aane ye." ²⁷ Wede laale y'a ruute, y'ede: "Injino maɲ mee'ki nuɲ, ki wollo sommagó k'agiba Lazar ki boy meegó, ²⁸ kono oo d'ede zemba paat, y'a ette y'an di tookey kuudaɲ, kono kane ton an ki d'etto k'ume dabar enno ye." ²⁹ Ibirayim yi di ruute, y'ede: "Zembadá an d'ede mattup k'oogoro Muusa ti don ki nebiyagi, onamaɲ an'n olligey." ³⁰ Wede laale yi di ruute, y'ede: "Geɲ i k'iide ye Ibirayim mee'ki nuɲ, wo aame wede ti diine don unto y'iida y'an uuney maɲ, aame geɲ an di-kimey lekkiyadaɲ." ³¹ Wo Ibirayim yi di ruute, y'ede: "Aame mattup k'oogoro Muusa ti don ki nebiyagi, onamaɲ an ki dihe an k'olliga ye maɲ, ki kotto kane an k'ambe ye aame wede ti diine don unto y'a balɛ y'a ette ton maɲ."»

Urzi k'oldfiko ti tambobino
(*Matiye 18.6-7; Markus 9.42*)

¹ Isa y'an di ruute a sanalliyagí, y'ede: «Derec, kane suldí daayum ede donj i-t'eliyo d'wo adda k'oldfiko me, wo de dabar a yode wede i t'eliyo bakadí adda k'oldfiko. ² A wede injkino geñ, dabar ere an i di kette assa meeda a golladí an ti y' sedde adda bar gette, soodo sey ti ere yi t'ooney a daana Raa te, aame yi t'eliyo adda k'oldfiko wede soo ti diine kane donj tasse a urzi zaapu k'adde a nuuno man. ³ Kun koonamentikagi!

Aame leemadá yi t'iza oldfiko a kee man, k'odo ki y'oonoy, ki rootoy munda wede y'a ize geñ ti golla ere tasse, wo aame yi-k'illigey oldikadí yi ti zuuney yi-gimey lekkiyadí man, k'oyyo ki t'iso tambobino te. ⁴ Wo aame leemadá yi t'iza oldfiko a kee wo sanj y'a iido ki tuddá, y'a t'eese: "Leema ki nuñ, nuñ oldikadó ni ti zuune n'a-kime lekkiyadó", injkino injkino adda k'onnu tanj sarat tonj man, k'oyyo ki t'iso tambobino te.»

Zaapu k'adde a Isa

⁵ Donj zina Galmeega an i di ruute, an'de: «Zaapu k'addey a kee baata, k'ayni noogi t'a t'ihira.» ⁶ Galmeega y'a ruute, y'ede: «Ki kotto, aame kune zaapu k'addugunj a nuñ t'aase ñenjo aa ulo k'undumu sundí mutard tonj man, kun aane kun i di roote a undumu enj, kun t'eese: "T'umayá enj ki-deeto ki koonoy adda bar", ki kotto y'a olliga onamgunj, y'a-deete.»

Naabo ere in d'ise

7 «Kun ollo, aakede wede soo ti diinagun i-d'ede wede naabo yi derku ise y'elso moofe koo man. Aame yi wulle wede naabo y'aahiya ti doome man, ki kotto yi-ki roote ye: "Kesiko k'okki ki-koono ombo me." 8 Ki too man yi di roote, y'a t'eese: "K'o isi ombo, wo kallagá k'a booyo ki-t'ossi don ti doolo, ombo k'o d'eli, k'o d'eeli sobo koore ni t'iima wo n'aa t'iiba man. San a kaabadá kee k'a ooma wo k'a siba kollo." 9 Wede gen yi roota dey koduwo a wede naabadí, a naabo ere yi ruute y'aase, yi t'ize gette? Aha, yi-ki roota ye koduwo me. 10 Gen ki kune ton injkino: Aame naabagun ere an un ruute kun ti t'ize pay man, kun rooto kun'de: "Kaye don naabo ay k'ede urzi duwo an ay ki roote koduwo ye, ay ize munda wede an ay ruute ay d'ise danjal."»

Eliyo beeko a don bitide kane koomat

11 Aame Isa yo a urzi y'ette ki Zeruzalem gen, y'a udfde ti diine siidfo Samari kane ti Galile. 12 A ettiyadi k'adda k'ille soo injkino gette, don bitide koomat an t'iide an a di y' t'ikkimo. Kane an t'hirte ti dokki* 13 wo an d'iise follite, an'de: «Isa, kee wede dooyisadey, k'iso adde koduwo a kaye.» 14 Isa y'anni wulle wo y'an di ruute, y'ede: «Kun'do, tuddugun kun an ti kazoy a

* **17:12** 17.12 An t'hirte ti dokki: Kane don bitide gen an t'hirte ti dokki kono di kane Yawudiyagi, duwo an ni wolliyoo kane don bitide gen don kamileŋ ye a daana Raa me. Injkinoo man an k'ede urzi an ki d'ette ki sirpa duwo ye. Kun wollo adda mattup ki Lebitik 13.45-46.

ɗoŋ sefeke†.» Aame an'te k'ume ɗoŋ sefeke botto geŋ, a urzi bitidayan a nuƙkide an t'ize kamileŋ. ¹⁵ Wede soo ti diinayan yi wulle y'uune bee maŋ, y'a-gime k'ume k'Isa, yi-tamma Raa ti golla awwa. ¹⁶ Y'iide'ŋ y'a dikke a zoŋ k'Isa, y'a t'uttile zumayí a siido, wo y'a ruute kofuwo a Isa. Wo yo wede geŋ Samariten. ¹⁷ Inƙino Isa y'a ruute, y'ede: «Kane koomat geŋ an ki t'ize kamileŋ ye ko? Wo kane ɗoŋ gessat uune bee too me? ¹⁸ Wenda a elke y'a-kimo y'a t'imme Raa umbo daa ki torgusu enno ye maŋ?» ¹⁹ Maŋ Isa yi di ruute, y'ede: «Ki t'oozo, k'engilo. Kono kee ki ziipe addá a nuŋ geŋ, k'utte.»

Aaniya ki Moziko Raa

²⁰ Onniyo soo kane Pariziyen an di tunde Isa, an'de: «Woogo Moziko Raa t'aana me?» Yoŋ y'an di'n gime onamaŋ, y'ede: «Aaniya Moziko Raa, tod'te urzi wede aa munda kun gi di wolla t'ersaguŋ ye. ²¹ Duwo an ki roota ye: “Kun wollo tod'te a enno!”, ise “Tod'te a ummey me!” Derec kun suuno, Moziko Raa tod'te a diinaguŋ.»

²² Inƙino maŋ Isa y'an di ruute a sanalliyagi, y'ede: «Saŋ onniyo t'aana ere kun di deha kun ti n' wolle onniyo soo toŋ maŋ, nuŋ wede an n'ehe aa ulo wede eŋ me, wo umbo kun ki n' wolla ye. ²³ Aame geŋ ɗuwo an un di roota, an t'eesa: “Kun wollo yoŋ a enno!”, ise “Yoŋ a ummey!” Wo kune kun'ta ye, kun t'okkita ye. ²⁴ Wo aa kun wolliyo mizzi y'omile bididi i-ti tooriyo kandaane pay geŋ, onniyo ki nuŋ wede an n'ehe aa ulo wede

† **17:14** 17.14 Kun wollo adda mattup ki Lebitik 14.2-3.

enno ton, t'aasa inokino kay. ²⁵ Wo de ki poone i dehu n'a dabire baadan wo don ankenno en an di n' kiigira.

²⁶ Munda wede ize ti kaaga a ozzinagi don ki Nowe gen, a onniytagi don ki nuu wede an n'ehe aa ulo wede enno ton, aasa inokino kay. ²⁷ Duwo an d'ombo, an sobo, an sedfu ti tuddan bini onniyo ere Nowe yi-t'iide adda tooko ere meeda a jire. Man mizzi goole y'a guppe, ahu an t'iimi siido, inokino duwo gen pay an t'inda adda k'ahu. ²⁸ Wo son munda wede ize a ozzinagi Lot gen a aana inokino kay: duwo gen an d'ombo, an sobo, an d'owilte, an t'owilte, an d'aatiya wo an d'ossige boydi. ²⁹ Wo a onniyo ere Lot yi t'udde ti geeger Sodom man, Raa ti kandaane y'a guppe ubali k'uwoo ti moonoo ki suupire, an t'iide duwo pay. ³⁰ Gen aasa inokino kay a onniyo ere nuu wede an n'ehe aa ulo wede en, ni kiza tuddo gen me.

³¹ A onniyo gette, wede y'a ti gili yi-guune t'ekki dangayadi* wo suldzizi yi ili adda man, yi-deego sokiyo ye, yi t'ombo. Inokino kay wede yon adda doome man, yi kima ki boozii ye. ³² Kun elko a taaya k'ere Lot. ³³ Wede yi diha boohiyo tuddi k'aggadi man, y'a ti dagga, wo wede y'ila tuddi kono nuuno man, y'a t'utta. ³⁴ Kun ollo,

‡ **17:27** 17.27 Taaya ki Nowe k'a ti t'oone adda mattup ki Zenez 6.9-7.24. § **17:29** 17.29 Taaya ki Lot k'a ti t'oone adda mattup ki

Zenez 19.24-25. * **17:31** 17.31 Yi-guune t'ekki dangay: I-kaza a siido k'Izirayel gen duwo dangaydayan gen awhizan patal kono a ume muno an a di koliyo t'eego, an di lekkiyo wo an d'isiyo naabadan. † **17:32** 17.32 Kun wollo adda mattup ki Zenez 19.26.

n'un di rooto, a didfo gettiyo batum don sire an moone ongalzan soo, wede soo an di y'amba wo wede son an di y'oola. ³⁵ Erayi sire an massu kan soo, ere soo an ti t'amba wo ere soo an di t'oola. ³⁶ Kuuli sire kane adda doome soo, wede soo an di y'amba wo wede son an di y'oola.» ³⁷ Injino man kane sanalliyagi an di y' tunde, an'de: «Galmeegey, a ume too me aasa me?» Wo yon y'an di ruute, y'ede: «A ume wede nuune yi t'udiga gen, zumbi ton ti t'ogiya angenno.»

18

Ono ombide a tukki mandaayawa ti wede booro

¹ Isa yi dehu y'an di kize a sanalliyagi kono an di tonde Raa daayum an ki t'orme ye. Injino y'an di rootiyo t'urzi k'ono ombide enno, ² y'ede: «Adda geeger soo i d'ede wede dekkiyo booro, yon yi k'orgiso a Raa ye wo yi k'ottilso a wenda ye. ³ Wo adda geeger gette i d'ede mandaayawa soo injino, ti d'ettiyo daayum ki tukki yode gen me, ti d'eesiyo: "Kee k'ay t'isi booradey ti wede k'olmidayo me." ⁴ Injino aaze onniytagi baadan wede gen yi ki dehu yi-k'ise booratú ye. Wo san y'a ruute adda k'addi, y'ede: "Derec, nun a Raa ni-k'orgiso ye, wo a wenda soo ton ni-k'ottilso ye. ⁵ Wo to mandaayawa ette nun ti ti n'ormiyo, injino booratú ni di t'ise, para man ti kodfime baadan t'o ti kossa eedó."» ⁶ San Galmeege y'a ruute sey, y'ede: «Kun ollo koduwo ono ki wede dekkiyo booro wede ki diine ye yi rootiyo. ⁷ Wo yo Raa booro ki don yi biire, yi ki ti dekke ye

ko aame kane an i m̄olo on̄nu wo did̄fo maŋ? Ki noogiyadaŋ y'a-t'ôsse ko? ⁸ Kun ollo, n'un di rooto, kesiko booradaŋ y'an ti-d̄fekke. Wo nuŋ wede an n'ehe aa ulo wede eŋ, aame ni-kimo geŋ, n'iido d̄uwo ni-t'oona d̄ey ko d̄oŋ i ziipe addaŋ a nuŋ a siido me?»

Pariziyen ti wede sed̄fu jibaaye

⁹ I d'ede d̄uwo on̄goŋ an elkiyo kane d̄oŋ ki diine a d̄aana Raa, wo an di koogire d̄oŋ on̄goŋ pay. In̄kino maŋ Isa yi rootiyo ono ombide sey a tukki kane geŋno, y'ede: ¹⁰ «I d'ede d̄oŋ sire in̄kino an t'iide tondiyo Raa k'adda booro Boy Raa. Kane geŋ wede soŋ Pariziyen, soŋ wede sed̄fu jibaaye. ¹¹ Yo Pariziyen geŋ y'a t'ihira yi tondiyo Raa t'adda k'addi, y'ede: “Eyye Raa ki nuŋ, n'a di roote kod̄uwo kono nuŋ aa d̄oŋ on̄go ye, kane d̄oŋ k'oogire, d̄oŋ ki diine ye, d̄oŋ i moonite t'erayi ise ti kuuli k'eebaŋ, wo soŋ nuŋ aa wede sed̄fu jibaaye eŋno ye. ¹² Adda suuk ni lekkiyo onniyo sire daa k'om̄bo, ni d'eliyo zakka a Raa ki sul̄dizó d̄oŋ pay n'ooniyo me.” ¹³ Yo wede sed̄fu jibaaye'ŋ y'a t'ihira dokki, edayi k'awwa ki kandaane toŋ yi ki dehu yi k'ambe ye, wo y'a-t'ibi beyd̄i a ḡiggiri, y'a ruute, y'ede: “Eyye Raa ki nuŋ, ki wollo sommagi ki nuŋ wede k'old̄fiko eŋno.”» ¹⁴ Isa y'a ruute sey, y'ede: «Kun ollo, n'un d̄i rooto, yo wede sed̄fu jibaaye'ŋ y'a aahe ki boozí, Raa y'a yi wulle yoŋ ki diine, wo ki bakad̄i Raa y'a yi wulle yoŋ ki diine ye. Derec, wede tuuku tuddi yi ti-koliyo maŋ, Raa y'a y'isa n̄en̄ku, wo d̄e wede tuddi yi ti-t'isiyo n̄en̄ko maŋ, Raa y'a y'isa goole.»

Isa ti in̄ni sun̄ni
(*Matiye 19.13-15; Markus 10.13-16*)

¹⁵ Duwo an di ziko in̄ni sun̄ni a Isa kono y'an di zaape beezí a eedaŋ. Kane sanalliyagi an wulle in̄kino maŋ, an ki dehu ye, an di'n efd̄disito d̄uwo geŋ me. ¹⁶ Wo de Isa y'a ele urzi kono in̄ni an i-d'ette sirpadí, wo y'a ruute, y'ede: «Kun̄ oolo in̄ni eŋ an d'etto ki tuddó, kun ti'n eegire ye, kono Moziko Raa tod'te ki d̄oŋ i deeyiso aa kane kino. ¹⁷ Derec in̄kino wo n'un di rooto: Wede tuuku Moziko Raa yi ki ti seedu aa yi seedu ulo ñeŋku ye maŋ, yi ki t'etta ye.»

Isa ti wede laale
(*Matiye 19.16-30; Markus 10.17-31*)

¹⁸ I d'ede wede in̄kino i-d'ede gooliko y'a tunde Isa, y'ede: «Wede dooyisadey kee wede beehiye, n'aase moo me kono n'a t'oona lekkiyo ere ki daayum te?» ¹⁹ Isa yi di ruute, y'ede: «Ki moo me ki rootiyo nuŋ wede beehiye me? Beehiye Raa soo d̄aŋŋal, wenda ti doolo umbo. ²⁰ Kee urziyagi k'oogoro ki'ni suune d̄oŋ an'de: Ki moone t'ere bakadá ise ti kule bakatú ulu, ki t̄owwo wedusu mirsi ulu, k'oogire ulu, ki rootiyo k'ono butte a tukki bakadá a d̄aana booro ulu, wo ki elo suma a meegá ti meedá.» ²¹ Wede geŋ yi di'n gime onamí, y'ede: «Kane geŋ pay ni'ni seedu t'ume nuŋ obulsu to.» ²² Aame Isa y'illiga in̄kino maŋ yi di ruute, y'ede: «Kee a ki biite munda soo sey: suld̄i d̄oŋ a-d'ede'ŋ ki t'owiltoy pay wo soŋko k'an d'eloy a d̄oŋ an k'ede munda ye, in̄kino k'a t'ooney laale wede ki kotto a kandaane. Saŋ k'a t'edi wo k'a ni daana.»

²³ Aame wede geŋ y'illiga inŋkino maŋ, y'a t'ize sommagi dondoŋ maŋ, y'a ruute, y'ede: «Ki kotto ooŋe baadaŋ a doŋ maala an t'ettey adda Moziko Raa te!

²⁴ Isa yi wulle wede geŋ yi t'ize sommagi dondoŋ maŋ, y'a ruute, y'ede: «Ki kotto ooŋe baadaŋ a doŋ maala an t'ettey adda Moziko Raa te! ²⁵ Derec kun suune, ooŋe a ziŋzo ti-t'adde ti buldo rippile me, wo geŋ ooŋe baadaŋ a ceere sey a wede laale yi-t'ettey a Moziko Raa te.»

²⁶ Kane doŋ i y'ollige an di ruute, an'de: «Inŋkino maŋ, geŋ a utta wee wee?» ²⁷ Yo Isa y'an di'n gime onamaŋ, y'ede: «Munfa wede d'uwu an k'aane ye geŋ, a Raa i-k'ooŋe ye, y'aane.»

²⁸ Maŋ Piyer y'a ruute, y'ede: «Aŋkeŋ k'ollo, kaye'ŋ suldizey pay ay d'iilo wo ay di daaniya kee.» ²⁹ Isa y'an di ruute, y'ede: «Derec inŋkino wo n'un di rooto: Wede tuuku yi iila boozí, ise eddí, zembadí kuuli, maawí wo inŋizí kono Moziko Raa maŋ, ³⁰ a lekkiyo ere aŋkeŋŋo ette kane geŋ y'anni t'oona baadaŋ a ceera, wo saŋ maŋ adda duniya ere ki dfaana y'a t'ooney lekkiyo ere ki daayum.»

Ono k'Isa doŋ k'aduwe a urzi k'untadí ti baldiyadí

(Matiye 20.17-19; Markus 10.32-34)

³¹ Isa y'a ti'n wiike sanalliyagi kane koomat makumu sire ki sirpadí, wo y'an di ruute, y'ede: «Kun ollo, in ti kili ki Zeruzalem wo a ummey suldí pay doŋ nebiyagi an riine a tukki nuŋ wede an n'ehe aa ulu wede eŋ, a-t'ettey baa.

³² Inŋkino maŋ nuŋ d'uwu an di n' t'eley a bey doŋ kane Yawudiyagi ye, an di n' t'okkey maade, an di n' kilditey wo an pidfitey lee a tuddó.

³³ An di n' gorpipay ti marpa, san an aa di n' t'idey, wo onniyo sire k'aduwe man, Raa y'a ti n' bald'ey.» ³⁴ Wo kane sanalliyagi munda soo ton an ki zuune ye, ita k'ono gette an t'ize ombife, wo an ki zuune ye munda wede Isa yi rootiyo me.

*Eliyo beeko a wede koosiyo a Zeriko
(Matiye 20.29-34; Markus 10.46-52)*

³⁵ Onniyo soo Isa y'iiney goppon ki geeger Zeriko man, i d'ede wedusu koosiyo yi guune a biza k'urzi wo yi d'ahultu. ³⁶ Wede gen y'illiga tarkuuse ki don duuru engile genno man, y'anni tunde, y'ede: «De tarkuuse ki moo me?» ³⁷ Kane an i di ruute, an'de: «Gen Isa wede ti geeger Nazaret engile me.» ³⁸ Man y'a iise d'olle, y'ede: «Isa kee Wede ti biza bumbu Dawut, k'iso adde koduwo a nun!» ³⁹ Kane don i sooru ki daana an di y'ed'f'isito kono y'a anniga, wo de yon y'a d'olle i ceeriyo ki ceeriyo, yi d'eesiyo: «Kee Wede ti biza bumbu Dawut, k'iso adde koduwo a nun, k'iso adde koduwo a nun!» ⁴⁰ Isa y'a t'ihira, wo y'an di ruute, y'ede: «Wede gen kun oo ti y'arkidi.» Wo aame an i-ti y'irkido man, Isa y'a yi tunde, y'ede: ⁴¹ «Kee ki dehu n'a-d'ise moo me?» Wede gen yi di'n gime onami, y'ede: «Galmeegey, ni dehu edayó a-t'ihina.» ⁴² Man Isa yi di ruute, y'ede: «Edayá a-t'ohon k'a wollo! Kono kee ki ziipe addá a nuuno gen, k'utte.» ⁴³ A kaamiki edayí a t'ihina, man y'a diine Isa, yi tamma Raa. Kane don duuru pay an wulle injino man, an tamma Raa kay.

19

Isa ti Zaase

¹ Isa yi t'iide adda geeger Zeriko, wo yi-doopida y'engile ki daana. ² Maṅ a ume geṅ i d'iido wedusu sundi Zaase, yoṅ goole doṅ sedfu jibaaye wo yoṅ ki laale. ³ Yi dehu tu urzi y'a ti y' wolle yo Isa miṅ wee wee, wo urzi y'a ti y' wolle umbo kono duwo baadaṅ an i-t'iigire, yoṅ kupili. ⁴ Inṅkino maṅ y'a ukke ki daana, y'iide'ṅ y'a di gili ekk'undumu aa moote, kono Isa y'adda tin geṅṅo, y'a ti y' wolla. ⁵ Aame Isa y'iiney a ume k'undumu geṅṅo maṅ, y'a umbe edayi k'awwa wo yi di ruute, y'ede: «Zaase, kesiko ki-dfeegi, aṅki eṅ i dehu n'a-dfegey a di kee.» ⁶ Kesiko t'ekk'undumu Zaase yi-ti diigo, an d'aahe boozí wo y'a yi ziida Isa t'ulbe unse. ⁷ Aame duwo an wulle inṅkino maṅ, kane pay an d'orbite sunṅi sunṅi ti tuddaṅ, an'de: «Kun wollo wede eṅ, y'a diige a di wede k'oldiko!» ⁸ Wo Zaase y'a d'iide k'ume Galmeega, yi di ruute, y'ede: «Kee k'ollo Galmee'ki nuṅ, laalayó n'a-dookida omagi sire, ume soo n'an di-dokkida ki waawiye a doṅ an k'ede munda ye. Wo aame ni-t'umbe soṅko ki wenda daa k'urzutu toṅ, ni-di t'ela t'a aagila taṅ pide.» ⁹ Inṅkino maṅ Isa y'a ruute a tukki Zaase, y'ede: «Aṅki eṅ doṅ boy Zaase an uune uttiyo ere ki kotto, kono yode Zaase toṅ ti biza bumbu k'Ibirayim*». ¹⁰ Derec, nuṅ wede an n'ehe aa ulo wede eṅ, n'iido'ṅ dehu tu ki doṅ i digge adda k'oldikadaṅ wo n'an t'ele uttiyo.»

* **19:9** 19.9 Zaase toṅ ti biza bumbu k'Ibirayim: I-kaza yi ziipe addi a Raa aa ki Ibirayim.

*Ono ombide a tukki don naabo ado
(Matiye 25.14-30)*

¹¹ A kane don illiga ono gen, Isa y'an di ruute ono ombide sey kono y'iina goppon ti Zeruzalem, wo ton kane an elkiyo Moziko Raa t'aana an di wolla a kaamiki genno. ¹² Inkino man y'a ruute, y'ede: «I d'ede wedusu inkino ti biza bumbu wede goole, y'a ingile ki siido dokki ombo moziko, san y'a-kimo. ¹³ Ki poone y'a engile gen, yi wiike don koomat ti diine don naabadi, wo y'an d'eele a wede son tamma soo soo ki dap ere zooyatu onne†, wo y'an di ruute, y'ede: “Kun di naabo eego, t'aa d'aagal bini kamado.” ¹⁴ Wo kane don siidadi an y'olmide, inkino an d'igibe duwo k'itadi kono an di rootey, an t'eesey: “Kaye wede en ay ki dehu y'a k'ise mozigayey ye.”

¹⁵ Wo aame wede gen yi t'iimo moziko yi-gimo man, y'anni wiike kane don naabadi don y'an dikki sonko gette, kono y'a-wolle naabadan an aa uune t'eego moo me. ¹⁶ Wede ki poone y'a iina wo y'a ruute, y'ede: “Galmee'ki nun, ti tamma ere k'o ele gette, n'aa d'uune a iide tamma koomat ki dap.” ¹⁷ Mozigo yi di ruute, y'ede: “Gen koduwo kee wede naabo beehiye, kee a naabo ere boolon gettin k'a ti ziida zakidi, anken n'a-ki ti zaapo wede goole t'ekki geegiryagi koomat.” ¹⁸ Wede ki sirwe y'a iina wo y'a ruute, y'ede: “Galmee'ki nun, ti tamma ere k'o ele gette, n'aa d'uune a iide tamma paat ki dap.” ¹⁹ A yode genno ton mozigo yi di ruute, y'ede:

† **19:13** 19.13 Ankenno tamma ki dap soo, i-kaza dupu sire.

“Kee n’a-ki ti zaapo wede goole t’ekki geegiryagi paat.” ²⁰ Wede ti doolo y’a iina, y’a ruute, y’ede: “Galmee’ki nuɲ, ettiyo tammadá ki dap te, nuɲ n’a-gitte a buude, n’a ziipe a teddise. ²¹ N’a orgiso kono kee wehini a naabo me, ki-t’ambu munda wede i ki ziipe kee ye, wo ki d’aydu a ume wede ki ki giira ye toɲ maɲ.” ²² Maɲ mozigo yi di ruute, y’ede: “Kee wede naabo ulsu, n’a d’ekke booro a eedá ti ono d’oɲ udd’e ti bizá geɲ me. Ki suune nuɲ wehini a naabo me, munda wede i ki ziipe nuuno ye toɲ ni-t’ambu, wo ni d’aydu a ume wede ni ki giira ye maɲ. ²³ In’kino ki moo me soɲkadó k’o gi di ziipe adda baɲki ye me, t’o d’aagila, a kamadó geɲ n’iido n’a-t’ambe ti jugulu.” ²⁴ Maɲ y’an di ruute a kane d’oɲ a sirpadí geɲ, y’ede: “Tammadí ki dap te kun ti soodo, kun i elo a wede i-d’ede tamma koomat.” ²⁵ Maɲ kane an di ruute, an’de: “Galmeegey, yoɲ i-d’ede baa tamma ki dap koomat te.” ²⁶ Yoɲ y’a ruute, y’ede: “Kun ollo, n’un di rooto, a wede i-d’ede geɲ, an i-t’eela t’eego, wo de a wede i-k’ede ye geɲ, munda zí wede boolon y’elkiyo yi t’oona toɲ an i-t’amba. ²⁷ Wo d’oɲ kane adu ti nuɲ, an ki dihe n’a k’ise mozigayaɲ ye geɲ, kun ti’n waaki keɲɲo kun ti’n t’ida a d’aanadó.”»

Isa y’aa t’ette ki Zeruzalem

(Matiye 21.1-11,15-17; Markus 11.1-10; Zaɲ 12.12-16)

²⁸ Aame Isa y’a ti ruute in’kino maɲ, y’an t’uugume a d’oɲ duuru kono y’a-kili ki Zeruzalem. ²⁹ Isa y’iiney gopponɲ t’illiyagi sundan Betpaze wo Betani, a sirpa makkolo ere an ti

waaku mukkolo k'Inda k'Olibiye. A ume geŋ yi d'igibe doŋ sire ti diine sanalliyagi, ³⁰ wo y'an di ruute, y'ede: «Kun'do k'adda k'ille ere a daanagun gettiyo. Kun iiney, aame geŋ kun t'ooney ulo buuru kettiyo, wenda kaŋ soo toŋ yi ki gili ye. Kun t'eezi, kun o-t'arkidi. ³¹ Wo aame wenda y'unni tunday, y'iisey: “Kun ti y'eeziyo moo me?” maŋ, kun d'eesoy: “Buuru eŋ i dehu Galmeega.”»

³² Kane doŋ y'an agisa'ŋ an d'ingile, an iide'ŋ an di'n uuney suldi'ŋ pay aa Isa y'an ruute. ³³ Aame an iise eeziyo k'ulo buuru maŋ, kane doŋzi an di ruute, an'de: «De kun t'eeziyo ulo buuru eŋ ki moo me?» ³⁴ Kane an an di'n gime onamaŋ, an'de: «Buuru eŋ i dehu Galmeega.» ³⁵ Maŋ ulo buuru an i-d'iide a Isa, an a-ti gikkite kallagan doŋ deero a dar k'ulo buuru wo Isa an a-ti y' gili eego. ³⁶ A urzi y'ettiyo geŋ, duwo an di gikkite kallagan doŋ deero, yi sooru eego‡. ³⁷ Aame y'iina goppon ti Zeruzalem a ume deegu ti mukkolo k'Inda k'Olibiye maŋ, kane sanalliyagi baadaŋ geŋ pay ulbaŋ a uune t'unusuwo, an d'iise tamma Raa ti golla awwa a suldi k'armika doŋ pay an wullite geŋ me. ³⁸ Kane an d'eesiyo:

«Beeko Raa ti koonaa a ekki mozigo wede ettiyo ti suma Galmeega Raa!
Toose t'a koone a kandaane wo tamma a Raa t'awwa a kandaaneŒ!»

‡ **19:36** 19.36 Kakkisa kallagi a urzi kono yi sooru eego geŋ, i-kaza yoŋ wede an'ni ottilso baadaŋ. **§ 19:38** 19.38 Kun wollo adda mattup ki Soom 118.26.

³⁹ I d'ede Pariziyen miibi ti diine don duuru, an i-di ruute a Isa, an'de: «Wede dooyisadey, sanalliyagá ki'n eddiso, an d'anniga!» ⁴⁰ Wo Isa y'an ti'n gime onaman, y'ede: «Kun ollo, n'un di rooto, aame kane an inniga man, monjali ton an di dillita!»

Môolo k'Isa kono Zeruzalem

⁴¹ Aame Isa y'a t'ette ki geeger Zeruzalem wo yi ti wulle man, y'a iise môolo kono tode, ⁴² y'ede: «Wayya, wayya! Kune don ki Zeruzalem, nun ni dihe baadan kune batum, onniyo gette anki urzi wede kun di t'oono toose kun yi zuune man! Wo de umbo, ankenno edagun Raa y'un t'ippe, urzi toose kun ki y' wolle ye baa. ⁴³ Injino san onniytagi an aana eggun, aame gen don k'adugun an kilita siido a-doola geeger gette pay ki deyyisagun, an un ti'n gootika t'ume tuuku ton man. ⁴⁴ Kane an un ti'n damba kame kamec ti boydugun pay, makkolo soo ton t'ekki bakatú an k'oola ye, kono kune onniyo ere Raa y'iido tuddugun, kun ki dihe kun ki di y' suune ye.»

Isa ti don suuk a booro Boy Raa

(Matiye 21.12-13; Markus 11.15-19; Zan 2.13-16)

⁴⁵ San Isa yi-t'iide a booro Boy Raa, wo y'a iise lommitte don isiyo suuk*. ⁴⁶ Y'an di ruute, y'ede: «Kun ollo, ono en an riine ti kaaga adda mattup ki Raa, an'de: “Boozó en y'a koono boy wede ki

* **19:45** 19.45 Isiyo suuk adda booro boy Raa, ki suldi don k'eliyo sedefe a Raa ulu ye. Wo kane an ti diile, an oogire duwo t'urzi koliyo zooye suldi. Injino man Isa y'an iise lommitte.

tondiyo Raa†.” Wo de kune, kun di y’ize urmi k’ombide don k’oogire‡!»

⁴⁷ Isa gen onniyo ti onniyo yi dooyiso duwo a booro Boy Raa. Kane deero don sedefe ti don suuniyo k’ogoro wo ti don deero Yawudiyagi gen, an dehuu urzi ki towwadi, ⁴⁸ wo de urzi an ki y’ooniyo ye, kono kane don pay an ollige baadan dooyisadi gette.

20

T’urzi k’aaye Isa yi dooyiso me?

(Matiye 21.23-27; Markus 11.27-33)

¹ Onniyo soo Isa yi dooyiso duwo wo y’an kazita Rabila Majjaanawa a booro Boy Raa. Man kane deero don sedefe, don suuniyo k’ogoro ti don i dokkiyo Yawudiyagi, an d’iido tuddi ² wo an i di ruute, an’de: «Kee k’ay ki ti rooti doo, k’isiyto suldi en t’urzi k’aaye? Wo urzi en a ele wee wee?» ³ Isa y’an di’n gime onaman, y’ede: «Nun ton n’un di’n tondo a munda soo. Onamo kun o ti’n kami: ⁴ Aame Zan duwo y’anni zuyye batem gen, urzi iido ti Raa kunun ti duwo ko?» ⁵ Man an d’iise rootiyto ti tuddan, an’de: «Aame kine in ruuta: “Iido’ng t’urzi Raa” man, yon y’a roota: “Inkino ki moo me kun ki d’umbe a ono Zan ye me?” ⁶ Wo aame kine in ruuta: “Iido’ng t’urzi duwo” man, don duuru pay an in ti’n kakkita ti mongali ki towwadin, kono kane an zuune adda k’addan Zan yon nebi.» ⁷ Inkino man Isa onami an i-ti’n gime, an’de: «Ay ki suune ye

† **19:46** 19.46 Kun wollo adda mattup ki Ezayi 56.7. ‡ **19:46** 19.46 Kun wollo adda mattup ki Zeremi 7.11.

wenda i ele urzi me.» ⁸ Maŋ Isa y'an di ruute, y'ede: «Nuŋ toŋ maŋ n'un ki y' roote ye kay, wede o ele urzi ni d'isiyto suldi eŋ me.»

*Ono ombide a tukki doŋ naabo doome ulpi
(Matiye 21.33-46; Markus 12.1-12)*

⁹ Saŋ maŋ Isa y'a iise rootiyo a doŋ duuru t'ono ombide eŋŋo, y'ede: «I d'ede wedusu inŋkino yi d'iite doome k'inda sundan biŋ, maŋ doome geŋ y'an d'ele duwo an di naabe saŋ yoŋ aggadí y'a t'amba. Wo yoŋ tuddí y'a inŋgile torguwo, y'a ki kimo kesiko ye. ¹⁰ Aame onniyo rakku t'iina maŋ, y'a igibe wede naabadí soo ki tukki doŋ naabo doome geŋŋo, kono an i di t'elo aggadí ere k'inŋni biŋ an rikke te. Aame y'iiney maŋ, kane doŋ naabo doome'ŋ wede naabadí an di y' ziida, an di y' gusse, an aa di y'igibe beezí guguba. ¹¹ Wede doome'ŋ yi d'igibe wede naabadí ti doolo, wo yode geŋŋo toŋ an di y' ziida, an di y' gusse, an a-ti y' gildite, an aa di y'igibe beezí guguba. ¹² Wo yi d'igibe wede naabadí k'aduwe sey, yode geŋŋo toŋ an i-t'eelite kundfayi, wo t'adda doome an aa di y'ilmi. ¹³ Inŋkino maŋ wede doome k'inda biŋ y'a ruute t'adda k'addí, y'ede: “De n'aase mummino me? N'a t'igiba ulo ki geyyisadó, a yode geŋ koo an i otiley maŋ.” ¹⁴ Wo de aame kane doŋ naabo doome'ŋ ulo an yi wulle maŋ, an d'iise rootiyto ti tuddan, an'de: “Eŋŋo ulo wede doome i oopa me! In y'odo kono doome eŋ in d'ooapa a kine.” ¹⁵ Maŋ ulo geŋ an di y' ziida, t'adda doome an di y'irkiŋe ki toogo ki paate, wo an di y'iide.»

Mañ Isa y'a ruute, y'ede: «Wo aņkenj wede doome k'inda biñ y'an d'isa mummino? ¹⁶ Yoñ y'a etto, d'oj naabo doome geñ y'a ti'n t'ida wo doome k'inda biñ y'an t'ela a d'oj naabo doolo, sañ aggadí y'a t'amba.» Aame kane d'wo an illiga ono geñno mañ, an di ruute, an'de: «Aha, iñkino geñ i k'isa ye!» ¹⁷ Wo Isa yi di'n wolliso adda k'edayañ wo y'an di ruute, y'ede: «I-kaza moo me ono d'oj an riñe ti kaaga adda mattup ki Raa, an'de:

“Mokkolo ere d'oj k'oozige boy an di zidde mentú gette,
tode gettiyo a t'ize mokkolo ere majjaanawa a jiire k'oozige boy*” te?

¹⁸ Wede tuuku y'a t'iira ekki mokkolo gettiyo mañ, y'a-damba, wo aame mokkolo gette ti-di t'iira a wenda mañ, t'a ti y' ñoguma.» ¹⁹ Kane deero d'oj sedefe ti d'oj suuniyo k'oogoro, an di zuune kereñ Isa yi rootiyo ono ombide geñ ti kane me. Iñkino mañ an di dihe an di y' seeda aame geñno batum, wo de an d'urgide a d'oj duuru.

*Eliyo jibaaye a mozigo goole ki Romen
(Matiye 22.15-22; Markus 12.13-17)*

²⁰ Mañ kane geñ Isa an di y'iise gerdiyo. Wo an i d'igibe d'wo an ti t'ize tuddañ aa d'oj ki diine, kane an dehu an di y' seedey t'urzi tondiso, kono aame yi ti ruuta butte mañ, an t'oona urzi an i-di y' t'ela a bey goole siido. ²¹ Kane an di y' tunde, an'de: «Wede dooyisadey, ay suune ono d'oj ki rootiyo wo ti dooyisada kane a urzizañ, ki'ni

* **20:17** 20.17 Kun wollo adda mattup ki Soom 118.22.

wolliyo d'uwu pay kaŋ soo wo ki dooyiso urzi Raa t'ono d'ofɔŋ d'erec. ²² Anken, a urzi k'oogiradin min jibaaye a mozigo goole ki Romen gen k'eliyo kunuŋ, k'eliyo ye ko?» ²³ Wo Isa metinkadan y'a ti zuune, wo y'an di ruute, y'ede: ²⁴ «Kun o k'eeli tamma soo n'a ki wolle d'ofɔ. Undiso ti suma ekki tamma ette k'aaye?» Kane an i di'n gime onamí, an'de: «Ki mozigo goole ki Romen.» ²⁵ Maŋ Isa y'an di ruute, y'ede: «Inkino maŋ munda wede ki mozigo goole ki Romen yon ki yode kun i y'elo, wo munda wede ki Raa yon ki yode kun i y'elo.» ²⁶ A onamí d'ofɔŋ yi rootiyto a daana d'uwu gen, an ki d'iine seeduzí ye, wo a ono d'ofɔŋ y'anni gime gen kane an ziida giggiran wo an d'inniga deddek.

Bald'ya tin ede ko?

(Matiye 22.23-33; Markus 12.18-27)

²⁷ Don miibi ti diine d'ofɔŋ an'ni waaku sundan Saduseyen, an d'iide sirpa k'Isa. Kun suune kane Saduseyen an rootiyo d'ofɔŋ i t'inda an ki ti balda ye. Inkino Isa an di y' tunde, an'de: ²⁸ «Wede dooyisadey, Muusa yi riine ti kaaga adda mattup k'oogoro munda wede in d'ise me, y'ede: "Aame wede yi ziida erewo wo y'a inda daa magine maŋ, mandaayawa gette leemadí y'a ti seeda kono an t'ehe inni a suma ki wede inda genno†." ²⁹ Inkino aakede i d'ede zemba kane sarat. Wede ki poone y'a ziida erewo wo y'a inda daa magine. ³⁰ Wede ki sirwe y'a ti ziida wo y'a inda daa magine, ³¹ saŋ wede k'aduwe ton inkino. Kane sarat gen an di duude pay, wo an t'inda wenda

† **20:28** 20.28 Kun wollo adda mattup ki Deeterenom 25.5-6.

soo ton yi k'uune magiṇe ye. ³² K'ita maṇ tode ton t'aa d'inda kay. ³³ Injino maṇ a onniyo ere d'oj i t'inda an ti balda geṇ, ti diine kane zemba geṇ erewo gette t'aasa k'aaye, kono kane sarat pay geṇ miṇ kulutú me?»

³⁴ Isa y'an di ruute, y'ede: «Kuuli ti erayi an sedfu tuddaṇ adda duniya ettiyo. ³⁵ Wo de ki kane d'oj Raa yi'ni wulle an iide ki baldiya ti diine d'oj unto wo an di lekka a duniya ere ki dfaana gette, kane kuuli ti erayi an ki sedfa tuddaṇ ye baa. ³⁶ Kane geṇ an ki t'inda ye baa, kono an t'ize aa maaleekiyagi. Kane inṇi Raa, kono ti unto an ti bilde. ³⁷ Wo a urzi baldiya ki d'oj i t'inda geṇ, Muusa yi ruute kereṇ adda taaya ki beyga k'undumu oggiyo uwwo dala dala gette, aame geṇ y'a yi wiike Galmeega Raa, "Raa k'Ibirayim, k'Isaaka wo ki Yakup‡."» ³⁸ Isa y'a ruute sey, y'ede: «Raa geṇ yon Raa ki d'oj unto ye, yon Raa ki d'oj zeere, kono a yode kane pay geṇ zeere§.» ³⁹ Doṇ suuniyo k'oogoro miibi ti diinayaṇ an i-di ruute, an'de: «Wede dooyisadey, onamá ki ruute geṇ a urzizaṇ.» ⁴⁰ An rootiyo injino kono an urgide, an di y' tondite ti doolo sey me.

*Almasi yon ulo k'aaye?
(Matiye 22.41-45; Markus 12.35-37)*

‡ **20:37** 20.37 Kun wollo adda mattup ki Egzod 3.6. § **20:38** 20.38 Raa geṇ yon Raa ki d'oj unto ye, yon Raa ki d'oj zeere: I-kaza kane d'oj afo Ibirayim, Isaaka wo Yakup geṇ an t'inda ti kaagine ozzinagi baadan, ki poone Raa yi di roota a Muusa botto. Aame yi rootiyo kane zeere maṇ, geṇ i-kaza baldiya ede.

⁴¹ Isa y'an di ruute, y'ede: «Mummino me duwo an di rootiyo Almasi Raa yi biire, y'adfo ti biza bumbu Dawut me? ⁴² Wo yode Dawut batum y'a ruute ti kaaga adda mattup ki Soom*, y'ede:

“Galmeega Raa yi di ruute a Galmeegó, y'ede: K'edi ki-koonaa a ammidadó kino,

⁴³ bini dɔŋ k'aduzá n'an isa aa munda ki bita ti dandí zɔŋdǎ.”

⁴⁴ Injino maŋ Dawut yi yi waaku Almasi “Galmeega.” De geŋ mummino Almasi y'a adfo ti biza bumbu Dawut daŋŋal me†?»

Ondirso a duwo a tukki dɔŋ suuniyo k'oogoro (Markus 12.37-40)

⁴⁵ Isa y'an di ruute a sanalliyagí a daana dɔŋ pay i y'ollige, y'ede: ⁴⁶ «Kun koonaa mentikagi ti dɔŋ suuniyo k'oogoro! Kane an geŋyiso sooru ti kallagi deero a arga boy, wo a bere dɔŋ duuru an geŋyiso duwo an an di'n t'eesite ti ottilso. Adda boydi dɔŋ in di dooyiso, an geŋyiso an koone a ume wede suma, wo adda tarnaapagi a ume k'ombo toŋ, an geŋyiso an koone a ume wede suma pây. ⁴⁷ Kane geŋ bey mandaydayi an t'ombo pay, wo soŋ an eesiyo tondiyo Raa maŋ ki noko nokot kono duwo an di'n wolle. Kane geŋ booradan t'a kooney wehini a ceerey.»

* **20:42** 20.42 Kun wollo adda mattup ki Soom 110.1. † **20:44** 20.44 Mummino Almasi y'a adfo ti biza bumbu Dawut daŋŋal me: Geŋ i-kaza y'etto ti sirpa Raa, ti biza bumbu Dawut daŋŋal ye.

21

Mandaayawa i-k'ede munda ye (Markus 12.41-44)

¹ Saŋ Isa y'a umbe edayí, maŋ yi wolliyo doŋ laale an eliyo soŋkiyagaŋ a Raa, a ume wede an d'eliyo soŋko a booro Boy Raa. ² Wo yi wulle soŋ mandaayawa i-k'ede munda ye, tod' t'ele soŋko sunŋi sunŋi sire. ³ Maŋ Isa y'a ruute, y'ede: «Derec inŋkino wo n'un di rooto: Mandaayawa i-k'ede munda ye ette, tod' t'ele a jiiire ki kane doŋ oŋgo pay. ⁴ Derec, kane doŋ laale pay geŋ an ele t'adda soŋko ere an uupe oopiyo, wo de tod'te k'umbatú'ŋ t'a d'ele pay soŋko ere ii guute ki lekkiyatú te.»

Ono doŋ a urzi ruugiyo Boy Raa (Matiye 24.1-2; Markus 13.1-2)

⁵ I d'ede doŋ miibi an di rootiyo a tukki Boy Raa, an'de: «Yo boy eŋ, moŋgalí ti oozigayí wo ti sulfi doŋ duwo an i ele a Raa, kane pay majjandani.» Wo Isa y'a ruute, y'ede: ⁶ «Boy kun yi wolliyo eŋ, saŋ onniytagi an d'aana mukkolo soo toŋ t'ekki bakatú i ki lekka ye, pay a ruuga.»

Onniytagi doŋ etto ki dabar (Matiye 24.3-8; Markus 13.3-8)

⁷ Inŋkino maŋ kane an di y' tunde, an'de: «Wede dooyisadey, de sulfi geŋ an aana woogo me? Wo moo me munda wede a kiza onniyo kino sulfi geŋ an aana me?» ⁸ Isa y'an di'n gime onamaŋ, y'ede: «Kun koonna mentikagi, kun oola tuddugun a duwo an un ti'n dagga ye. Derec, i d'etto doŋ baadaŋ an t'ambo sundó, wede tuuku

ton y'a t'eesa: "Nuñ Almasi Raa yi biire!", wo son "Peedo t'iide!" Kane geñ kun'ni daana ye. ⁹ Kun d'olliga tarkuuse ki arka goppon, wo kun d'olliga rabila k'oozige deyyiso dokki. Aame geñ kun addira ye. I dehu sulfi geñ an d'aane doo, wo aame geñ a ki t'isa kaamiki dangiya duniya ye botto.»

¹⁰ Sañ y'an di ruute, y'ede: «Doñ siido soo ti siido soo te an deyya ti tuddaṅ, doñ mozigo soo ti mozigo soo me an deyya ti tuddaṅ kay. ¹¹ I d'isa ṅoṅṅirsito siido ti toogo, wo adda siidiyagi baadaṅ ton i d'isa mosogo wo endani d'ettiso, son i d'isa a kandaane sulfi doñ k'a addira, wo sulfi doñ k'a seeda giggirá i-kaza munda etto. ¹² Wo de ki poone sulfi doñ pay eñ an d'aana geñ, kune an un di'n sefda wo an un di'n dabira. An un di'n t'etta k'ume doñ booro adda boydi doñ in di dooyiso, an un ti'n t'ela adda dangay, wo an un di'n t'etta daana mozagi wo daana doñ deero siido kono kun umbe a sundó. ¹³ Geñ un t'isa a kune urzi wede kun di roota a sulfi doñ kun wulle wo kun illiga a tukki nuuno. ¹⁴ Kun zaapo addugun a ono ni roota eñ me: A munda wede kun d'oodfiba eggun geñ, kun okkima tuddugun ki poone ye. ¹⁵ Aame geñ nuñ batum un t'eley ono a ceerey kun di'n rootey ti suuniyo k'ono ere doñ k'adugun an k'aane an un ki ti'n kidfita ye, an ki rootey ono eñ butte ye. ¹⁶ Kune maawugun, zembagun, taasiyagun wo lanziyagun geñ, kane batum unni t'ela bey doñ deero, wo an ti'n t'ida doñ baadaṅ ti diinagun me. ¹⁷ Kune doñ duniya pay an un di'n olmida kono kun umbe a sundó, ¹⁸ wo ililso k'eggun soo ton i ki dagga ye. ¹⁹ Kun

soodo zakidfi bini dāngu, in̄kino t'urzi geŋ kun t'oona lekkiyo ere ki daayum.»

Booro a tukki Zeruzalem
(*Matiye 24.15-21; Markus 13.14-19*)

²⁰ «Aame kun wulla geeger ki Zeruzalem asigiryagi an di ti d̄uula maŋ, kun suuno aame geŋ onniyatú t'íide, tod'te an di damba kame kamec. ²¹ In̄kino maŋ kane d̄oŋ adda siido Ziide an t'ombo k'ekki moŋgali, kane d̄oŋ adda geeger Zeruzalem an t'addo, wo kane d̄oŋ a dombi i-d̄uule geeger gette an etta ye k'adda geeger te. ²² Derec, onniytagi geŋ an koono ki booro Raa, aame geŋ a aana kono a-t'etta a ono d̄oŋ pay an riine ti kaaga adda mattup ki Raa. ²³ A onniytagi geŋ aasa dabar baadaŋ a kane erayi d̄oŋ mahuwagi ti d̄oŋ in̄nizaŋ an oodiyo! Derec, adda siido gette aasa dabar baadaŋ, wo kulkuwo Raa t'a d̄eega a tukki d̄oŋ siido gettiyo. ²⁴ Doŋ oŋgo an ti'n t'ída ti kasigara, d̄oŋ oŋgo an ti'n sed̄da bulagi ki siidiyagi pay adda duniya, wo kane d̄oŋ Yawudiyagi ye, Zeruzalem an d'onyilsa zoŋdaŋ bini dāngu k'onniytagi d̄oŋ Raa y'an dikke.»

Kama ki yo wede an y'ehe aa ulo wede
(*Matiye 24.29-31; Markus 13.24-27*)

²⁵ «Kun ollo, ekki peedo, ekki tere wo ekki moldali toŋ, i d'isa sulfi d̄oŋ a kiza munda. Adda siidiyagi pay d̄uwo an d'addira, an di-t'ela elkiso baadaŋ a tarkuuse wede ki bar wo ti wede ki ahu i kolzite geŋ me. ²⁶ Duwo an di-t'inda k'orgiso ti elkiso a munda wede aana adda siido pay, kono sulfi d̄oŋ an d'ede toogo a kandaane,

Raa y'a ti'n gozziga. ²⁷ Injokino maṅ an di n' wolla nuṅ wede an n'ehe aa ulo wede eṅ, n'a aana ekki dondirso ti toogo ere pay wo ti daryika ere o d'ede. ²⁸ Aame sulđi geṅ an iisa ettiyto maṅ, kun t'ôhor kaṅ ôhire, kun t'ambo eggun awwa, kono adđiyagun goppon.»

*Ono ombide a tukki tormo
(Matiye 24.32-35; Markus 13.28-31)*

²⁹ Saṅ Isa y'an di ruute ono ombide eṅṅo, y'ede: «Kun wollo tormo wo ti inda đon oṅgo pay. ³⁰ Aame kun wolliyo inda geṅ puutagizaṅ eesiyo roofiyo maṅ, kune batum kun suune adda k'addugun kizini yoṅ goppon. ³¹ Geṅ injokino kay, kun wulla sulđi geṅ an iina maṅ, kun suuno Moziko Raa tod'te goppon. ³² Derec injokino wo n'un di rooto: Đon ankenṅo eṅ an ki ti t'inda pay ye, ki poone sulđi pay geṅ an d'aana me. ³³ Kandaane kane ti siido an t'eṅgila, wo kane onamó an ki t'eṅgila ye, an di lekka ki daayum.»

Kooke a urzi metinjo

³⁴ «Kun koona mentikagi, peedagun kun ti t'eṅgile a isiyto tarnaapagi, ti sobito wo a elkisito sulđi đon ki lekkiyo duniya ye. Para maṅ onniyo ere Raa yi đekka booro t'aana aame kun ki ti delliyo ye. ³⁵ Tod' t'etto aakede lebidó, kono t'a di t'ippa a tukki đon adda duniya geṅ pay. ³⁶ Kun lekko zeere, kun tondo Raa daa puukiyo. Injokino kun t'oona toogo kono kun t'alda ti sulđi đon pay aana k'ita, wo aame nuṅ wede an n'ehe aa ulo wede eṅ n'iina maṅ, n'un di'n t'oona kune kaṅ ôhire a đaanadó me.»

³⁷ Isa geŋ a onnu yi-t'ettiyo dooyiso duwo k'adda booro Boy Raa, wo a diddo maŋ yi-t'ettiyo yi d'onniyo ekki mukkolo ere an ti waaku mukkolo k'Inda k'Olibiye. ³⁸ Ti soohe walak maŋ, kane doŋ duuru an t'ettiyo an di y'ooniyo a booro Boy Raa kono an di y'olliga.

22

*Dehutu k'urzi ki tôwwo k'Isa
(Matiye 26.1-5,14-16; Markus 14.1-2,10-11)*

¹ Tarnaape wede an d'ombo mappa daa k'orme, an yi waaku Pak ki Yawudiyagi geŋ, a guute goppon. ² Aame geŋ kane deero doŋ sedefe ti doŋ suuniyo k'oogoro an dehutu urzi ki tôwwo k'Isa, wo an d'orgiso a doŋ duuru me.

Ziidas ti deero doŋ sedefe

³ Inŋino Meeda siitandani ti-t'iide eedí Ziidas wede an yi waaku sundí soo Iskariyot, yoŋ wede ti diine sanalliyagi kane koomat makumu sire geŋ me. ⁴ Yoŋ y'a iide an di ruuto ti deero doŋ sedefe wo ti deero doŋ boohiyo Boy Raa, a urzi wede mummino y'an di y' t'ela Isa a bezaŋ me. ⁵ Kane ulbaŋ a t'ize unse baadaŋ wo an i di ruute an i-t'eela soŋko. ⁶ Aame geŋ Ziidas y'a iyye, maŋ y'a iise dehutu k'urzi wede kaŋ mummino y'an di y' t'ela Isa a bezaŋ wo kane doŋ duuru an ki suuna ye me.

*Dehu k'ume k'isiyo k'ombo ere ki Pak
(Matiye 26.17-19; Markus 14.12-16)*

⁷ Adda tarnaape ki Yawudiyagi wede an d'ombo mappa daa k'orme geŋ, onniyo t'a iina ere an di waldutu inŋi dambami an d'isiyo ombo

ere ki Pak ki Yawudiyagi te. ⁸ Injino maŋ Isa y'a igibe Piyer kane ti Zaŋ, wo y'an di ruute, y'ede: «Kun'do kun in isoy ombo tarnaapayin ki Pak kono in d'ooma.» ⁹ Maŋ kane an di y' tunde, an'de: «De a too me kee ki dehu ay in d'isey ombe te?» ¹⁰ Yoŋ y'an di'n gime onamaŋ, y'ede: «Kun ollo, aame kun aa t'etey k'adda geeger, kun t'ikkimey ti wedusu yi t'eezo ahu ti diŋgile, kun di y' daanoy bini adda boy wede y'a t'etey. ¹¹ Wo kun t'iidey maŋ, a wede boy kun i di rootoy, kun d'eesoy: "Wede dooyisadey yi ki tondiyo, too te biino ere y'a ooma ombo tarnaapayin ki Pak ti sanalliyagi me?" ¹² Wo yoŋ biino y'un di kizey tod'te dildil t'awwa t'ekki bakatú, sulfi pay adda okkime. Geŋ a ume geŋŋo kun d'isoy ombo te.» ¹³ Maŋ kane an d'ingile, an iide'ŋ sulfi an di'n uuney pay aakede Isa y'an ruute, injino ombo tarnaape ki Pak an t'ize.

Isa y'ombo ombo tarnaape ki Pak ti sanalliyagi

(Matiye 26.26-29; Markus 14.22-25; 1 Korent 11.23-26)

¹⁴ Aame peedo t'iide maŋ, Isa y'a-guune ombo ti doŋ zindí ¹⁵ wo y'an di ruute, y'ede: «Nuŋ ti kaagine ni dihe t'addó pay ombo tarnaapayin ki Pak ette n'a oomi ti kune, ki poone n'a dabira geŋ me. ¹⁶ Geŋ kun ollo, n'un di rooto, ombo ette ni k'ooma ye baa, bini urzutú a-t'etta kereŋ a aaniya Moziko Raa.» ¹⁷ Injino maŋ y'a t'umbe kop, y'a ruute koduwo a Raa, maŋ y'ede: «Kun soodo kop eŋ, kun di dokko wede soŋ yi goomo

goomo. ¹⁸ Genj kun ollo, n'un di rooto, n'a t'iibe ti anki, ki dfaana ni ki sifa ye baa toote k'inñi biñ me, bini aaniya Moziko Raa.»

¹⁹ Sanj y'a t'umbe mappa, y'a ruute koduwo a Raa kono k'ombo gette, manj y'a burke, y'an d'ele sanalliyagi wo y'a ruute, y'ede: «Ette tuddó ere ni t'ela kono kune, kun d'iso injkino kono kun d'elka a nuuno.» ²⁰ Aame an t'iimi manj, ki kop toñ injkino, y'a t'umbe y'an d'ele wo y'a ruute, y'ede: «Kop ti sobo adda ette, tod'te taasawa ere aware Raa yi ketta ti duwo t'urzi puuzadó, to t'oba kono kune. ²¹ Wo kun ollo, wede yi ni t'ela bey donj k'olmidayó, yonj a enño, y'ombo ti nunj kanj soo. ²² Derec, nunj wede an n'ehe aa ulo wede enj n'a t'inda, genj a-t'etta a munda wede aa Raa yi dehu, wo de dabar a wede yi ni t'ela bey donj k'olmidayó.» ²³ Injkino manj an d'iise tondiso ti tuddan, an'de: «De genj ti diinayinj wee wee aasa munda injkino me?»

Wee wee goole a jiire me?

(Matiye 18.1; 20.25-28; Markus 9.34; 10.42-45)

²⁴ Sanj manj kane sanalliyagi an d'iise niikiyto baadan ti tuddan kono an dehu an di suune, ti diinayan minj wee wee goole a jiire me. ²⁵ Manj Isa y'an di ruute, y'ede: «Kane mozagi siidiyagi pay an d'ombo t'ekki donzanj ti toogo, wo kane donj an d'ede urzi ki dokkiyo ekki donzanj, an dehu duwo an di'n waake “Donj k'isiyo beehiyko.” ²⁶ Wo ki kune injkino ye. Ki too manj wede goole a jiire ti diinaganj y'a t'ise aa wede ñenku a jiire, wo wede yi dokkiyo duwo y'a t'ise aa wede naabo a duwo. ²⁷ Wo a elkiyaganj manj,

wede goole a jiire wee wee, wede i-guune ombo kunuŋ, wede i naabiya a yode geŋŋo ko? Kun suune, goole wede i-guune ombo. Wo kun wollo, aŋkenŋo nuŋ a diinaguŋ eŋ aa wede i naabiya a kune. ²⁸ Kune kun ziidfa daayum zakidfi a ita nuŋ adda suldfi dfoŋ ooŋe o iido me. ²⁹ Wo Meegó y'o ele Moziko a nuŋ, iŋkino kay nuŋ n'un di-t'ele a kune. ³⁰ Iŋkino maŋ kun d'oomey kun di sibey ti nuŋ kaŋ soo adda mozikadó, wo kun di konditey ekki kaakidagi moziko, kun d'ekkey booro a tukki boha bumfiyagi koomat makumu sire ki dfoŋ k'Izirayel.»

Tookiyo kuude ki Piyer

³¹ Galmeeega y'a ruute, y'ede: «Simo, Simo, kee k'ollo, Meeda siitandani ti tunde urzi ti Raa wo yi-d'ele, kune pay t'un ti'n tonjile aakede an tonjilso geme. ³² Wo d'e nuŋ n'a tunde Raa kono kee, kono zaapu k'addá a nuŋ a ki dagge ye. Wo aame ki-gimo a nuuno maŋ, zembadá k'an eelo toogo.» ³³ Maŋ Piyer yi di ruute, y'ede: «Galmee'ki nuŋ, n'iyye n'a t'ette ti kee, ise k'adda dangay, ise n'a t'indey ton maŋ.» ³⁴ Isa yi di ruute, y'ede: «Piyer k'ollo, n'a di rooto, aŋki a diddo ki poone uzu y'a kookila geŋ, k'a roota ki ki n' suune ye, suune ye taŋ ado.»

Okkime tudde ki sanalliyagi k'Isa

³⁵ Maŋ Isa y'an di ruute sey, y'ede: «Aame n'un igibe isiyó naabadó daa soŋko, daa k'eese wo daa tofiyagi geŋ, munda unni biito ko?» Kane an i di'n gime onamí, an'de: «Munda ay ki'n biito ye.» ³⁶ Yoŋ y'an di ruute, y'ede: «Wo aŋkenŋo eŋ wede i-d'ede soŋko maŋ y'a t'ambe,

wede i d'ede eese toŋ inŋkino kay, wo wede i-k'ede kasigara ye maŋ, kallayí wede goole y'a t'owol, wo yi d'owili kasigara te. ³⁷ Geŋ kun ollo, n'un di rooto, eŋ ono d'ofŋ an riine ti kaaga adda mattup ki Raa, an'de: "Yoŋ an aa ti y' gize ti d'ofŋ tôwwo d'uwu kaŋ soo*." Geŋ inŋkino i dehu o d'aane. Maŋ ono d'ofŋ an riine a tukki nuŋ geŋ, a-t'etta.» ³⁸ Kane sanalliyagi an di ruute, an'de: «Galmeegey, kasigara ede, sire ettiyo.» Yoŋ y'an di'n gime onamaŋ, y'ede: «Geŋ iide baa.»

*Tondiyo Raa ekki mukkolo k'Inda k'Olibiye
(Matiye 26.36-41; Markus 14.32-38)*

³⁹ Maŋ t'adda geeger Isa yi-t'ud'ede, y'a inŋile k'ekki mukkolo k'Inda k'Olibiye aa yi d'isiyo daayum, wo kane sanalliyagi an di y' diine. ⁴⁰ Aame y'iiney a ume geŋŋo maŋ, yoŋ y'an di ruute, y'ede: «Kun tondo Raa kono kun ki t'ooro adda naamiya daggiya ye.» ⁴¹ Wo yoŋ y'aa lid'ede dokki ti tuddaŋ suma wede y'a sed'ede mukkolo, maŋ y'a-dikke wo yi tondiyo Raa, y'ede: ⁴² «Meegó, ki dehu maŋ dabar ette k'o ti led'edo ti tuddó me, wo toŋ maŋ a ki t'ise aa nuŋ ni dehu ye, wo a t'ise aa kee ki dehu.» ⁴³ Maŋ i d'iido maaleeka ti kandaane yi d'eele toogo a Isa me. ⁴⁴ Isa ulbí i-d'oodiyo baadaŋ, maŋ yi tondiyo Raa ti toogo a jiiire sey, wo raŋŋadí a t'ize aa puuzo i zozziso a siido.

⁴⁵ Aame yi-tunde Raa maŋ, y'a t'iiziga y'a-gime ki tukki sanalliyagi, y'an di'n uuney kane an udige kono an t'ize sommagi dondoŋ. ⁴⁶ Yoŋ y'an

* **22:37** 22.37 Kun wollo adda mattup ki Ezayi 53.12.

di ruute, y'ede: «Ki moo me kun moone me? Kun t'oozo wo kun tondo Raa, kono kun ki t'oorra adda naamiya daggiya ye.»

*Seedu k'Isa ki tôwwadí
(Matiye 26.47-55; Markus 14.43-49)*

⁴⁷ Isa onamí y'a ki ti'n dinge ye botto, aame geŋ kane dŋ duuru an t'ud'fo. Yode wede an yi waaku Ziidas, yoŋ ti diine sanalliyagi kane koomat makumu sire geŋ, y'an t'uugumo a dŋ duuru me. An iiney maŋ, y'a d'iide sirpa k'Isa y'a yi ziidfa yop kono yi-d'ise puuc a tobbisadí.

⁴⁸ Isa yi di ruute, y'ede: «Ziidas, nuŋ wede an n'ehe aa ulo wede eŋ, k'an di n' t'ele bey dŋ k'olmidayó t'urzi k'isiyo puuc a tobbisadó ko?»

⁴⁹ Aame kane dŋ a ita k'Isa an wulle munda wede isa geŋno maŋ, an di y' tunde, an'de: «Galmeegey, ay ti'n dokko ti kasigara ko?»

⁵⁰ Maŋ wede soo ti diinayaŋ y'a-diikida wede naabo ki mozigo goole dŋ sedefe, kuudí a dikke.

⁵¹ Wo de Isa y'a ruute, y'ede: «Kun oolo, geŋ iide baa.» Injino yo y'aa butte a kuudí wede geŋno wo yi-d'ele bee.

⁵² Injino maŋ a kane deero dŋ sedefe, deero dŋ boohiyo Boy Raa wo ti dŋ i dokkiyo Yawudiyagi iido seeduzí, Isa y'an di ruute, y'ede: «De ki moo me kun d'ettiyo tuddó wo tuddugun kun t'ikkimo ti kasigaryagi wo ti dalyagi, aa nuŋ wede k'oogire me?»

⁵³ Para maŋ nuŋ miŋ daayum ti kune a booro Boy Raa, wo kun gi di n' ziidfa ye. Wo de ankenno ette peedagun, peedo ere ki dŋ toogo adda zimolo an d'ise naabadaŋ.»

Piyer y'a kiigira Isa
(*Matiye 26.57-58; Markus 14.53-54*)

⁵⁴ Mañ Isa an di y' ziida, an ti y' dukke, an di t'iide k'adda boy ki mozigo goole don sedeke. Wo Piyer yi di'n daaniya ti dokki. ⁵⁵ Duwo an di mudde uwo a diine booro boy, wo Piyer y'a zunke yi kookiyo uwo ti kane. ⁵⁶ Aame yi zunke yi kookiyo uwo geñ, i d'ede ere naabo t'a yi wulle, wo ti di y' wolliso tebeñ adda k'edayí, mañ t'a ruute, t'ede: «Wede enno ton yon ti yode kan soo.» ⁵⁷ Wo Piyer y'a yi giigira, yi di ruute, y'ede: «Erewo no, nun ni ki y' suune ye.» ⁵⁸ Tan foolon mañ i d'iido wede ti doolo, y'a yi wulle wo y'a ruute, y'ede: «Derec, kee ton wede soo ti diine kane sanalliyagi k'Isa!» Mañ Piyer yi di'n gime onamí, y'ede: «Ato, nun ti diine kane ye.» ⁵⁹ A likke bini mañ, i d'iido wede ti doolo yi-kodfime, yi d'eesiyo: «Ki kotto wede en yon ti yode kan soo, kono yon ti siido Galile.» ⁶⁰ Mañ Piyer yi di'n gime onamí, y'ede: «Aha, munda wede ki rootiyo geñ a nuuno ye.» Wo a kaamiki aame y'a ti rootiyo botto geñ, uzu y'a îile. ⁶¹ Galmeega y'a gilde ki tukki Piyer wo yi di y' wolliyi tebeñ adda k'edayí. Inkino mañ Piyer y'a ilke a ono don Galmeega yi-ruute, y'ede: «Anki en ki poone uzu y'a ôola geñ, k'a roota ki ki n' suune ye, suune ye tan ado.» ⁶² Mañ t'adda boy Piyer yi-t'udde ti paate wo y'a iise môolo baadan.

Kaldita wo kossiyo k'Isa
(*Matiye 26.67-68; Markus 14.65*)

⁶³ Duwo ɗonj i boohiyo Isa an di y'okko maade wo an di y' kossiyo. ⁶⁴ Edayí an i-t'ippe wo an di y' tondiso, an'de: «Kee nebi mañ, ki y'unto wede i ki diiñe me!» ⁶⁵ Wo an i-d'irbita ono baadan ti doolo ɗonj ki kaldita.

Isa a ɗaana deero ɗonj booro
(*Matiye 26.59,63-65; Markus 14.55,61-64*)

⁶⁶ Aame ume i t'umpile mañ, kane ɗonj i dokkiyo Yawudiyagi, deero ɗonj sefeke ti ɗonj suuniyo k'oogoro, an t'ugiye pay an di-t'iide Isa ki ɗaana deero booro Yawudiyagi, ⁶⁷ wo an di y' tunde, an'de: «Almasi Raa yi biire, kee ko? K'ay ki ti rooti ɗo.» Yoñ y'an di'n gime onaman, y'ede: «Aame n'un ruuta mañ, kun k'amba ye onamó me, ⁶⁸ wo aame n'unni tunda toñ mañ, onamó kun ki ti'n kima ye. ⁶⁹ Wo ti anki eñ, nuñ wede an n'ehe aa ulo wede eñ, n'a-kooney a ammade Raa toogadí t'a jiiire pay.» ⁷⁰ Kane pay an di ruute, an'de: «Injino mañ kee Ulo Raa ko?» Yoñ y'an di'n gime onaman, y'ede: «Aa kune batum kun ruute, eñ miñ nuuno.» ⁷¹ Injino mañ an di ruute, an'de: «In ki dehe wenda ti doolo wede illiga y'in ki roote sey ye baa! Kine in illiga bize yode batum i ruute me.»

23

Isa a ɗaana Pilat
(*Matiye 27.2,11-14; Markus 15.1-5*)

¹ Mañ kane ɗonj i t'ugiye an t'iiziga pay, an di-t'iide Isa ki ɗaana Pilat, yoñ Romenj goole siido.
² A ume geñ kane an d'iise sakiysa k'Isa, an'de: «Wede eñ kaye ay y'uuney ɗonj siidafadey yi ti'n

daggiya, y'an rootiyo jibaaye an ti toogo k'eliyo a mozigo goole ki Romen me, wo soŋ yi t'ize yode batum Almasi Raa yi biire, yoŋ mozigo Yawudiyagi.» ³ Pilat y'a yi tunde, y'ede: «Kee mozigo Yawudiyagi ko?» Isa yi di'n gime onamí, y'ede: «Geŋ aa ki ruute.» ⁴ Inŋkino maŋ Pilat y'an di ruute a kane deero doŋ sedefeke ti doŋ duuru, y'ede: «Wede eŋ nuŋ munda k'ulsu a eedí ni k'uune ye, wede i di t'ide booro t'a yi seeda me.» ⁵ Wo kane an di kod'dime, an'de: «Yoŋ t'urzi dooyisadí doŋ pay y'an t'eliyto ono bini a-t'ooziga deyyiso. Yoŋ y'iiso ti siido Galile, y'a tûukeŋ siido Ziide pay, wo aŋkeŋ y'aa d'iina a enno.»

Isa a daana mozigo Erod

⁶ Aame Pilat y'illiga ono genno maŋ, y'a tunde, y'ede: «Wede eŋ yoŋ ti siido Galile ko?» ⁷ Wo aame yi zuune Isa yoŋ ti siido ere mozigo Erod Antipas maŋ, Pilat yi di y'igibe a Erod, kono a onniytagi geŋ yode Erod toŋ a Zeruzalem. ⁸ Aame Erod yi wulle Isa maŋ, ulbí aaze uŋse baadaŋ, kono yoŋ y'ollige rabiladí ti kaagine wo yi dehu y'a ti y' wolle. Inŋkino yi zaapu elkisadí yi-d'isa munda k'armika y'a-wolla. ⁹ Erod y'a yi tundite taŋ baadaŋ, wo yo Isa yi-k'ohine bizi ye. ¹⁰ Kane deero doŋ sedefeke, ti doŋ suuniyo k'oogoro, kane a sirpa an di rootiyto ono ti golla zakidí. ¹¹ Erod kane ti asigiryagi an di y'okko maade wo an di y'ambutu saa saac. An i-di t'usse kalle majjaane, maŋ yi di y'igibe a Pilat. ¹² Erod ti Pilat geŋ ti poone kane adu, wo ti onniyo gette an t'ize lanziyagi.

Booro k'Isa ki t'ôwwadí

¹³ Injino mañ Pilat y'a-tusse kane deero ñon sedefe, deero Yawudiyagi wo ti ñon duuru, ¹⁴ wo y'an di ruute, y'ede: «Wede eñ kun oo d'iido'ñ kun'de, ñuwo pay yi ti'n daggiya. Injino ni y' tunde a ñaanagun a ono ñon kun rootiyto a tukki yode geñ me, wo nuñ munda ulsu a eedí ni k'uune ye a t'íde booro t'a yi seeda me. ¹⁵ Erod geñño ton munda ulsu yi k'uune ye a eedí me, injino y'ay ti y' gimo. Kono k'injino, wede eñ munda ulsu yi k'ize ye wede a t'íde k'unto me. ¹⁶ Injino mañ n'an t'ela urzi a asigiryagó an ti y' gorpipa ti marpa ñoo miñ, sañ an i-d'eeza kollo.» ¹⁷ Yi ruute injino kono aa an d'isiyo daayum a tarnaape Pak ki Yawudiyagi, i dehu Pilat y'an d'adde wedusu soo t'adda dangay.

¹⁸ Wo pay kañ soo an d'iise ñollite, an'de: «Wede geñ ki y'ôodo! K'ay t'adfi Barabas!» ¹⁹ Yo Barabas geñ an yi ziida dangay kono yon wede an t'eelite ono a ñuwo an d'iiziga ñeyyiso adda geeger ki tukki Romen, wo soñ y'iide wedusu. ²⁰ Pilat y'an d'iise rootiyo sey a ñon duuru kono yi dehu Isa yi-d'eeze. ²¹ Wo kane an di ñollite, an d'eesiyo: «Ki ti y' taako ekk'undumu wede zaapu t'ekki bakadí kañ tontilko! Ki ti y' taako ekk'undumu wede zaapu t'ekki bakadí kañ tontilko!» ²² Mañ Pilat y'an di ruute k'aduwe, y'ede: «Wede eñ munda ulsu miñ y'ize moo me? Nuñ mañ munda ulsu ni k'uune ye a eedí i di t'íde k'unto me. Injino n'an t'ela urzi an ti y' gorpipa ti marpa ñoo miñ, sañ an i-d'eeza kollo.» ²³ Wo kane an di kodfime ñollite ti golla awwa, an d'eesiyo: «Isa ki ti y' taako ekk'undumu wede

zaapu t'ekki bakadí kaŋ tontilko!» Maŋ Pilat i-di t'iide a dollitadan gette. ²⁴ Inŋkino yoŋ booro y'an ti-dikke a munda wede Yawudiyagi an ton-diyo me. ²⁵ Barabas wede kane an dehu geŋ, Pilat y'a y'udde, yode wede an ti y'ele adda dangay kono y'an t'eelite ono a duwo an d'iiziga deyyiso ki tukki Romen, soŋ y'iide wedusu geŋ me. Wo yo Isa y'an di y'ele a bey k'asigiryagi, an d'ise munda wede kane Yawudiyagi an dehu.

*Taakiya k'Isa ekk'undumu
(Matiye 27.32; Markus 15.21)*

²⁶ Maŋ Isa an di-t'ette k'ume taakiyadi. A urzi an a-t'ikkima ti wede soo inŋkino yoŋ ti geeger Siren, sundí Simo, y'aahiya doome. Kane asigiryagi an di y' ziida, an i-d'ele undumu wede zaapu t'ekki bakadí kaŋ tontilko, y'a t'umbe a dannayi wo yi daaniya Isa. ²⁷ Doŋ duuru baadan ki siido gette an di y' daaniya, ti diinayan erayi an a-t'ibi beydan a giggiran wo an di dollite molo kono k'Isa. ²⁸ Maŋ Isa y'a gilde k'ume k'erayi geŋno wo y'an di ruute, y'ede: «Kune erayi Zeruzalem no, kun ôole ye kono nuŋ me, ki too maŋ kun ôolo'ŋ ki kune wo ki inŋgun. ²⁹ Derec, onniytagi saŋ maŋ an d'aana, aame geŋ an di roota: “Uŋsuwo a kane erayi doŋ kartiyagi, a kane doŋ an k'ehe ye wo an k'uude inŋi ye botto.” ³⁰ Inŋkino maŋ duwo an di roota, an t'eesa: “Mongali an ay di ti'n ruugi!” wo soŋ an t'eesa: “Kessagi an ay ti'n ombidi!” ³¹ Aame duwo an o isiyo kino a nuŋ wede aakede

undumu zeere eŋ me maŋ, an d'aana moo me a kane doŋ aakede inda doŋ meedí me*?»

³² An a-dukko a ita k'Isa doŋ sire ti doolo, kane doŋ k'oogire, an ti'n t'íde ti yode kaŋ soo. ³³ An iiney a ume wede sundí «osse k'eego» maŋ, a ume geŋ Isa asigiryagi an ti y' tiike ekk'undumu wede zaapu t'ekki bakadí kaŋ tontilko. Wo an a-tiike ti yode doŋ k'oogire sire, wede soŋ t'undumzí a kese k'ammidadí wo soŋ t'undumzí a kese geeladí. ³⁴ Inkino maŋ Isa y'a ruute, y'ede: «Mee'ki nuŋ, k'an t'iso tambobino, kono an ki suune ye munda ye an isiyo geŋ me.» Wo asigiryagi an di dikkidá kallagi k'Isa t'urzi k'arbu tel tel muntelliyo. ³⁵ Kane doŋ duuru an t'íhira anŋeŋno, an di wolliyo. Kane deero Yawudiyagi an di y'okko maade, an d'eesiyo: «Yoŋ doŋ doolo y'an utte de, anken y'utto tuddí batum, aame yo Almasi Raa yi biire kotto maŋ!» ³⁶ Kane asigiryagi toŋ an di y'okko maade, an a d'ettiyo goppon ki sirpadí, an i-d'eliyo toote suddo k'inŋi k'inda biŋ y'a sibe, ³⁷ wo an d'eesiyo: «Aame kee mozigo Yawudiyagi kotto maŋ, k'utto tuddá batum!» ³⁸ T'ekk'eedí an tiike pakirte wo an a-ti riŋe, an'de: «Yode eŋ mozigo Yawudiyagi.»

³⁹ Ti diine doŋ k'oogire sire an ti'n tiike ekk'inda geŋ, wede soŋ y'a gilde Isa, y'ede: «Kee Almasi Raa yi biire kotto maŋ, k'utto tuddá batum wo kaye pây!» ⁴⁰ Wo yo wede soŋ y'a

* **23:31** 23.31 Ono k'Isa yi rootiyo a tukki Undumu zeere wo Inda doŋ meedí: I-kaza undumu zeere yode Almasi batum, wede i-k'ede oldíko munda ye toŋ an di y' dibire bini unto. Inda meedí kane Yawudiyagi doŋ k'isiyo k'oldíko, geŋ taŋ baadaŋ a jiire dabar ere an t'oona te.

y'idfise, yi di ruute, y'ede: «Kee a Raa ki-k'orgiso ye, kee wede booro ti ki ziifda k'unto ti yode eŋ kaŋ soo. ⁴¹ Ki kine dabar ette d'erec, kono in ooniyo munda wede in ize t'urzi naabadiŋ, wo yo wede eŋ munda ulsu yi k'ize ye.» ⁴² Saŋ y'a ruute sey, y'ede: «Isa, k'a n'elko aame ki-kimo ki mozikadá geŋ me.» ⁴³ Maŋ Isa yi di'n gime onamí, y'ede: «Derec inŋkino wo n'a di rooto: Aŋki eŋ kee ki-t'etta ti nuŋ adda jenne.»

Unto k'Isa

(Matiye 27.45-56; Markus 15.33-41)

⁴⁴⁻⁴⁵ Aame peedo t'ize diine maŋ, ti ki tooriyo ye, ume a t'ize zimolo dil a likke bini eesiyo peedo lohe. Wo alboy wede i d'ikke adde Boy Raa soŋ k'adda soŋ ki paate, a t'ihina tar a diinayí. ⁴⁶ Isa y'a idili ti golla awwa, y'ede: «Mee'ki nuŋ, n'a-d'elo undó a beezá†.» Aame y'a ti ruute inŋkino maŋ, y'a-t'ihe. ⁴⁷ Goole k'asigiryagi meeda ki Romenŋ yi wulle munda wede ize me. Maŋ y'a imme Raa wo y'a ruute, y'ede: «Ki kotto wede eŋ yoŋ ki diine.» ⁴⁸ Kane d'oŋ duuru pay iide wolleyo geŋ, aame an wulle munda wede ize maŋ, kane an di-gime, beydaŋ an a-t'ibi giggiraŋ kono an môle. ⁴⁹ Wo kane pay lanziyagi k'Isa ti erayi d'oŋ i yi diino ti siifdo Galile, an t'ihirte ti dokki an di wolleyo munda wede isiyo.

Isa adda muuzo

(Matiye 27.57-61; Markus 15.42-47)

⁵⁰⁻⁵¹ I d'ede wedusu sundí Yusup yoŋ ti geeger ki Yawudiyagi sundutú Arimate. Wede geŋ yoŋ

† **23:46** 23.46 Kun wollo adda mattup ki Soom 31.6.

beehiye wo ki diine, yi zaapu elkisadí a ettiyo Moziko Raa. Yoŋ wede ti diine deero booro Yawudiyagi, wo yi k'iyye ye a munda wede don deero booro ongo an dihe an d'ise a tukk'Isa, wo soŋ a naabadaŋ ere an ize te. ⁵² Yo y'a iide y'a uuney Pilat, y'a yi tunde a nuune k'Isa. ⁵³ Pilat yi-d'iyye, maŋ Yusup y'a ti y' dfiige nuune t'ekk'undumu wede zaapu t'ekki bakadí kaŋ tontilko me. Y'a ŋilpe ti sotor tuwarwa zooyatú ooŋe, yi-t'ele adda muuzo, tod'te aa urmi an ittiba mukkolo, a ume isire wenda kaŋ soo toŋ an k'eele ye. ⁵⁴ Suldi geŋ ize onniyo jima, d'uwu an okkime tuddaŋ kono onniyo ere ki puukiyo Yawudiyagi ti t'eesa‡. ⁵⁵ Kane erayi don i diino Isa ti siido Galile geŋ, Yusup an di y' diine, an di wullo muuzo wo mummino an ziipe nuune k'Isa me. ⁵⁶ Saŋ maŋ an di-gime k'adda geeger, an iide'ŋ an d'iwiilo egey ti puutagi k'inda don eediyadaŋ unse, an aa di gilse ki rorriso a nuune k'Isa. A onniyo ere ki puukiyo Yawudiyagi maŋ, an di buuke aakede oogoro ti rootiyo.

24

Bald'iya k'Isa

¹ Onniyo dumas ti soohe walak maŋ, erayi an di ziki egey don kalsiya eediyadaŋ unse a beydaŋ, an d'ingile ki biza muuzo. ² An iiney maŋ, an wolliyo zumbulu wede an a-t'ippe a

‡ **23:54** 23.54 Di Yawudiyagi, onniyo t'eesiyo ti peedo t'ambe k'ooriyo ere ki anki bini peedo t'ambe k'ooriyo ere ki soggo. Wo onniyo ere ki puukiyo toŋ inkiŋo kay, geŋ inkiŋo nuune k'Isa an di dihe an t'ottiba ki poone peedo t'a oora geŋ me.

biza muuzo'ŋ doŋkilso a kese. ³ Kane an t'iide k'adda muuzo, wo nuune Galmeega Isa an ki y'uuney ye. ⁴ Kane erayi an d'uhibe, a kaamiki a d'aanadaŋ i d'iido kuuli sire ti kallagi i ralita. ⁵ Inŋkino kane orgiso t'anni ziida, an di nukkite, wo de kuuli doŋ sire geŋ an an di ruute, an'de: «Ki moo me kun wekku wede zeere a diine doŋ unto me? ⁶ Yoŋ umbo a enno me, Raa yi ti y' bilda. Kun elko a ono doŋ y'un ruute aame yo botto a siido Galile, y'ede: ⁷ "I dehu nuŋ wede an n'ehe aa ulo wede eŋ, an di n' t'ela a bey doŋ k'oldiko, an ti n' taaka ekk'undumu wede zaapu t'ekki bakadi kaŋ tontilko, wo onniyo sire k'aduwe maŋ n'a-balda."»

⁸ Inŋkino maŋ kane erayi geŋ an di'n ilke ono doŋ Isa y'an ruute geŋ me. ⁹ Kane ti biza muuzo an di-gime, wo an iide'ŋ an an t'iide taaya gette pay a kane doŋ koomat makumu soo wo a kane sanalliyagi doŋ oŋgo pay. ¹⁰ Kane erayi doŋ iide ki biza muuzo geŋ, Mariyam ere ti siido Magdalla, Zane wo Mariyam ere mekki Zak. Wo erayi doŋ ti doolo doŋ iide ti kane geŋ, taaya gette an an t'iide pay a doŋ zina k'Isa me. ¹¹ Wo kane a onamaŋ geŋ an di'n wulle erayi aa doŋ maadagi, onamaŋ an ki d'umbe ye. ¹² Wo toŋ maŋ Piyer y'a t'iiziga y'a ukke ki biza muuzo. Y'iiney maŋ, y'a t'uttile yi nooŋniyo k'adda, yi wolliy'oŋ sarwilagi d'aŋŋal, maŋ y'a ziida giggiri a munda wede ize geŋ me, wo y'a-gime ki boozí.

A urzi k'Emayus

¹³ A onniyo gettiyo batum i d'ede sanalliyagi sire an ambe k'adda k'ille sundutú Emayus,

tod'te suma kuɓɓaara paat ti Zeruzalem me. ¹⁴ Kane an di rootiyto tuddaŋ a sulɗi ɗoŋ pay ize geŋ me. ¹⁵ Aame kane an rootiyto wo an niikiyto ti tuddaŋ geŋ, yode Isa batum y'a iide, y'a-ti giyye ti kane an di sooru kaŋ soo. ¹⁶ Kane an di y' wollyo, wo munda an t'eegirso ki suuniyadi me.

¹⁷ Maŋ Isa y'anni tunde, y'ede: «Kune kun di sooru ɗe, kun di niikiyto a tukk'amme?» Injino maŋ kane an t'ihira, sommagi dondoŋ. ¹⁸ Wede soo ti diine kane sire geŋ sundi Kiliyopas, yi di ruute, y'ede: «Kee siida ɗaŋŋal ko, wede i lekkiyo a Zeruzalem wo i ki suune ye munda wede ize adda k'onniytagi ɗoŋ k'ita eŋ me?»

¹⁹ Yoŋ y'anni tunde, y'ede: «De ize moo me?» Kane an i di'n gime onami, an'de: «Munda wede i-iina a tukk'Isa wede ti geeger Nazaret. Yoŋ geŋ nebi wede toogo, wo y'a ti gize toogadi t'urzi naabadi wo t'urzi k'onami a ɗaana Raa wo a ɗaana ɗuwo pay. ²⁰ Kane deero ɗoŋ sedikadiŋ ti ɗoŋ dokkiyadiŋ an an di y'ele a bey ɗoŋ k'olmidayi kono booro t'a yi seeda ki towwo, wo an ti y' tiike ekk'undumu wede zaapu t'ekki bakadi kaŋ tontilko. ²¹ Kaye ay ziipe elkisadey a yode, yoŋ wede soo y'an adɗa ɗoŋ k'Izirayel ti bey ɗoŋ k'aduzan. Wo t'ekki sulɗi pay geŋ, onniyo anki ette k'aduwe t'ume sulɗi geŋ ize me*.²² Wo toŋ erayi miibi ti diinayey an ayn'iddira. Anki ti soohe walak

* **24:21** 24.21 Onniyo anki ette k'aduwe t'ume sulɗi geŋ ize me: I-kaza di kane Yawudiyagi an elkiyo wedusu y'unto maŋ, undi ti lekkiyo a sirpa nuune onniyo sire k'aduwe geŋ, yi ki bilɗe ye maŋ geŋ umbo ki ɗaanadi baa.

an d'ingile ki biza muuzo. ²³ An iide'ŋ, nuune k'Isa an ki y'uune ye. Kane an di-gimo, an ay t'iide taayadan te an'de, maaleekiyagi an'n iido tuddan wo an di ruute, an'de: "Yon zeere." ²⁴ Ti diine kaye ay sooru kan soo gen, don miibi an d'ukke ki biza muuzo wo an d'uuney min pay a-t'iide aakede erayi an ruute. Wo yon min umbo, an ki y' wullo ye.»

²⁵ Inkinoman Isan yan di ruute, y'ede: «Kune don elkisagan attidi, kun k'ambu kesiko ye ono don pay nebiyagi an ruutite gen me. ²⁶ Ki kotto i dehu Almasi Raa yi biire gen ya dabire inkinoo min, san yi t'etta adda daryikadi kollo.» ²⁷ San yan di gizite kereŋ suldi don pay an riinite ti kaaga a tukki yode adda mattup ki Raa gen me, ya iise ti mattup k'oogoro Muusa bini ya-ti dinge ti mattupiyagi don pay ki nebiyagi.

²⁸ Aame kane an iiney goppon ti ille ere an'te man, Isa yi d'isiyo aakede y'ingile ki daana inkinoo. ²⁹ Wo kane an di kodfime, an d'eesiyo: «Kee k'oopo ti kaye kino, peedo t'a t'ooriyo ume y'ize.» Inkinoman yi-t'iide adda boy, ya uupe ti kane. ³⁰ Ya-guune omba ti kane, ya t'umbe mappa, ya ruute koduwo a Raa, man ya burkite, yan d'ele. ³¹ Aame gen edayan a t'ihina, kane an di y' zuune Isa me, wo a kaamiki ti daanadan ya nukkiŋ. ³² Kane an d'iise rootiyto ti tuddan, an'de: «Aame kine a urzi wo yon y'in rootiyto a tuk'ono don an riinite ti kaaga adda mattup ki Raa gen, ki kotto in d'uwwa munda a biza kulbin me.»

³³ Man kesiko kane an t'iiziga, an di-gime

ki Zeruzalem. An iide'η an di'n uuney kane sanalliyagi koomat makumu soo geη an t'ugiye ti dōη an sooru soo, ³⁴ wo kane an an di ruute a dōη sire geη, an'de: «Ki kotto Galmeega yi bilde, yi gize tuddí a Simo!» ³⁵ Wo kane batum an an t'iide taaya a munda wede ize a urzi, wo mummino kane Isa an di y' zuune a ume wede y'an borkiso mappa geη me.

Isa yi kaza tuddí a sanalliyagi

³⁶ Aame kane onamaη botto an a ki ti'n dīnge ye geη, a kaamiki yode Isa batum y'a gize tuddí a diinayaη, wo y'an di ruute, y'ede: «Toose ti koonā ti kune.» ³⁷ Kane an d'iddira, orgiso t'anni ziidfa baadaη kono an elkiyo an wulle'η beyye. ³⁸ Wo Isa y'an di ruute, y'ede: «Moo me kun orgiso me? Moo me un d'ede niikiyo adda k'addugaη me?» ³⁹ Kun wollo beydó ti zoηdó, eη miη nuη! Kun ni botto, wo kun wollo beyye'η i-k'ede tukiηo ye osse ye, wo nuη oo d'ede aakede kune kun wolliyo. ⁴⁰ Yoη y'a ti dīnge onamí maη, y'an di gize beydí ti zoηdí. ⁴¹ Wo kane onamí an k'ambu ye botto kono addaη ūune t'un̄suwo wo an ziidfa giggiraη. In̄kino maη yoη y'anni tunde, y'ede: «A en̄no un ede munda k'om̄bo ko?» ⁴² Kane an i di burko puuniso gayirsa an i-d'ele. ⁴³ Yoη y'a ziidfa wo y'a t'iimi a d̄aanadaη.

⁴⁴ Saη y'an di ruute, y'ede: «Aame nuη botto ti kune geη, en̄no munda wede n'un ruute me: I dehu ono dōη an riīe a tukki nuη adda mattup k'oogoro Muusa ti ono dōη ki nebiyagi wo adda mattup ki Soom geη, kane pay a aane kono a-t'ette a ono mattupiyagi geηno.» ⁴⁵ In̄kino maη

yon y'an t'ihina eedan, kono an di seeda ita k'ono don an riije ti kaaga adda mattup ki Raa, ⁴⁶ wo y'an di ruute, y'ede: «Enno munda wede an riije me, an'de: Almasi Raa yi biire, y'a dabira bini y'a t'inda, san onniyo sire k'aduwe man Raa y'a ti y' balda ti diine don unto me. ⁴⁷ Gen i dehu an di kizite ti sundi a ita duwo pay, an di t'eese ti Zeruzalem, an an di roota a duwo an di-kima lekkiyadan wo an t'oono tambobino k'oldikadan. ⁴⁸ A suldi pay gen kune kun illiga wo kun wulle. ⁴⁹ Wo nun ni-t'igibo a eggun munda wede Meegó Raa yi ruute y'un t'ela. Wo kune'ŋ, kun lekko adda geeger bini toogo ere i deego t'awwa ti kandaane t'un di'n ôona.»

Engilso k'Isa k'awwa ki kandaane

⁵⁰ San t'adda geeger Isa y'an t'udde ti paate, an d'ingile k'ume wede goppon ti ille ki Betani. A ume gen y'a ziki beydi wo y'an di ziipe beeko. ⁵¹ Aame y'an zaapu beeko gen, kane y'an di'n iili, yon Raa y'a y'umbe k'awwa ki kandaane. ⁵² Aame gen kane an di-dikke wo an t'uttile a daanadi, san an di-gime ki Zeruzalem t'unjuwo baadan. ⁵³ Kane an d'ettiyo daayum k'adda booro Boy Raa, wo an di tamma Raa.

**Mattup ki Taasuwa ere Aware
Mukulu: Mattup ki Taasuwa ere Aware (New
Testament)**

copyright © 2019 Wycliffe Bible Translators, Inc.

Language: (Mukulu)

Contributor: Wycliffe Bible Translators, Inc.

All rights reserved.

2020-11-19

PDF generated using Haiola and XeLaTeX on 21 Feb 2024 from source
files dated 29 Jan 2022

523c1c0a-f8ac-5d2f-aebe-7063b0de6b23